

S T E N O G R A M

13. RADNE SJEDNICE SKUPŠTINE KANTONA SARAJEVO

**ODRŽANE 30.03.2016. GODINE SA
POČETKOM RADA U 10,00 SATI**

Predsjedateljica:

Otvaram 13. Radnu sjednicu Skupštine Kantona Sarajevo.

Pozdravljam sve uvažene zastupnike, kolege, naravno članove Vlade, uvažene goste, kao i predstavnike medija koji prate naš današnji rad sjednice.

Nadam se da će uvaženi gledaoci Televizije Kantona Sarajevo sa pažnjom pratiti ovu današnju sjednicu Skupštine, te im upućujem srdačne pozdrave, a svima nama želim ugodan rad. Molim tišinu u sali. Premijeru, hvala lijepo.

Izostanak sa ove sjednice opravdali su: Selma Filipović, Amor Mašović i Fikret Prevljak.

Prema tome, imamo dovoljan kvorum, odnosno imamo 32 zastupnika, što je dovoljno za rad ove današnje Skupštine.

Prijedlog dnevnog reda 13. Radne sjednice Skupštine Kantona Sarajevo utvrdio je Kolegij Skupštine koji je održan 18.03.2016.godine.

Na osnovu člana 73. Poslovnika Skupštine Kantona, Kolegij Skupštine Kantona Sarajevo, prihvatio je, da se Prijedlog dnevnog reda 13. sjednice, dopuni sa sljedećim tačkama:

1. Prijedlog odluke o prihvatanju zaduženja Kantona Sarajevo po Ugovoru broj 1. o Amandmanu na Ugovor o zajmu potpisan 27. oktobra 2011. godine između Bosne i Hercegovine i Evropske banke za obnovu i razvoj (EBRD), za Projekat gradskih saobraćajnica (i ta tačka će biti pod rednim brojem 9.);
2. Prijedlog odluke o potvrđivanju imenovanja predsjednika i članova Skupštine KJKP „Gradski saobraćaj“ d.o.o. Sarajevo (razmatraće se kao 10. tačka);

Prije prelaska na utvrđivanje Dnevnog reda podsjetila bih vas da u skladu sa odredbama člana 161. Poslovnika Skupštine Kantona Sarajevo o prijedlozima zakona po hitnom postupku, Skupština odlučuje kao o prethodnom pitanju prije utvrđivanja dnevnog reda sjednice.

U okviru prethodnog postupka prelazimo na Prijedlog zakona o komunalnim djelatnostima, po hitnom postupku.

Ima li potrebe da predstavnik predlagača obrazloži razloge donošenja ovih hitnih postupaka? Ima. Izvolite, uvaženi premijeru Konakoviću.

Premijer Elmedin Konaković:

Poštovana predsjedavajuća, dopredsjedavajući, sekretaru, poštovane zastupnice i zastupnici u Skupštini Kantona Sarajevo, poštovane ministre i ministri u Vladi Kantona Sarajevo, cijenjeni gosti, poštovanje i želim vam uspješan rad na današnjem zasjedanju. Mi smo u fazi u kojoj je kompletan segment komunalne privrede paralizovan presudom Ustavnog suda koja je u meritumu ispravna, jer se trenutno na sceni funkcija komunalne privrede odvija isključivo u nadležnosti Kantona Sarajevo, što po Ustavu i FBiH i Kantona Sarajevo ne bi trebao biti slučaj. Da sada kažem u nekoliko plastičnih primjera. Mi trenutno nemamo ovlasti da implementiramo EBRD-ov kredit za rekonstrukciju vodovodne mreže u Kantonu Sarajevo po trenutnom stanju bez ovih zakona. Nemamo nadležnost da u opšte vršimo nadzor nad radom komunalnih preduzeća, čiji smo osnivač. Nemamo nadzor da rješavamo pse lutalice koji su gorući problem, a i tu smo duboko zagazili u ekonomski segment iznalaženja sredstava za kupovinu zajedno sa nevladinim sektorom i ovog azila i niz drugih problema zbog kojih danas

možemo konstatovati stanje u Kantonu Sarajevo potpuno paralizovanim kada je riječ o segmentu komunalne privrede. Shodno tome, mi smo uradili sve što je potrebno; razgovarali smo sa visokim predstavnikom, direktno ministar Nenadić i ja više puta. Sa svim načelnicima i svim predsjedavajućim vijeća više puta, sa Gradskom upravom, gradonačelnikom i njegovom administracijom više puta i svi smo zajedno došli do mogućih rješenja, a to je: da se prvo u hitno u proceduru Skupštine vrte ova dva zakona u identičnom tekstu u kakvom su bila usvojena, da se objave u Službenim novinama, tek kada svih devet opština da svoje stavove, njihova mišljenja nisu obavezujuća, niti mora svih devet biti saglasno, ali su nam svih devet obećali da je saglasnost sa ovim zakonom koji smo mi u ovom identičnom tekstu predložili, tek tada ćemo u službenim novinama objaviti oba zakona i tad nastavljamo njihovu primjenu. Istovremeno smo pripremili Nacrt zakona u lokalnoj samoupravi u kojoj se detaljno regulišu nadležnosti jer su nam opštinske administracije lokalne zajednice konstatovale da nisu baš raspoloženi da preuzmu sve ono što je njihova ovlast. I tu smo između dvije stvari. Jedna je pravo a druga je funkcija pružanja komunalnih usluga u kojoj su recimo VIK, Gras, Toplane, Sarajevo gas, teško mogu staviti u nadležnost lokalnih zajednica, pojavit će se niz problema. Neću previše to elaborirati, to će biti predmet naravno rasprave i Skupština Kantona Sarajevo kod donošenja ovog zakona, i svih lokalnih zajednica u Kantonu Sarajevo i još jedno od mogućih rješenja tamo gdje je nemoguće razdvojiti to na lokalne zajednice, predložili smo pokretanje holdinga u kojem bi osnivači bili i lokalne zajednice i grad i Kanton Sarajevo, upravljačka struktura bila zajednička. To je nešto o čemu smo načelno imali dogovor i u njemu prvi korak da bi smo mogli nastaviti normalnu funkciju do donošenja ovih zakona. Tražili smo mi sami da ti rokovi budu kraći, ja sam tražio da ne budu duži od šest mjeseci, da ne bude onako kako su mi sugerisali pravници, da Zakon o lokalnoj samoupravi, mi kao Vlada prosljedimo vama, da nema dovoljan broj ruku na Skupštini i time mi izbjegavamo odgovornost, zbog ne donošenja Zakona i nepoštivanja presude Ustavnog suda. To ovoj Vladi nije cilj. Dakle to je nama i cilj da uspostavimo funkcionalan sistem komunalne privrede. S druge strane nemamo ništa protiv da nas lokalne zajednice rasterete jednog dijela upravljanja, i jeste njihova nadležnost uz naravno i Zakon o raspodjeli javnih prihoda u kantonu koji bi pratio ove segmente i to je također u Programu rada Vlade i Skupštine koji smo usvojili. Tako da je to tek završen proces kada se svi ovi dokumenti usvoje. Mi cijenimo da je dovoljno šest mjeseci u ovoj godini da se te stvari završe i dovedu do kraja, ali nam je zaista nužno da se ova dva zakona, i još jedna bitna stvar: svi podzakonski akti koji su proizašli iz ovih zakona su trenutno nevažeći. Mi moramo nakon, ako usvojite ova oba zakona imati jednu ili dvije sjednice Vlade na kojoj ćemo ponoviti sve podzakonske akte. Dakle, trenutno, evo Uredba o sportskim plohama i igralištima u Kantonu Sarajevo nakon jednog slučaja smrtnog u Kantonu Sarajevo nije na snazi, ustvari završena je, pripremljena je u Ministarstvu komunalne privrede, Vlada je završila svoj dio posla već mjesec dana mi čekamo, ne možemo je implementirati. Niz je sličnih u kojima bez podloge ova dva zakona mi u segmentu komunalne privrede nemamo nikakva prava da dalje radimo i donosimo odluke, dok se ne donesu drugi zakoni. Zato vas molim da shvatite ozbiljnost ove situacije ili ako imate neke prijedloge bolje, mi smo zaista vrlo raspoloženi da čujemo i da malo onda promijenimo kurs ako mislite da nešto od ovoga ne bi trebalo ići ovim redom. Vidim da se javljate. Ja ću ostati ovdje da eventualno odgovorim na neka pitanja.

Predsjedateljica:

Hvala premijeru. Evo nisam rekla ima li pitanja. Evo vidim gospodin Kojović se javio za riječ. U redu.

Zastupnik Predrag Kojović:

Zahvaljujem predsjedavajuća. Pozdravljam sve prisutne. Potpuno razumijem problem u kojem smo se našli, ali bih volio sad vidim ministar Nenadić je tu, možda da pomogne da

razjasnimo. Moje razumijevanje je da je saglasnost opština potrebno pribaviti bez obzira da li je ona pozitivna ili negativna na nešto, ali potrebno je pribaviti prije usvajanja, ne prije nego što on stupa na snagu. Druga stvar koliko ja razumijem ovaj proces neophodno je da ide kroz Savez opština i gradova a ne u pregovorima direktnim sa opštinom. Znači potpuno razumijevajući situaciju u kojoj se našla Vlada Kantona Sarajevo i to samo hoću da utvrdim u kojim stepenu je ovo što danas radimo ustvari rješenje problema a da neće nas za vrlo kratko vrijeme nas dovesti na neki način opet u ovu istu tačku u kojoj se danas nalazimo, tj jest da obavljamo funkcije na osnovu nevažećih ili kako bih rekao neustavnih zakona i samo da podsjetim, ne bih volio da se i ova Skupština dovede u situaciju kakvu se doveo Dom naroda u Federalnom parlamentu, kada je i tada uprkos upozorenjima iz poslaničkih klupa, rukovodstvo Doma se odlučilo za jednu proceduru koja se kasnije ispostavila pogubna, znači ne bih volio da zagazimo istim tim putem i ovom prilikom. Hvala.

Premijer Elmedin Konaković:

Evo ja ću par rečenica da budemo efikasni. Identična je naša dilema i mi nemamo zaista uopšte sumnju da bi smo išta uradili niti nam je želja da uradimo bilo šta slično što bi ponovo nas dovelo u neke sudske procedure. Mi smo analizirali kako to kaže Ustav, čak kažemo ne propisuje obaveznu saglasnost, nego konsultacije. Ministar Nenadić to zna bolje od mene, on će dopuniti ovaj pravni, Hasanspahić je ovaj stručni dio pitanja i ako krenemo u tačku u obrazlaganju samog dokumenta. Nismo našli to da je to Savez opština i gradova, prihvatom apsolutno ako je i to. Ono s čime smo se mi pokušali ograditi, evo već imamo neke možda druge prijedloge, da skupštinskim zaključkom kažemo da se ne može objavljivati Zakon dok se sve prethodne pravne radnje ne završe. Druga mogućnost je bila da mi izgubio još jedan cijeli mjesec u čekanju svih opštinskih vijeća, njihovih sastanaka. Moram reći da smo mi ovo poslali ovo opštinskim vijećima i načelnicima, prije skoro mjesec dana. Jako su slabe i spore reakcije lokalne zajednice. Nema baš tu osim ovog narativnog dijela direktne komunikacije, slika, zapisnika, sve imamo da smo se dogovorili. Ne znam reći Hasanspahić koliko njih je eventualno do sada odgovorilo pozitivno ili negativno, osam njih je već dalo, čekamo još jednog, i to je sve na blagi mali pritisak. Reći će Hasanspahić sve koje su, evo ja to ni ne znam. Dakle sve je to u suštini ovaj dio Kantona, ne znam da li bi sada opština Jajce, ili opština Livno ili neka druga iz Federacije trebala formalno pravno dati mišljenje na kantonalni propis koji se tiče isključivo ovih naših. Tako da taj Savez opština i gradova, ako tako kaže pravilo, mi smo naravno spremni sačekati i njihov stav. Ali bi donošenja zakona u aprilu nama tek recimo u maju omogućilo da radimo ove podzakonske akte. Evo ponavljam, samo sam rekao nekoliko njih. Možete li pretpostaviti koliko takvih ima uredbi kojima se reguliše, Rad, Park, Pokop, sve ono što je trenutno funkcija Kantona i svi podzakonski akti. Ima njih 130 čini mi se koje moramo ponoviti sve kada vi usvojite ovaj Zakon zbog same presude. I naravno da se to ne bi u budućnosti dešavalo odmah početi Zakon o lokalnoj samoupravi koji nikad više nas neće dovesti u ovu situaciju. Ne pada nam na pamet da danas usvojimo Zakon, objavimo u službenim novima, i za 15 dana se ponovo nađemo na Ustavnom sudu da neko ocjenjuje administrativni put donošenja zakona. Tu ćemo obazrivo, i evo zaključkom neka nas obaveže Skupština da se ne objavljuje u Službenim novinama sve dok se kompletna pravna procedura ne zadovolji. Tada objavimo i tada možemo raditi. Ali vjerujte da nam svaki dan na tom putu znači. Jedan dan a ne jedan mjesec ili dva koliko bi eventualno moglo još potrajati da se normalizuje nastavak ove funkcije.

Poslanik/zastupnik Slaviša Šućur:

Ma evo, ja također u potpuno razumijem problem i smatram da problem treba riješiti ali mislim da ovo nije put da dođemo do rješenja. Dakle, implementacija presude Ustavnog suda na način da uradimo sve isto ko što smo uradili prošli put, jer mi nemamo, mi zaista nemamo pred sobom ni mišljenje jedinica lokalne samouprave nas dovodi u vrlo nezahvalnu poziciju.

Mislim i evo premijer je dobro rekao, dajte sugestije. Mislim da ne bi smo smjeli napraviti grešku da uradimo ovo kako je zamišljeno. Ono što bi po meni trebalo uraditi, to je da se u tekstu zakona koji ovdje stoji, gdje su opisane djelatnosti, cijeli taj dio je dobar samo kod nadležnosti treba ugraditi odredbe iz Ustava i zakona o principima lokalne samouprave. Mi možemo prelaznim i završnim odredbama riješiti naš problem. Dat je rok Vladi FBiH da donese Zakon o lokalnoj samoupravi koji će precizno definisati raspodjelu nadležnosti između grada i opština. I koji će dati Vladi Kantona da u tom prelaznom periodu obavlja funkcije ili kantonu da obavlja te funkcije do pune implementacije presude. Način da presudu implementiramo, tako što ćemo ponoviti postupak koji Ustavni sud osporio kao neustavan po meni apsolutno ne dolazi u obzir. Ima drugi problem, to je vi kaže mišljenje koje nije ni obvezujuće. Ovdje se ne radi o tome. Ovdje se radi o prenosu nadležnosti. Dakle ne vrijedi tu saglasnost jedinica lokalne samouprave. To mora biti odluka Vijeća o prenosu nadležnosti koji pripadaju po Ustavu i zakonu o principu lokalne samouprave opštinama i gradu. Dakle, to ne može ni biti forma saglasnosti ne može biti neobavezna. To je prenos nadležnosti koji ustavom, zakonom federalnim koji uređuje ovu oblast date jedinicama lokalne samouprave. To je malo drugi problem i zbog toga mislim da je bolji ovaj put koji sam ja predložio. Dakle ovdje treba naznačiti da će to obavljati Grad i opštine, a u prelaznim i završnim odredbama do konačnog rješenja uspostavljanja funkcionalnog sistema i dati rok koji god vi predložite, pola godine, godinu, da će doći do toga da poslove nastavi obavljati Kanton. I mislim da onda radimo konzistentno implementaciju presude i rješavamo naš problem. Ako treba da se nađemo opet iduće sedmice po ovom pitanju, da pripremite nešto što će nas zaista izvući, ja sam naravno spreman i spreman da takvo rješenje podržim. Hvala.

Premijer Elmedin Konaković:

Moram reći prvo jednu konstataciju, mi od vas nismo dobili ni jedno slovo prijedloga da se drugačije koncipira ovaj tekst. Poslali smo vam u predviđenim rokovima Poslovníkom cijeli tekst. Imali ste pravo i amandmanski, imate i sada pravo amandmanski i ono što ja gledam potpuno drugačije od vas je valjda zbog pritiska koji mi ko Vlada osjetimo, vi vjerovatno manje u ovom sporijem ritmu u kom radi Skupština, je činjenica da smo potpuno paralizovani u segmentu komunalne privrede i svaki dan imamo ogromne pritiske zbog toga. Parcijalno posmatrate kolega Šućur. To nije prijedlog našeg rješenja. Ovo nije rješenje, ovo što smo mi dali. Mi nismo rekli da je ovo rješenje. Mi smo rekli da su Skupštine i sud je rekao sljedeće: nisu konsultovane niži nivoi lokalne zajednice, nisu konsultovani kod donošenja ovog zakona. Na apelaciju Grada iz 2009 to je presuda. Mi smo sada konsultovali nije to naravno dovoljno niti je ovo rješenje, to se potpuno slažemo, niti je rješenje to što vi govorite. Rješenje je naš Zakon o lokalnoj samoupravi koji imamo u nacrtu, koji već šaljemo lokalnim zajednicama narednih sedmice da ga gledaju, da u tom prednacrtu rješavamo mi sve, nama u ovom slučaju Federacija ne treba. Mi sve možemo sami ne želimo da to izbjegavamo, nego želimo da donesemo Zakon o lokalnoj samoupravi s jasnim nadležnostima. Ustav nam je propisao šta su čije. Tada nam treba saglasnost vijeća, tada nam treba saglasnost Skupštine, tada nam treba saglasnost gradskog vijeća, holdingu, o prenosu nadležnosti, o tome ko će raditi, o tome neke opštine možda neće, neke neće da imaju naš Park, to su mi rekli. Neke hoće da imaju svoje parkove koji šišaju travu. Niko ne problematizira VIK, Toplane, Sarajevogas, Gras i Rad. Pet ih je. Oni kažu to je funkcija ali i tu ćemo holding. To je ono što nas očekuje u naredna recimo tri mjeseca- svaki detalj, svako vijeće i svaki parlament. Ovo sada trenutno je pismena saglasnost da se neće pokrenuti procedura pred Ustavnim sudom. To imam od lokalnih zajednica. Da bi mogli za ova tri mjeseca, evo kasnimo mjesec dana s implementacijom. Nismo mogli raspisati. Danas se raspisuje računajući da ćemo stići taj ritam. Javni poziv međunarodni za detekciju stanja mreže u kantonu vodovodne. Jer ona traje 48 dana. Samo tender je otvoren 48 dana, nakon njega ide izbor izvođača. Moguće žalbe, možemo izgubiti cijelu građevinsku sezonu, da ove godine ne izađu aparati najsavremeniji za koje ste vi i mi

izdvojili 2 miliona KM. Dakle nama je tu svaki dan bitan. I ovo što je rekao Kojović i mi sve smo to mi izanalizirali i mi smo danas donijeli Zakon sami, mi smo predložili njegovu implementaciju. Nismo ga donijeli prije četiri dana, dali smo ga Skupštini na vrijeme, svi ste ga imali na vrijeme i njegov tekst je integralan jer se u drugim procedurama mora drugačije. Dakle ne možemo ponavljamo ga samo da bi živjeli narednih dva mjeseca. A onda sebi nametnuli još veću obavezu brže implementacije presude Ustavnog suda finalne, ne ove 15 ima presuda Ustavnog suda. Nije ova jedina u kojima smo mi povrijedili prava lokalne zajednice. I ja ne mislim da smo ih povrijedili nego smo se natovarili pravima lokalne zajednice. Ne zanima nikoga, Grad vidim hoće svoju turističku zajednicu a Grad je primarno nadležan za rješavanje pasa lutalica. Mislite li vi da mi ne bi smo to sa zadovoljstvom prepustili njima. Ali ako ne budemo danas imali ovaj Zakon mi u ponedjeljak ne možemo pitati Babića ni inspekciju da li su reagovali na ujed ovog djeteta u parku. To je ono što nas svakodnevno pritisne i to je ono što mi ne možemo sporo i naravno da ste vi u pravu. Ali ovo što ste predložili znači još dva mjeseca čekanja. Mi to ne možemo. Dakle, ne može drugačiji tekst od ovog, ne može saglasnost, mi smo očekivali da će opštinska vijeća, ja sam takvo pismo napisao da su saglasni da nastavi Kanton do donošenja zakona, ja predložio da bude kraći rok. Nisu se sastali, nije bila tema vijeća, nego su načelnici ko inokosni organi rekli hajd može to, mi ćemo, pa neće niko pokretati proceduru naredna tri mjeseca jer je to dovoljno nama da samo normalno nastavimo živjeti i raditi. U tom periodu, evo Nenadića, mi smo mjesec dana našeg tempa promijenili da bi mogli ove zakone implementirati dana na Skupštini. Iz njih pogledajte samo ovih primjera koliko ima, mi sutra ne možemo više ni po jednoj od ovih tačaka reagovati. Eto.

Predsjedateljica:

Pitanje je imala uvažena Segmedina Srna.

Poslanik/zastupnik Segmedina Srna Bajramović:

Zahvaljujem uvažena predsjedavajuća. Dobro jutro želim svima. Evo potpuno uvažavajući.

Predsjedateljica:

Srna molim vas, gospodin Pindžo je imao poslovničku intervenciju, oprostite.

Poslanik/zastupnik Segmedina Srna Bajramović:

Ima predanost svakako, hvala što se držite Poslovnika.

Poslanik/zastupnik Mirsad Pindžo:

Zahvaljujem uvažena predsjedavajuća. Pozdravljam sve prisutne u sali kao i one što nas gledaju putem malih ekrana. Ja imam poslovničku intervenciju. Mi danas raspravljamo o prijedlogu Vlade da uvrstimo ova dva zakona da ih razmatramo po hitnom postupku. Poslovnička intervencija se odnosi na to da smo mi ušli u raspravu o meritumu predloženih rješenja. Ja vas molim da se vratimo na Poslovnik, da se izjasnimo prihvatamo li prijedlog Vlade da se ova dva zakona raspravljaju po hitnom postupku, da utvrdimo dnevni red a da onda razgovaramo o predloženim rješenjima i o mogućim varijantama je li dobro nije li dobro. Što se nas tiče presuda Ustavnog suda je vrlo jasna, imamo pravni vakuum u kome nemamo zakona, za nas je prihvatljivo opredjeljenje Vlade da razgovaramo u hitno proceduri bez obzira što imamo drugačije stavove kada su u pitanju predložena rješenja koja ćemo iznijeti naravno kada dođemo na temu predloženih zakona. I zato vas molim da ovu raspravu prekinete i da idemo proceduralno na utvrđivanje dnevnog reda. Hvala vam lijepo.

Predsjedateljica:

Hvala vam gospodine Pindžo na sugestiji, naravno da ćemo se držati Poslovnika. Uvažena Segmedina Srna ako nije pitanja molim vas da završimo ovu raspravu.

Poslanik/zastupnik Segmedina Srna Bajramović:

Više je zapravo dilema nego li pitanje. Evo uvažavajući sve ove razloge koje je premijer naveo, zapravo se tiče procedure po kojoj je danas usvajamo ovaj Zakon. Ne raspravljamo o sadržaju njegovom. Dakle presuda Ustavnog suda direktno se odnosi na obavezu izmjene ovih zakona i to je svima jasno. Međutim, zakoni su na dnevnom redu Skupštine 30. a isti su općinama poslani 11. ja nisam sigurna da su oni bili u poslovničkoj mogućnosti da sve odrade po rokovima koji su predviđeni i da se čitav proces bojim se vodi isključivo formalno bez da predviđeno vrijeme uključuje suštinsku analizu. Bez obzira, ponavljam to opet, što je u čitavom procesu evidentna dobra namjera predlagača, nadam se da kratki rokovi nisu u namjeri da se onemogućiti kvalitetna uključenost lokalnih zajednica te da isti postanu naknadno novi predmet spora između odgovornih da se implementiraju presude Ustavnog suda, odnosno ova presuda Ustavnog suda. Nadam se da postoji suglasnost zaista se nadam svih zainteresovanih da se kompletan proceduralni postupak provede na ovaj način i u ovim rokovima, i da nećemo svjedočiti novih sporovima. Jer mi ni jednu tu saglasnost zapravo nemamo u prilogu ovih materijala koje smo dobili. Toliko, nadam se da vam nisam uzela puno vremena. Zahvaljujem.

Poslanik/zastupnik Muhamed Kozadra:

Zahvaljujem pozdravljam sve prisutne. Neću ponavljati ono što je gospodin Pindžo rekao. Htio sam to prevashodno reći. Ali ovdje postavljam pitanje za termine konsultacije, mišljenje stav, saglasnost, koje je to od ova četiri termina obavezujući da bi ovo sve što je premijer ovdje rekao proveli ovu proceduru. I postavljam pitanje šta je sa provođenjem zakona u periodu datom za evo provođenje procedure? Ko ga primjenjuje, da li ga primjenjujemo ili ne primjenjujemo? Primjenjujemo, ga naravno prelazne i završne odredbe uvijek kažu dok se ne donese mora se primjenjivati, ne može život stati ovdje. A ako su općine koje jesu ovo što gospođa Segmedina rekla, dobile prije mjesec dana i ubrzana procedura, znači oni su dijelom, nisu svi, pokrenuti ovu proceduru i ne reaguju u tom vremenu šta sad treba da radimo? Ja zaista mislim da treba da podržimo ovo i da krenemo i da raspravljamo o tačci dnevnog reda koja jeste.

Poslanik/zastupnik Predrag Kojović:

Zahvaljujem predsjedavajuća. Upravo zato mislim da iako razgovaramo o prethodnom pitanju na neki način izjašnjavanje o hitnosti je izjašnjavanje o ovom prijedlogu Vlade - shvatajući poziciju u kojoj se Vlada nalazi, prihvaćajući argumente kolege Šućura, međutim mislim da možemo pronaći rješenje ja bih zamolio za pola sata jednu pauzu. Da šefovi klubova sjednu molio bih da ministar Nenadić također bude prisutan tu. Mislim da jednom malom intervencijom možemo naći rješenje koje će nam omogućiti da ovo što izglasamo danas bude i funkcionalno, a da ne bude kršenje ustava i zakona.

Premijer Elmedin Konaković:

Vi odlučujete o tome.

Predsjedateljica:

Da li se ostali šefovi klubova slažu s tim? Ali ne pola sata 15 minuta mislim da vam je dovoljno. Pola sata ne možete dobiti. 15 minuta pauza.

Poslanik/zastupnik Predrag Kojović:

Predsjedavajuća, kao što Poslovnik kaže, ja kao šef Kluba mogao sam reći hoću pauzu i morate mi je dati. Znači nemojte govoriti na šta ja imam pravo. Ja imam pravo na pola sata pauze može i 15 minuta ako ljudi smatraju da se možemo dogovoriti za to vrijeme.

Predsjedateljica:

Dobro. Ja znam da imate pola sata ali mislim da se to može riješiti. U redu.

NASTAVAK NAKON PAUZE

Predsjedateljica:

Obzirom da imamo kvorum, svi oni koji nisu došli na vrijeme uvrstiti ću ih u posebnu kategoriju, vrlo ozbiljno. Znači, kategorija sankcionisanja. Molim vas gospodine Kojoviću možete li obrazložiti vašu pauzu jer imam spoznaju da se došlo do jednog finog konstruktivnog rješenja.

Poslanik/zastupnik Predrag Kojović.

Mislim da upravo, vi ste rekli, imali smo jednu kratku pauzu. Mislim da smo našli jedno rješenje koje je prihvatljivo. Znači, shvatajući hitnost, neophodnosti reakcije Vlade, a ne želeći da radimo isto što smo uradili i što sada moramo raditi, postigli smo jedan dogovor, nadam se da će premijer ga izložiti sada.

Predsjedateljica:

Hvala lijepo. Evo izvolite premijeru.

Premijer Elmedin Konaković:

Samo par rečenica, kad se male ruke slože sve se može, sve se može. Terminološki smo imali samo malo drugačiji pristup. Prijedlog kolege Šućura koji će formulisati kao amandman. Vlada će održati sjednicu odmah nakon što se bude razmatrala tačka i načelno smo se dogovorili da se taj amandman prihvati i da bude dio rješenja. Da je ovo temporalnog karaktera Zakon do donošenja ostalih zakona koji regulišu kompletnu oblast nadležnosti lokalne zajednice i Kantona. Hvala.

Predsjedateljica:

Obzirom da je naš uvaženi premijer obrazložio razloge donošenja ovih zakona po hitnom postupku, ja predlažem da odmah pređemo na glasanje po ova dva zakona koja je obrazložio. Molim vas da se izjasnimo o prvom ovom zakonu, zbog stenograma ću čitati.

Molim zastupnike da pristupe izjašnjavanju da se Prijedlog zakona o komunalnim djelatnostima donese po hitnom postupku.

Temeljem glasanja dobili smo 28 Za, protiv ništa, suzdržan ništa.

Konstatujem da je Skupština usvojila Prijedlog da se Zakon o komunalnim djelatnostima donese po hitnom postupku.

A sada moram zbog stenograma također da pročitam.

Prijedlog zakona o komunalnoj čistoći.

Tko je za, suzdržan, protiv? 28 ZA, protiv ništa i suzdržano ništa.

Konstatujem da je Skupština usvojila Prijedlog da se Zakon o komunalnoj čistoći donese po hitnom postupku.

Imamo također jedan prijedlog o izmjenama i dopunama Zakona o taksi prevozu, pa molim predlagača da također obrazloži. Da li ima potrebe ili ne da stavimo na glasanje? Nema.

Ko je za? Protiv? Suzdržan?

26 ZA, protiv ništa i suzdržano 2.

Konstatujem da je Skupština usvojila Prijedlog da se Zakon o izmjenama i dopunama Zakona o taksi prevozu donesu po hitnom postupku.

Prelazimo na utvrđivanje Dnevnog reda današnje sjednice.

Na osnovu naprijed navedenog, Prijedlog dnevnog reda današnje, 13. Radne sjednice, a on je sljedeći:

1. Poslanička/zastupnička pitanja, inicijative i odgovori;
2. Prijedlog zakona o komunalnim djelatnostima- hitni postupak;
3. Prijedlog zakona o komunalnoj čistoći-hitni postupak;
4. Prijedlog zakona o izmjenama i dopunama Zakona o taksi prijevozu u Kantonu Sarajevo - hitni postupak;
5. Prijedlog odluke o davanju saglasnosti na Finansijski plan Zavoda zdravstvenog osiguranja Kantona Sarajevo za 2016. godinu i odluku o izvršavanju Finansijskog plana Zavoda zdravstvenog osiguranja Kantona Sarajevo za 2016. godinu;
6. Prijedlog odluke o davanju saglasnosti na Program rada Zavoda zdravstvenog osiguranja Kantona Sarajevo za 2016. godinu;
7. Prijedlog odluke o usvajanju "Bilansa energetske potrebe Kantona Sarajevo za 2016. godinu".
8. Prijedlog odluke o potvrđivanju Programa obilježavanja Dana Kantona Sarajevo od 02. do 09.05.2016. godine;
9. Prijedlog odluke o prihvatanju zaduženja Kantona Sarajevo po Ugovoru broj 1. o Amandmanu na Ugovor o zajmu potpisan 27. oktobra 2011. godine između Bosne i Hercegovine i Evropske banke za obnovu i razvoj (EBRD), za Projekat gradskih saobraćajnica;

(Molim vas gdine Mekiću, vratite se na svoje mjesto i nemojte remetiti rad Skupštine. Pripremite se za sjednicu gdine Mekiću a ne razgovarati u toku i nećete me zbuniti sigurno.)

10. Prijedlog odluke o potvrđivanju imenovanja predsjednika i članova Skupštine KJKP „Gradski saobraćaj“ d.o.o. Sarajevo;
11. Prijedlog odluke o davanju saglasnosti na Program rada i Finansijski plan Fonda Kantona Sarajevo za izgradnju i očuvanje grobalja šehida i poginulih boraca, memorijalnih centara i spomen-obilježja žrtava genocida za period 01.01. do 31.12.2016. godinu;
12. Prijedlog odluke o davanju saglasnosti na Program rada Fonda Kantona Sarajevo za izgradnju stanova za članove porodica šehida i poginulih boraca, ratne vojne invalide, demobilisane borce i prognane osobe za 2016.godinu;
13. Prijedlog odluke o davanju saglasnosti na Finansijski plan prihoda i rashoda za 2016. godinu Fonda Kantona Sarajevo za izgradnju stanova;

14.
 - a) Prijedlog odluke o izmjeni naziva ulica odnosno preimenovanju ulica na području općine Novi grad Sarajevo- MZ Dolac;
 - b) Prijedlog odluke o izmjeni naziva ulica odnosno preimenovanju ulica na području općine Novi grad Sarajevo- MZ Brijesće;
15. Izvještaj o radu Kantonalne uprave Civilne zaštite za 2015.godinu;
16. Izvještaji o radu i finansijskom poslovanju Javnih ustanova za 2015.godinu:
 - a) Narodno pozorište Sarajevo ;
 - b) Pozorište mladih ;
 - c) Sarajevski ratni teatar - SARTR ;
 - d) MES - Međunarodni teatarski festival - Scena MESS ;
 - e) Muzej Sarajeva ;
 - f) Kantonalni zavod za zaštitu kulturno-historijskog i prirodnog naslijeđa, Sarajevo ;
 - g) Historijski arhiv Sarajevo ;
 - h) Biblioteka Sarajeva ;
 - i) Centar za kulturu Kantona Sarajevo;

MOLIM ZASTUPNIKE DA SE IZJASNE O PREDLOŽENOM DNEVNOM REDU.

Temeljem glasanja dobili smo 29 Za, protiv ništa i suzdržano ništa.

KONSTATUJEM DA SMO USVOJILI DNEVNI RED 13. RADNE SJEDNICE SKUPŠTINE KANTONA SARAJEVO.

- 0 -

Uz poziv za sjednicu, svakako ste dobili vaš materijal:

- Izvještaj o radu Kantonalnog suda u Sarajevu i Izvještaj o radu Općinskog suda u Sarajevu, za 2015. godinu

Prije nego što predemo na realizaciju prve tačke dnevnog reda ja bih vas molila zbog stenograma i zbog svega onoga što slijedi da usvojimo Zapisnike sa Stenogramima sa 11. i 12. radne sjednice Skupštine Kantona Sarajevo.

Molim vas da se izjasnite o Zapisniku sa 11. Radne sjednice Skupštine Kantona Sarajevo .

ZA je 29, PROTIV ništa i SUZDRŽANO ništa.

Konstatujem da je Skupština potvrdila Zapisnik sa 11. Radne sjednice Skupštine Kantona Sarajevo održane 01.02. i 10.02. 2016.godine.

I formalistički još da obavimo glasanje za Zapisnik sa 12. Radne sjednice Skupštine Kantona Sarajevo .

Ko je za? Protiv? Suzdržan? U redu.

Konstatujem da smo usvojili Zapisnike sa 11. i 12 Radne sjednice Skupština Kantona Sarajevo koja je održana 29.02.2016.godine.

AD – 1.

POSLANIČKA/ ZASTUPNIČKA PITANJA I INICIJATIVE

Predsjedateljica:

Samo trenutak jedan.

Prelazimo na realizaciju prve tačke dnevnog reda. Sada je 11 sati i 18 minuta. Imamo sat vremena za inicijative i poslanička/zastupnička pitanja. Ovaj put ćemo krenuti od početka ali bih ja voljela ako mi nećete zamjeriti da iskoristim svoje pravo pa da pročitam jednu inicijativu. Ja mislim da ćete me u toku ovoga izlaganja shvatiti zašto sam insistirala da budem prava.

To je inicijativa, pa ću je pročitati a vi ćete shvatiti poslije.

U nadi da ukažu na vrlo ozbiljan problem nefunkcionalne fiksulturne sale Vijeće roditelja i učenika zajedno sa direktoricom OŠ Džemaludin Čaušević su me pozvali da ih posjetim i da pronađemo sistemsko rješenje za njihov problem. Ovoj djeci koje ću zamoliti da ustanu, je potrebno omogućiti adekvatne uvjete za realizaciju nastave iz tjelesnog i zdravstvenog odgoja a i normalan psiho-fizički razvoj. Ova škola je stara 54 godine ali nakon rata nikada nije renovirana kao što je slučaj sa ostalim školama, i izgleda kao da je stvarno iz kamenog doba. Krov je od azbestnih ploča, prokišnjava, zidovi popucali, stolarija dotrajala. I pored ovako teških uvjeta ova djeca odnosno ovi učenici postižu nevjerovatne sportske rezultate a jedina im želja da san o fiskulturnoj Sali postane njihova java. Zato vas molim uvaženi ministri, i zastupnici da se odmah izjasnimo po ovoj inicijativi, te je uputimo prema Vladi Kantona i resornom Ministarstvu. A ona glasi:

Traži se od Vlade Kantona Sarajevo i Ministarstva za obrazovanje nauku i mlade Kantona Sarajevo da se u budžetu planiraju sredstva za adaptaciju fiskulturne sale OŠ Džemaludin Čaušević. Sada ću samo nešto da uradim. Također da mi ne zamjerite, ovo srce koje su ova djeca uputila meni, ovo srce je za cijelu Skupštinu i za našeg ministra da pročita 440 djece ove škole vapi i moli da im se pomogne. Hvala na razumijevanju. Ministre ja ću vam ovo uručiti.

O ovoj inicijativi ćemo se izjasniti kasnije. Ja vjerujem da ste pogledali ovu djecu njihove medalje su teže nego što oni imaju kila pa ja vjerujem da ćete to sve uvažiti. Hvala vam što ste došli i bili prisutni.

Ja također imam jednu inicijativu koju upućujem u više ministarstava a ona se tiče korištenja nargile kod maloljetnih osoba. Došlo je do poražavajućih podataka da više maloljetnika pa već od 12 godina skoro svakodnevno konzumira nargilu a pri tome nisu informirani o brojnim štetnim posljedicama konzumiranja iste. Obrazloženje za ovu inicijativu je došlo isključivo zbog konzumiranja nargile koja se javlja u čestoj pojavi, a ona izaziva glavobolje, manjak koncentracije, veliku bezvoljnost a to se odražava na njihove rezultate u školi na fakultetu. Mladi postaju vrlo napeti što nerijetko prelazi i u agresivnost a zabilježene su i ozbiljne posljedice depresije. Zato molim odgovorne institucije, vlasti, da ovaj problem smatraju visoko ozbiljnim te da se poduzmu mjere kako bi javnost bila prvenstveno educirana o svemu ovome, a plašim se da će ovaj problem izmaći kontroli, ako ne bi smo malo više obratili pažnje na to. Zato treba pojačati inspekcijski nadzor i svakako od strane Ministarstva unutarnjih poslova, ministarstva zdravlja i ministarstva obrazovanja nauke i mladih. Eto toliko. Hvala lijepo.

A sada bi smo prešli sa inicijativama po ovom rasporedu i hvala vam za razumijevanje.

Poslanik/zastupnik Mario Vukasović:

Zahvaljujem predsjedavajuća. Prije svega iskoristio bih priliku da pozdravim sve kolege ministre, zastupnike, prisutne goste i gledaoce kraj malih ekrana. Moja inicijativa današnja se tiče uvrštavanja i usvajanja Finansijskog izvještaja JU Studentski centar Sarajevo za 2014 i 2015 godinu na iduću sjednicu Skupština Kantona Sarajevo i zamolio bih da se kolege zastupnici poslije izjasne o ovoj inicijativi. Ovo je već peti mjesec u nizu kako se bavim problematikom Studentskog centra te pitanje potencijalnog kriminala u toj ustanovi. Neke stvari se jesu pokrenule, Tužilaštvo se jeste uključilo u kompletnu priču, no ono što svakako zabrinjavanja jeste potpuni izostanak bilo kakve reakcije Vlade Kantona Sarajevo. Vlada Kantona Sarajevo je prije tri mjeseca imenovala vd UO i NO u ovoj ustanovi i taj UO i NO za ova tri mjeseca nije učinio apsolutno ništa. Mandat im je istekao nije imenovan novi direktor, nije nam dostavljen Finansijski izvještaj a podsjećamo da još uvijek nismo dobili ni Finansijski izvještaj za 2014 godinu. U međuvremenu uposlenici Studentskog centra primoravaju se da potpišu podršku direktoru pod prijetnjom otkaza. Svakodnevno trpe mobing na poslu, poziva ih se na informativne razgovore, a studente koji su se usudili usprotiviti direktoru Kadriću odstranili su iz studentskih domova. Ovim putem podnosim inicijativu da se na idućoj sjednici Skupština Kantona Sarajevo uvrsti tačka dnevnog reda „Usvajanje finansijskih izvještaja i apelujem da odmah na idućoj sjednici Vlada imenuje novi vd UO i NO ili da pokrene proceduru raspisivanja konkursa i imenovanja redovnog UO i NO. direktor Kadrić već 16 godina na toj poziciji. Direktor Kadrić je 16 godina u minusu i ukupan dug ove ustanove za vrijeme njegovog mandata je narastao na između 6 i 7 miliona KM. Ako ovo nije dovoljan razlog za smjenu ja ne znam stvarno šta jeste. Dok domovi propadaju direktor gradi teniske terene u iznosu od skoro 200 000 KM a da za njih nema građevinsku i urbanističku suglasnost, te nema dozvolu Vlade Kantona Sarajevo koju je morao pribaviti pri ovoj investiciji. Ovdje se radi o tipičnom primjeru ne domaćinskom upravljanju jednom ustanovom. Vrš se gotovinske isplate sa blagajne studentskog servisa što je striktno zabranjeno. I ovdje se radi o iznosima od više stotina hiljada KM koje su isplaćene s ove blagajne. Zamolio bih pismeni odgovor na tražena pitanja i inicijativu ali bih i isto tako zamolio premijera Konakovića da nas izvijesti usmeno šta Vlada namjerava uraditi po ovom pitanju te kakav je njegov stav po ovom pitanju. S obzirom da nam nije dostavljeno prošli put ponovo tražim da nam se dostavi spisak imena i prezimena svih studenata koji su radili ili rade u Studentskom centru a koji su prijavljeni preko studentskog servisa. Također molim da nam se dostavi osnivački akt servisa, te ovaj put molim Vladu Kantona Sarajevo da oni to učine i prosljede. Hvala.

Poslanik/zastupnik Slaviša Šućur:

Hvala. Moje pitanje je za ministricu zdravstva u Kantonu Sarajevo. Da li postoji, i ako postoji, ko je izdao Instrukciju o ne davanju uputnica za liječe u Opštoj bolnici u Sarajevu. Obrazloženje:

Kada je njegovateljica moje majke otišla u Dom zdravlja da traži uputnicu za moju majku da ide na liječenje u Opštu bolnicu rečeno je da postoji Instrukcija da se ne daju uputnice za Opštu bolnicu. Na moje insistiranje da dobijem tu instrukciju u pisanom obliku ona je na kraju dobila tu uputnicu. Dakle kada je rečeno na čiju se majku odnosi i da ja insistiram da mi se pismeno dostavi takva instrukcija očito da se nešto promijenilo. Mislim da se radi o jednoj vrlo opasnoj i ružnoj pojavi da neko pokušava naokolo nekim drugim putevima da pokaže kako Opšta bolnica ne treba, kako nema nikakvog smisla i to radi preko leđa pacijenata što mislim da je jako loše. Dakle, zaista želim da ministrica mi odgovori da li postoji ili ne postoji, ako ne da se to jasno i javno kaže da ne postoji ta vrsta zabrane. Čuo sam od drugih ljudi također da su imali slične iskustva po ovom pitanju. Hvala.

Poslanik/zastupnik Segmedina Srna Bajramović:

Zahvaljujem još jednom. Najprije s obzirom da nisam zadovoljna odgovorom na pitanje upućeno MUP-u Kantona Sarajevo a vezano za veliki broj inozemnih kaznenih listova, molim da se isto pitanje kao i odgovor MUP-a proslijedili Ministarstvu pravde i Ministarstvu sigurnosti BiH kojima upućujem i dodatno pitanje. Kako se postupa kakva je praksa, i kakve su obaveze policijskih agencija u BiH kada su u pitanju inozemni kazneni listovi za osobe koje su rođene u BiH, konkretno na području jednog od Kantona u FBiH? S obzirom da sam iz odgovora MUP- a Kantona Sarajevo dobila informaciju da je Ministarstvo sigurnosti nadležno za prevođenje određenih inozemnih kaznenih listova, molim odgovor istog ministarstva na pitanje Koliko su dosada dobili zahtjeva od strane konkretno MUP-a Kantona Sarajevo i za koliko osoba, odnosno kaznenih listova? Uz podsjećanje na obavezu preuzetu u vrijeme liberalizacije viznog režima kada je jedan od uvjeta bilo i uvođenje elektronske baze podataka, među kojima je i ova, a za čiju namjenu je dodijeljena i značajna elektronska oprema od Direkcije za koordinaciju policijskih tijela tražim odgovor je li MUP Kantona Sarajevo ispunio uvjete u tom smislu, tj je li baza inozemnih kaznenih listova stavljena u rad u punom kapacitetu?

I još jedno pitanje imam. Tražim usmeni odgovor od ministra privrede i i ministra kulture i sporta zašto je direktor ZOI'84 Midhat Hubijar streljište u Zetri zatvorio za potrebe streljačkih klubova koji se takmiče po olimpijskom programu i pravilima Svjetske streljačke federacije uprkos Protokolu o korištenju koji je potpisan u januaru. Podsjetit ću vas na poštivanje memoranduma o preuzimanju Olimpijske dvorane Zetra koji je potpisan između MOK-a, OK BiH, Vijeća ministara i Kantona Sarajevo a koji definiše obavezu da vrhunski sportisti i klubovi koriste Zetru pod specijalnim uslovima. Da li treba dozvoliti jednom pojedincu da narušava ugled našeg Kantona ne poštivajući i ne pridržavajući se čak ni Međunarodnog sporazuma. Dalje, molim odgovor na pitanje o dinamici provedbe Sanacionog plana koji je definisao obavezu izmirenja doprinosa do šestog mjeseca 2014, a danas imamo situaciju da nisu plaćeni od 2013. Radnici su na minimalcu koji im se u slučaju bolovanja umanjuje za 20%. O izradi sistematizacije također tražim informaciju iz koje je potpuno izolovan Sindikat, stari radnici nosioci prvenstava nekad, sada su marginalizirani, ne radi sistem vatro dojave u Zetri i čitav niz drugih alarmantnih podataka koji dovode u pitanje funkcionisanje ZOI 84. I na kraju, od vas tražim da naložite direktoru da streljište u Zetri hitno stavi na raspolaganje vrhunskom sportu, kako djeci tako i vrhunskim takmičarima. A problema koji ima na relaciji Ministarstvo ZOI 84 treba da se rješavaju ali ne preko sportista. Evo u vremenu sam, zahvaljujem.

Poslanik/zastupnik Rasim Smajić:

Zahvaljujem predsjedateljice. Pozdravljam sve prisutne u Sali kao i gledaoce pored malih ekrana. Moje zastupničko pitanje može se formulisati kao i informacija a odnosi se na bivše Ministarstvo za stambena pitanja. Naime, interesuje me Odluka o dodjeli stanova mladima pod povoljnijim uslovima. Znači Odluka je donešena u prošlom mandatu. Jesu li stanovi dodijeljeni , pod kojim uslovima i da li se isplaćuju ti stanovi? Molim da mi se dostavi odluka i spisak osoba kome su dodijeljeni stanovi pod povoljnijim uslovima. Molim odgovor u pisanoj formi. Hvala.

Poslanik/zastupnik Dževad Rado:

Hvala lijepo. Pozdravljam vas, sve prisutne u Sali i one koji prate današnju sjednicu. Ja ću postaviti jedno zastupničko pitanje ministarstvu za rad socijalnu politiku, raseljena i izbjegla lica Kantona Sarajevo. Kada se očekuje završetak zgrade na Šipu za smještaj interno raseljenih lica sa područja Općine Centar? I zašto zgrada čija izgradnja za ove svrhe započeta 2011 godine još nije završena?

Obrazloženje:

Grupa građana sa statusom interno raseljenih osoba na području Općine Centar, njih 11, na čelu sa gđinom Saović Mehmedom obratila se s molbom da postavim ova pitanja u cilju konačnog rješavanja njihovog stambenog problema. Izgradnja zgrade na lokaciji Šip kod džamije 2011 putem izvođača radova započelo je Ministarstvo za rad, raseljena i izbjegla lica u Kantonu Sarajevo. Zgrada je imala namjenu za smještaj interno raseljenih lica sa područja Općine Centar i trebala je brojati ukupno 24 stana. Podignuta su dva sprata zgrade a sa daljnjom izgradnjom stalo se 2013 godine i do danas se gradnja nije nastavila. I sada da ne čitam dalje, interesuje me kada i na koji način će ovaj problem biti riješen?

Imam jednu sada inicijativu. Upravo zbog vremena sam skratio nisam čitao do kraja. Pokrećem inicijativu za izmjenu člana 17 tačka 4 Zakona o porezu na promet nepokretnosti i prava Kantona Sarajevo službene novine 23/5, 26/6 i 41/08. poreska oslobođanja iz člana 17 tačka 4 navedenog Zakona između ostalog propisuje da se za boračku populaciju uslov za oslobođanje plaćanja poreza kada prvi put i jedini put rješavaju stambeno pitanje neprekidan boravak u OS 24 mjeseca za vrijeme agresije, tj u periodu od 92 zaključno sa 31.12.1995 godine.

Obrazloženje: ovaj isti Zakon u nekim kantonima je povoljniji za borce, pa tako ukazujem na primjer u ZDK, gdje njihov Zakon propisuje da je za poreska oslobođanja za boračku populaciju potreban kraći boravak u OS neprekidno 12 mjeseci u periodu 1992 do 31.12.1995 godina. Hvala vam lijepo.

Poslanik/zastupnik Pleho Haris:

Zahvaljujem predsjedavajuća. Prije svega želim sve srdačno da pozdravim, poselamim, kao i građane pored malih ekrana. Ja danas nemam poslaničkog pitanja ali imam potrebu da pročitam jednu podsjetnicu ili zahvalnicu koja glasi:

Na današnji dan 30.03.1992 godine otvorena je prva kuhinja u Starom Gradu koja je osnovana radi izbjeglica i socijalno ugroženih građana koja je prerasla u jednu veliku humanu instituciju koja i danas hrani socijalno ugrožene i bolesne građane Kantona Sarajevo. Naime, na današnji dan, 1992 godine gđa Zilha Šeta poznatija kao tetka Zilha skuhala prvih 180 obroka i danas, nakon 24 godine ova humana institucija radi u punom kapacitetu. Danas tetka Zilha sa svojim saradnicima dnevno skuha 1024 obroka i podijeli 240 paketa u toku mjeseca pretežno demobilisanim borcima. U ime Kluba BOSS Nermin Bjelak želim da čestitam 24 godine postojanja i rada ove humane organizacije i da se zahvalimo tetki Zilhi i njenim saradnicima na dugogodišnjem radu i pomoći gradu i građanima Kantona Sarajevo. Također se zahvaljujemo svim donatorima kao i Vladi Kantona Sarajevo po svim opštinama koje su pomagale rad ove velike humanitarne institucije. Nadam se da ćemo u budućnosti još više pomagati i imati razumijevanja za ovakve humanitarne organizacije. Hvala lijepo.

Predsjedateljica:

Hvala lijepo gospodine Pleho i hvala što ste nas podsjetili na ovo i mi se pridružujemo također ovoj vašoj podsjetnici.

Poslanik/zastupnik Mersiha Mehmedagić:

Zahvaljujem uvažena predsjedavajuća. Pozdravljam sve prisutne kao i građane Kantona Sarajevo koji prate današnje zasjedanje. Ja za danas imam zastupničko pitanje koje upućujem Vladi Kantona Sarajevo i Ministarstvu za boračka pitanja, a koje glasi: Molim Ministarstvo za boračka pitanja da mi odgovori koje aktivnosti je poduzelo ili planira poduzeti kako bi se sistemski riješio problem zapošljavanja djece šehida, poginulih, umrlih i nestalih boraca, RVI, dobitnika ratnih priznanja i odlikovanja, ratnih vojnih zarobljenika i demobilisanih boraca. Koji su efekti dosadašnjih aktivnosti te koliko ima nezaposlene djece, gore navedenih kategorija po općinama u Kantonu Sarajevo. Obrazloženje je sljedeće: porodice navedenih

kategorija se često javljaju sa pritužbama da se prilikom zapošljavanja ne poštuje Zakon o dopunskim pravima boraca Kantona Sarajevo. S obzirom da se radi o djelu lica zaslužnih u odbrambeno oslobodilačkom ratu koja pri tome pripadaju i socijalno ranjivijoj kategoriji društva, smatram da Vlade i resorno Ministarstvo trebaju sačiniti strategiju zapošljavanja ovih kategorija sa određenom dinamikom a na osnovu tačnih podataka o broju nezaposlenih po općinama, kako bi se kroz programe zapošljavanja osigurala dosljedna primjena člana 23 navedenog zakona. Zahvaljujem. I molim pismeni odgovor svakako.

Poslanik/zastupnik Amel Mekić:

Hvala vam predsjedavajuća. Pozdravljam sve prisutne i naravno gledaoce ispred TV ekrana. Ovim putem pokrećem inicijativu da se u navedenom prijedlogu otvori pozicija za podršku povećanja nataliteta u Kantonu Sarajevo što bi se najviše odnosilo na finansiranje postupka vanjske oplodnje ženama. U nekim kantonima su takve procedure već zakonski uređene. Naime, suočeni smo sa činjenicom da se u cijeloj BIH, pa i Kantonu Sarajevo dolazi do alarmantnog pada nataliteta što se osjeti po znatno manjem broju upisane djece u osnovne i srednje škole. Ove godine u osnovnim školama ima manje 430 djece, otprilike jedna osnovna škola. Prema zvaničnim statistikama imamo zabrinjavajuće podatke da se u BIH godišnje rode 83 bebe na 10.000 stanovnika, te prema natalitetu BIH zauzima posljednje mjesto u regionu. Također bih odmah postavio pitanje uvaženoj ministrici, gđi Zlhi Ademaj da mi odgovori sa kolikim bi se sredstvima moglo raspolagati u rebalansu?

Za premijera, gđina Dinu Konakovića i ministru obrazovanja gđina Elvira Kazazovića da uzmu u razmatranje i da počnu pripremati sredstva za izgradnju fiskulturne sale Srednje zubotehničke škole. Ako treba obrazloženje ja sam tu. I kao predsjednik Komisije za kulturu i sport tražim hitan sastanak i odgovor direktora, ministra, i Vlade u vezi KJP ZOI 84, Olimpijski centar Sarajevo u kojoj se sve više vrši redukcija korištenja dvorana vrhunskom sportu, od hokeja, streljaštva također na Bjelašnici je bilo klubovima otežan rad i naravno da se pozove sindikat. Toliko od mene. Hvala.

Poslanik/zastupnik Zvonko Marić:

Zahvaljujem predsjedavajuća. Pozdravljam sve srdačno, predsjedništvo, premijera i uvažene članove Vlade, kolege zastupnike i uvijek posebno pozdrav za naše gledatelje koji nas prate pored malih TV ekrana. Prije svega samo da se osvrnem na odgovore iz ranijih ciklusa postavljenih pitanja posebice se to odnosi na ministra privrede. Ja mislim da je ono parodija od odgovora na zastupnička pitanja i molio bih da se to uozbilji po ko zna koji put. Ja sam jasno postavio pitanje ko je i koliko dobio poticaja poimence brojem itd. poljoprivrednog poticaja i stočnih grla. Ni jedne cifre nema nego preporučuje da ja ako imam neka saznanja da dostavim tamo. Pa ne pripadam ja istražnim organima i ne želim to da radim. Ja sam tražio jasno i prema tome da mi se odgovara. Siguran sam da je prof Šabić profesor da bi oborio studenta ukoliko bi mu odgovorio na onakav način na koji je meni on odgovorio. Druga stvar, također, kod odgovora, ja sam postavio pitanje za ustanovu Djeca Sarajeva, međutim vd direktor sadašnji, na takav način prostački je odgovorila da ću ja odgovoriti da ne bude da ja imam prednost javno da joj odgovaram ovdje, ali te stupidnosti koje sam pročitao u tom odgovoru govore jasno o njoj. I ja ću joj odgovoriti i pojasniti da je to sve pod mentorstvom upitnog lidera, upitnog sindikata a iz tih upitnosti proističe i njeno imenovanje pa je i ona samim tim upitna, a iz tih upitnosti proističu još neke druge upitnosti o kojima ja ne želim ovdje da odgovorim. Dakle, odgovorit ću joj. Ona je meni poslala jelovnik. Ja sam postavio zašto mlijeka nemaju djeca devet mjeseci. Kao da je za bildere. Ja sam mislio da tu djecu dopinguje dotična direktorica. A sada da se vratim na pitanje. Prije svega moje pitanje odnosi se na jedan slučaj jednog borca logoraša koji živi u Vogošći. Ne bih želio da mu spominjem ime zato što ja sam dostavio predmet i nadzoru za inspekciju i njegove nalaze PTSP, žena šizofreničar, djeca su siromašna u bijedi žive. Obratio sam se na jedan fin način da ne bi

ovako medijski, inspektorici Čaušević i čini mi se Selmanović. One su mi objašnjavale da je razlog za tu septičku jamu koju im je čovjek, ustvari nije to septička jama, nego septički sadržaj koji u njihovo dvorište maltene dolazi ili pred kućom. U toj svoj bijedi, dakle i nisu mogući efikasni, čak i gđa Čaušević je potpisala izvršno rješenje 2012 godine. 2012 godine, dakle molim vas samo da završim ovo. Ili nije u stanju da ga izvrši. To je sramota. Šta će onda. Kaže opstruira gospodin koji je inspektor pod zaštitom pod mentorstvom načelnika općine Vogošća itd. Pa ne treba nam inspekcija onda. To je sramota i za nas, za izvršne organe, za Vladu, za resorno Ministarstvo, za skupštinu. Ako nije u stanju. Šta treba čovjek, zbog septičke jame da se žali sudu u Strazburu. Sramno. I prema tome želim da mi se to odgovori prije nego što se desi bilo kakva tragedija i onda da ne bude da se nije znalo o čemu je riječ. Hvala.

Poslanik/zastupnik Muhamed Kozadra:

Zahvaljujem. Želim pokrenuti inicijativu za obezbjeđenje dodatnih sredstava u budžetu Kantona Sarajevo za razvoj poticajne industrijske proizvodnje. Kao što vam je poznato u Kantonu Sarajevo postoji stare industrijske zone i novoformirane industrijske zone za koje lokalna zajednica nema dovoljno sredstava da obezbijedi i da u punom kapacitetu ih stavi u funkciju. U cilju poticaja novog upošljavanja, prevashodno u proizvodnji, predlažem da se izdvoje dodatna sredstva u rebalansu za 2016 i u budućim budžetima narednih godina. Poticaji bi se odnosili na sljedeće: prilikom izgradnje proizvodnih objekata i novog upošljavanja da investitori budu oslobođeni plaćanja rente i uređenja građevinskog zemljišta. Da općine donesu svoje propise u kojima će definirati sve elemente za ostvarivanje ovog prava a ono bi se odnosilo na namjenu gradnje, mjesto gradnje, vrijeme potrebno za izgradnju, broj novo uposlenih, ograničenja u mogućoj prodaji izgrađenog objekta i promjeni namjene kao i garancije za poštivanje korištenja ovog prava. Navedena sredstva prevashodno bi potrebno bilo usmjeriti u vangradske općine koje imaju manje budžete ali se na njihovom području i planski lociraju i proizvodni programi, što je logično da centralni dijelovi grada Sarajevo budu rasterećeni ovih sadržaja. Ovu poticajnu mjeru imaju mnoge lokalne zajednice koje daju odlične rezultate. Imamo primjer Goražda, Tešnja, Jelaha itd. Stoga predlažem da podržimo ovu inicijativu.

Poslanik/zastupnik Predrag Kojović:

Zahvaljujem predsjedavajuća. Ja imam dvije inicijative. Jedna se tiče je upućena Ministarstvu zdravstva. I malo je tehnička, ali mislim da ministra će znati odlično o čemu ja govorim. Naime, mi sada primjenjujemo kod određenih oboljenja neophodno je upotrijebiti terapijsku plazmu, jedan krvni proizvod do koga se dolazi, mi trenutno dolazimo centrifugalnom filtracijom dok postoji, odnosno dolazimo membranskom filtracijom a postoji jedan drugi metod. Taj metod je daleko jeftiniji i uspješniji ali zahtijevao bi određena ulaganja u smislu medicinskog kadra, kratkoročna u Zavod za transfuziologiju. Razlika u cijeni je znači metoda koju sada mi koristimo košta oko 1400 KM po pacijentu, metoda bi koštala, kada bi smo usvojili ovu uspješniju i jeftiniju koštala bi oko 450 KM, ali najvažnije je to što je ona de fakto uspješnija i može se primjenjivati u više bolesti. Ja ću u pismenom obliku. Rekao sam da je malo tehnički komplikovana, uputiti Ministarstvu zdravstva. Znam da je ministrica informisana i zna tačno o čemu govorim.

Druga inicijativa se tiče nečega što nam je Vlada Kantona Sarajevo odnosno svojevremeno poslanik/zastupnik Konaković u prošlom mandatu obećao a to je Zakon o utvrđivanju imovine, porijekla imovine izabranih i imenovanih dužnosnika u Kantonu Sarajevo koji je kao što znamo bio izostavljen iz plana i programa Skupštine za ovu godinu a onda uvršten na intervenciju da bude u septembru, onda je sa septembra pomjeren da će biti nacrt u martu i evo danas, kao što vidimo, ipak se nije našao na dnevnom redu. I pošto mi više volimo da

radimo nego da pričamo o borbi protiv korupcije i kriminala, mi pokrećemo inicijativu za donošenje ovog zakona. Zakon smo napisali, nacrt i predali smo. Hvala vam.

Predsjedateljica:

Nisam se zamislila nego sam pažljivo slušala šta ste govorili.

Poslanik/zastupnik Bibija Kerla:

Dobar dan svima prisutnima. Dobar dan gledaocima pored malih ekrana. Ja imam danas dva pitanja. Prvo moje pitanje se odnosi na zagađenje vode sa izvora Bačići. Ustvari ovih dana me zvalo puno građana i oni su se žalili da se u vodi nalazi veliku koncentraciju hlora i pitaju da li je stvarno voda toliko zagađena što se tiče Bačića da bi oni morali da gledaju bijelu vodu umjesto tekuće normalne vode, pitke vode i zato molim danas jedan usmeni odgovor od ministra. Dalje moje drugo pitanje se odnosi ministrici za socijalnu politiku šta je učinjeno po pitanju zbrinjavanja socijalno ugroženih građana koji nemaju osnovne uslove života? Tražim da se primjenjuje pakt o socijalnim, kulturnim i ekonomskim pravima građana, članovima od 9-13 koji kažu ustvari da je ovaj Pakt po važnosti iznad Ustava, tj Aneksa IV Dejtonskog sporazuma, gdje kantoni moraju zbrinjavati svoje građane, dati im krov nad glavom, dati im doručak, ručak i večeru, obuču i odjeću i besplatno školovanje. Uprkos pričama o uspješnom povratku imovine, preostala su ozbiljna stambena pitanja s obzirom da značajan broj osoba traži alternativni oblik javne stambene pomoći. Međutim, takva pomoć nije lako dostupna najugroženijim kategorijama kao što su porodice s jednim roditeljem, starije osobe, žene, djeca, osobe s invaliditetom. Pošto ne postoji zakonski sistem javni strateški mehanizam koji reguliše kategoriju o dodjeli pomoći dešava se da ugroženi pojedinci i porodice uopšte nisu stambeno zbrinute i potrebna je hitna pomoć opštinskih i kantonalnih organa vlasti. Tražim da se ovom problemu posveti daleko veća pažnja kako bi građani Sarajeva konačno osjetili da bar neko brine o njima.

Poslanik/zastupnik Semir Halilović:

Hvala lijepo. Ja ću svoja dva pitanja, jedno je za Tužilaštvo Kantona Sarajevo a drugo je za Ministarstvo pravde uložiti pismeno da ne oduzimam vrijeme. Samo ovaj put odgovore koje sam dobio od ministarstava, pa redom: privrede, finansija, i zdravstva su ispod svakog nivoa intelektualnog, ispod merituma onoga što se pita. Znači, ja ću ponovo postaviti pitanja za sva tri ministarstva, odnosno jedna inicijativa dva pitanja iz prostog razloga što nevjerovatno je da sva tri ministarstva odgovaraju na pitanje koje im nije postavljeno, a ne odgovore na ono koje im postavljeno. Bio bi red stvarno Vlada da radi svog poštovanja, radi digniteta same Vlade da odgovara na ono što ih se pita, a ne na ono što ih uopšte ne pita. Hvala lijepa.

Poslanik/zastupnik Edin Forto:

Hvala. Dobar dan svima. Ja imam jedno pitanje koje želim ustvari ponoviti gđinu ministru Čedomiru Lukiću, ministru prostornog uređenja. Prije dvije sjednice sam postavio pitanje vezano za Zakon o upraviteljima zgrada. Znači taj Zakon u skladu sa novo-donesenim Zakonom o stvarnim pravima pitanje je koliko je on uopšte zakonit. On je praktično stavljen van snage. Ja sam to bolje obrazložio na prethodnoj sjednici. Na prošloj sjednici u konsultacijama sa gđinom ministrom rekao da će biti to odgovoreno, možda nije dobio. Možda skupštinske službe trebaju provjeriti da li dobio to pitanje. Vrlo je bitno, ovo je pitanje koje se tiče velikog broja građana. Veliki je broj pritužbi građana koji imaju zajedničko stanovanje na upravitelje koje je samo Ministarstvo neke od njih pokrenulo je tužbe koje imaju iznose od više stotina hiljada maraka. Znači vrlo je bitno da ovo razriješimo što prije kako bi mogli učestvovati u javnoj raspravi za ovaj Zakon. Znači ovo je ponovljeno pitanje. E sada bih još htio pitati gđina ministra Hasanspahića ministra komunalne privrede i infrastrukture možemo li dobiti pregled uplata za vodne naknade koje se uplaćuju u budžet

Kantona Sarajevo po osnovu federalnog i kantonalnog Zakona o vodama? Vrlo je bitno da vidimo kako se ova namjenska sredstva troše, zbog problema vodosnadbijevanja u kantonu. Ako možete da mi dostavite to za posljednjih pet godina, mislim da će koristiti ta analiza i ovoj Vladi u pripremama za naredne budžete. Također bi pokrenuo inicijativu prema ovom Ministarstvu da pokrene zajedno sa Vladom stavljanje u rad Vlade, da pokrenemo sjednicu vanrednu za vodozaštitnu zonu koju je tražilo opštinsko vijeće Ilidža. Ne znam gdje smo stigli s tim. Dobili smo svi materijale, svi skupštinski zastupnici. Neki od nas smo bili na toj sjednici vodozaštitna zona je goruće pitanje, mislim da se ova Skupština i ova Vlada ne odnose domaćinski prema ovom pitanju. A vodozaštitna zona je 90% svoje površine na opštini Ilidža. Hvala vam.

Poslanik/zastupnik Sabina Ćudić:

Pozdrav svima. U skladu sa prijašnjim inicijativama Naše stranke a vezano za prava osoba sa invaliditetom u Kantonu Sarajevo, predlažemo dvije inicijative koje se tiču također kretanja osoba sa invaliditetom u Kantonu Sarajevo. Prva inicijativa se tiče za izmjene Uredbe o subvencioniranju troškova prevoza u javnom gradskom saobraćaju na području Kantona Sarajevo kojim će se omogućiti da slijepa i slabovidna lica mogu ostvariti pravo neovisno o članstvu u Udruženja slijepih i slabovidnih lica Kantona Sarajevo a na osnovu dokaza o stepenu invaliditeta. Da pojasnim o čemu se radi, dobili smo upite i zahtjeve značajnog broja slijepih i slabovidnih lica u Kantonu Sarajevo koja ne mogu pristupiti, odnosno ne mogu dobiti dozvole za kupone i dozvole za kretanje u javnom saobraćaju bez evidencije u njihovim udruženjima, što je naravno nije u skladu sa europskom praksom. Ne postoji nikakav razlog zašto bi smo uslovljavali da osoba onda plaća članarinu tim udruženjima, odnosno da legalizujemo svojevrstan monopol udruženja nad pravima osoba sa invaliditetom. Pa vas molim da ovu inicijativu i usvojite.

Zastupnička inicijativa broj 2. tiče se također kretanja osoba sa invaliditetom u Sarajevu i tiče se konkretno subvencioniranja taksi prevoza za lica korisnike kolica, te slijepa i slabovidna lica sa fokusom na dijelove grada koji nisu povezani adekvatnim javnim prevozom u smislu povezanosti i učestalosti linija. Odnosno nisu opremljeni u svrhu primanja putnika koji su korisnici kolica. Kao što znamo većina vozila taksi prevoza i javnog prevoza nisu osposobljena za osobe, posebno s kolicima, kao i slijepa i slabovidna lica pa bi smo sa ovom inicijativom najavili i zakonske izmjene koje ćemo predlagati u budućnosti a tiču se da zapravo vozila taksi vozila koja su osposobljena za upotrebu osoba sa invaliditetom ne ulaze u ono brojčano ograničenje registrovanih taksi vozila u Sarajevu kako bi smo pružili poticaje onim taksi prevoznicima koji pružaju usluge osobama sa invaliditetom da to i dalje čine. I konačno, ispred Kluba Naše stranke, imamo inicijativu koja je nešto opširnija i neću je sada detaljno obrazlagati ali se tiče zapravo kreiranja baze podataka, katastra odgojno obrazovnim objektima u Kantonu Sarajevo koji bi nam pružilo detaljan uvid u stanje. Znači broj škola, stanje u školama, izgled škola i što je najvažnije, neophodne popravke i neophodne izmjene na zgradama osnovnih i srednjih škola u Kantonu Sarajevo. Na osnovu te baze podataka onda bi smo mogli da pravimo i ozbiljnije planove vezano za rekonstrukcije škola i da steknemo jednu jasniju sliku o potrebama obrazovnih institucija u Kantonu Sarajevo. Sve tri smo naravno predali na protokol. Detaljnije su tamo obrazložene i s tim u vidu hvala.

Poslanik/zastupnik Eldar Ćomor:

Uvažena predsjedavajuća i dopredsjedavajući, premijeru, članovi Vlade, kolegice i kolege zastupnice i zastupnici, selam alejkum i dobar dan. Pokrećem pitanje i inicijativu prema Ministarstvu finansija i Ministarstvu privrede Kantona Sarajevo da se dostavi ugovor o ustupanju bankarskih poslova broj:05-05-14-1157/99 koji je 23.09.1999 zaključen između ministarstva finansija privrede Kantona Sarajevo i Intesa Sanpaolo banke dd BIH ranije UPI banka. O razlozima ćemo govoriti kada dođe ovaj ugovor.

I imam inicijativu prema Ministarstvu saobraćaja Kantona Sarajevo da se na putu M17 na prelazu između naselja Garovci i Donji Hadžići izradi i izgradi kvalitetno stručno i tehnički prihvatljivo rješenje pješačkog prelaza na navedenoj lokaciji.

Obrazloženje.

U devetom mjesecu ako Bog da očekuje se početak rada nove OŠ Hadžići u Hadžićima. OŠ je na lijevoj strani krećući se putem M17 prema Mostaru, naselje Garovci je na desnoj strani. I ovo naselje nema riješeno pitanje prevoza djece, odnosno učenika te su oni primorani da idu pješke. Sada će biti primorani da prelaze preko puta M17 do škole. Na navedenoj lokaciji ima ka označen pješački prelaz ali je totalno nesiguran, jer se vozači kreću velikim brzinama i ova lokacija je poznata po velikom broju saobraćajnih nesreća pa čak i slučajeva sa smrtnim posljedicama učesnika u saobraćaju.

Predsjedateljica:

Samo nam niste rekli koja je osnovna škola?

Poslanik/zastupnik Eldar Čomor:

OŠ Hadžići.

Poslanik/zastupnik Mirza Čelik:

Zahvaljujem predsjedavajuća. Pozdravljam sve prisutne kao i gledaoce pored malih TV ekrana. Ja podnosim inicijativu, odnosno tražim od Ministarstva saobraćaja, tj Direkcije za ceste Kantona Sarajevo da mi dostavi informaciju koliko ima nelegalno postavljenih bilborda na području Općine Ilidža, ili da mi dostave koliko ima izdatih odobrenja za postavljanje bilborda u putnom pojasu na području Općine Ilidža.

Obrazloženje:

Na zahtjev građana općine Ilidža podnosim ovakvu inicijativu sa zahtjevom da se isti nelegalni bilbordi uklone kako bi građani imali bolji pregled na raskrsnicama jer nelegalno postavljeni bilbordi ometaju učesnike u saobraćaju. Zahvaljujem.

Poslanik/zastupnik Sead Bukva:

Zahvaljujem predsjedavajuća. Pozdravljam sviju. Moje jedno pitanje se odnosi Ministarstvu za boračka pitanja, ustvari pitanje za Fond za izgradnju i očuvanje grobalja šehida i poginulih boraca. Zašto u Monografiji koju je izdao ovaj Fond sa svim slikama i opisima šehida, mezarja i spomen obilježja nema i spomen obilježja Brezovača, Općina Hadžići? Iako je na tom spomen obilježju ukopano troje boraca i to šehida: Adnan Došlić, poginuli borac Čedomir Domuz i poginula pripadnica za posebno namjene Zulfikar Milica Marković. Samim time postavlja se pitanje kako i ko održava spomenuto spomen obilježje. Kako imamo informaciju spomenuto spomen obilježje održavaju sami građani i rodbina poginulih uz pomoć donacija građani i firme koje su uredili i ogradili spomenuto spomen obilježje. Zahvaljujem.

Poslanik/zastupnik Neira Avdibegović:

Zahvaljujem uvažena predsjedavajuća i također pozdravljam sve prisutne u Sali kao i gledatelje ispred malih ekrana. Ja za danas imam dva zastupnička pitanja. Oba se tiču najranjivije kategorije stanovništva našeg društva, odnosno osoba sa invaliditetom. Prvo pitanje upućujem Ministarstvu zdravstva Kantona Sarajevo. Kada će se konačno pristupiti rješavanju problema stomatoloških usluga za osobe sa težim invaliditetom, prvenstveno za djecu sa posebnim potrebama. Naime, stomatološki zahvati kod djece sa posebnim potrebama rade se pod općom anestezijom. Popravak zuba pod općom anestezijom u BIH trenutno se radi samo u Mostarskom Karitasovom centru Sveta obitelj gdje je obučen tim stomatologa i anesteziologa i obavlja zahvate ove vrste. Kako je ovo za sada jedina ustanova tog tipa u BIH,

liste čekanja su naravno sve duže i duže. Trebinje i Banjaluka su u prošloj godini pokrenuli rješavanje ovog problema i to uglavnom nevladine organizacije sa predstavnicima zdravstvenih usluga. KCUS u saradnji sa Stomatološkom klinikom prema mojim saznanjima ima potrebnu opremu ali se iz nekog razloga ovi zahvati ne obavljaju. Dakle roditelji čija su djeca zdrava imaju zagarantovanu zdravstvenu uslugu, a roditelji djece sa posebnim potrebama zaštitu koja im je zakonom zagarantovana, ne mogu iskoristiti. Ovoj djeci je to pravo oduzeto. Društvo je i dalje gluho i nijemo na ovaj problem. Stoga smatram da je krajnje vrijeme da se problem počne rješavati i molim odgovor da li nadležni rade na rješavanju istog koje će eventualne aktivnosti poduzeti, nadam se u što skorijem periodu.

Moje drugo pitanje odnosi se ustvari na podršku slijepim i teže slabovidnim osobama kojih, samo prema evidenciji udruženja slijepih Kantona Sarajevo u našem kantonu ima oko 420. prema Uredbi o obimu, uslovima, i načinu ostvarivanja prava osiguranih lica na korištenje ortopedskih i drugih pomagala, slijepe osobe mogu ostvariti pravo samo na tamne naočale, govorni toplomjer i bijeli štap. S druge strane recimo apsolutno nije osigurana obuka za korištenje bijelog štapa. To ne može ni približno zadovoljiti stvarne potrebe ovih osoba, koje naravno zbog težine i same vrste invaliditeta imaju velike poteškoće u organizovanju svakodnevnog života. Ovo pitanje je puno povoljnije riješeno u zemljama u okruženju pa čak i u RS-u. Stoga moje pitanje upućeno Vladi i opet Ministarstvu zdravlja kao resornom, jeste da li se poduzimaju aktivnosti sa ciljem unapređenja u ovoj oblasti kako bi se osigurali što bolji uslovi života osobama sa navedenom vrstom invaliditeta. Zahvaljujem.

Predsjedateljica:

Hvala lijepo gospođice Neira. Sljedeći je gospodin Aljović Hamed. Odlučite se da li ste Aljović ili Aljović, da bih znala.

Poslanik/zastupnik Hamed Aljović:

Zahvaljujem predsjedavajuća nisam ja komentarisao molim vas.

Predsjedateljica:

Pa komentar sam poslala onome ko je i poslao. Nećemo sada o tome. Nastavljamo dalje. Imate riječ.

Poslanik/zastupnik Hamed Aljović:

Zahvaljujem predsjedavajuća. Pozdravljam i selamim sve prisutne i građane Kantona Sarajevo. Moje prvo pitanje upućeno je MUP-u Kantona Sarajevo. Molim ministra MUP-a Kantona Sarajevo da mi odgovori da li su istiniti navodi objavljeni na nekim web portalima pod naslovom „Tatini sinovi pod zaštitom policije i Tužilaštva Kantona Sarajevo autima gaze građane Sarajeva“. I ako nisu da učini dodatni napore kako bi se građani Kantona Sarajevo van svake razumne sumnje uvjerali u to.

Moja inicijativa je upućena prema Ministarstvu za rad, socijalnu politiku i raseljena lica i izbjeglice Kantona Sarajevo. Podnosim inicijativu da Ministarstvo za rad, socijalnu politiku i raseljena lica i izbjeglice preduzme sve zakonske mogućnosti kako bi pomogli četveročlanoj maloljetnoj porodici Dedović iz Ilidžanskog naselja Osijek, koji žive u izuzetno teškim uslovima, bez majke i oca, da o poduzetim aktivnostima obavijesti skupštinu Kantona Sarajevo. Zahvaljujem.

Predsjedateljica:

Još jednom samo da konstatujem da jako dobro čujem a još bolje vidim. Hvala lijepo. Sljedeći je gospodin Akšamija Goran.

Poslanik/zastupnik Goran Akšamija:

Zahvaljujem predsjedavajućoj. Koristim priliku da pozdravim sve prisutne i gledaoce medija. Prvo bih želio da nešto naglasim da sam prije tri mjeseca postavio dva zastupnička pitanja, jedno se odnosilo na Ministarstvo obrazovanja i da li se šta radi na ukidanju promašaja devetogodišnjeg obrazovanja? A drugo pitanje je bilo upućeno Ministarstvu saobraćaja za regulisanje kretanja vozila, odnosno dostavnih vozila koji vrše dostavu po trgovinskim radnjama koje se nalaze u gradu i to u jutarnjim satima gdje dolazi faktički do jednog kolapsa saobraćaja. Vjerujem da odgovore na ova pitanja nisam dobio radi velikog posla Vlade oko postavljanja UO pa će se moje pitanje upravo odnositi na to iz segmenta zdravstva. Koliko sam uspio da vidim na nekim portalima novoimenovani UO su isključivo jednonacionalni, znači bez poštivanja zakonsko pravnih akata, a također ne vidim da se tu nalaze osobe iz reda uposlenika, što se vrlo često pogrešno tumači, da su to uposlenici iz drugih ustanova a ne iz one iz koje potiču. Smatram da ovakav način imenovanja odbora, gdje se može vidjeti da se tu nalaze možda i neki ljudi koji ne zadovoljavaju potrebne kriterije a uzimajući u obzir situaciju koja je trenutno u zdravstvu i gdje se treba najozbiljnije rješavati. Ja ne znam gđo predsjedavajuća jesam li ja možda smiješan ili neko drugi, ali ja sam dosta ozbiljan kada vi govorite.

Predsjedateljica:

Ne, ne ja vas pažljivo slušan gospodine ali imam i interakciju sa svima vama.

Poslanik/zastupnik Goran Akšamija:

Dobro, pa vidim. Zahvaljujem vam na tome.

Moje sljedeće pitanje je da li možemo dobiti, po nekim nezvaničnim informacijama podatke da li je budžetska inspekcija boravila u ZZO Kantona Sarajevo i da li nam ti rezultati mogu biti predloženi na ovoj Skupštini?

I treća inicijativa pošto je već bilo pokrenuto u toku ove Skupštine oko izgradnje ovih fiskulturnih sala, da napomenem da se u sličnoj situaciji nalazi i škola Safet beg Bašagić, gdje učenici od petog razreda moraju da idu bez ikakve pratnje u FIS da bi mogli da vrše nastavu tjelesnog vaspitanja po svakakvim vremenskim uvjetima. Pa da se uzme i ova škola u obzir. Hvala.

Predsjedateljica:

Hvala lijepo gospodine Akšamija. Ja nisam predviđjela, odnosno nisam slučajno zaboravila, nego se u međuvremenu javio gospodin Mešanović Safet koji također ima potrebu da nešto kaže. Nemam vas upisanog gospodine Ademović. Evo vi imate prednost. Išli smo po abecednom redu, nemam vas zabilježenog pa zato. Izvolite.

Poslanik/zastupnik Kemal Ademović:

Hvala. Uvažena predsjedavajuća, zamjenici predsjedavajuće, sekretaru, premijeru, članovi Vlade, cijenjene kolegice i kolege zastupnici, predstavnici JU, ustanova, dragi gledatelji TVSA, sve vas selamim i pozdravljam. Ja imam dva pitanja prema Vladi. Prvo pitanje, po kojoj cijeni i koje kvalitete je nabavljen mazut za potrebe Toplana u 2015 godini? I drugo pitanje, da li su nastupili, i ako jesu koje štetne posljedice korištenjem tog mazuta u grejnoj sezoni 2015/2016?

Ovo zahtijevam da mi se odgovori pismeno. A imam i jedno usmeno pitanje, tj imam pitanje na koje tražim usmeni odgovor.

Danas smo na klupama nam je podijeljena obavijest Kantonalnog Tužilaštva u vezi sa predmetom „Prečistač“. Koje je prijavila Vlada Kantona Sarajevo kako stoji ovdje da ne čitam brojeve i ne trošim vrijeme. Kaže se da „ U vezi informacije o problematici izvršenja Zaključka Skupštine Kantona Sarajevo prijavljeno djelo nije krivično djelo. I da imate pravo

podnijeti pritužbu na ovu odluku Ureda tužioca Kantonalnog Tužilaštva u Sarajevu u roku od osam dana od dana prijema ovog obavještenja. Pa ja sada pitam Vladu da li je podnijela ovu pritužbu? Ili ovdje ima elemenata lažnog prijavljivanja i ovakvi i slični predmeti se koriste samo radi skupljanja političkih poena. Dakle ovdje rasprava pred kamerama itd. Kada se govori o visokim ciframa, korupciji, kriminalu itd. Hvala vam.

Poslanik/zastupnik Safet Mešanović:

Hvala vam lijepo predsjedavajuća. Ja vas selamim i pozdravljam. Dakle ja sam samo htio nekoliko rečenica da kažem, a na inicijativu školskog odbora i direktorice OŠ Džemaludin Čaušević želim da potvrdim da su svi navodi iz ovog dopisa i ove inicijative tačni, da je ovo jedna od školskih sala za tjelesni odgoj koja je evo recimo u Opštini Novi Grad u najgorem stanju, a isto tako moram reći da je u protekloj 2015 godini Opština Novi Grad izdvojila cca 40.000 KM da bi sanirala krov same škole koji je također bio u jako lošem stanju i mislim da je krajnje vrijeme da evo Ministarstvo u saradnji sa opštinom Novi Grad, a siguran sam da će se i Opština uključiti da se sljedeće sedmice izađe na teren i da se utvrde ove činjenice i da se već iz budžeta 2016 godine nađu sredstva da se sanira krov. Ako ništa drugo, ove godine krov same fiskulturne sale. Hvala vam lijepo predsjedavajuća.

Predsjedateljica:

Hvala. Ovim smo iscrpili prvu tačku dnevnog reda, a sada bi smo se. Može, može, naravno, ja sam to i htjela da kažem. Izvolite premijeru.

Premijer Elmedin Konaković:

Koliko smo čuli jedan je bio zahtjev za usmeni odgovor. Vukasović, možemo komentarisati, možemo odgovarati, a Poslovnik kaže na zahtjev vaš usmeno se odgovara. Ja bih svašta komentarisao, jednom ste me ružili što svašta komentarišem, hoću Studentski dom. Vlada Kantona Sarajevo je u procedurama Tužilaštva obaviještena i na sjednici Vlade koja je održana, njen nastavak u ponedjeljak smo mi i ovu tačku razmatrali pod aktuelna pitanja i procijenili smo da upravo zbog ovoga kako je zastupnik Ademović govorio, interesa Skupštine, u proteklom mandatu, informaciju podijelimo zastupnicima. Dakle, obavijest je stigla na adresu Vlade, a procedure su pokrenute i iz Skupštine i od Vlade, dakle mislimo samo da je to bilo svrsishodno da se obavijeste zastupnici, a o daljim pravnim radnjama očekujemo naše Pravobranilaštvo eventualno ili Ministarstvo pravde da nam sugerise da li bi smo trebali tražiti obnovu postupka ili bi smo trebali tražiti prijavu za krivo prijavljivanje. Eto o tome ćemo vas izvijestiti. I evo pošto je zastupnik Vukasović tražio komentar, naredne sedmice bit će imenovan zvanično UO Studentski dom. Imenovan je vd UO koji nas je obavijestio da još uvijek nije dobio izvještaj od direktora. To nam je ministar Kazazović prenio, što apsolutno smatramo neprimjerenim. I mi smo svjesni da se dole dešavaju jako loše stvari. Ja sam lično obišao taj Studentski dom, jednom navečer. Večerao sam s tim studentima, razgovarao sa njima o stanju u samom domu, vidjeli smo niz problema u funkcionisanju ovog doma, neki su objektivni. I dalje ne trebamo zaboraviti konstataciju, ustvari činjenicu da smještaj studenata ne finansira veliki broj Kantona. Imaju značajna dugovanja prema ovom studentskom domu i tu nastaje jedan dio problema. Drugi dio problema je u ovome što smo podržali ja kao vašu inicijativu da svi organi uđu i u ovu i u druge institucije. I ovdje smo mi zvanično i javno dali podršku, i sada je dajemo, da i Tužilaštvo i naše ostale inspekcije rade na rasvjetljavanju eventualno nekih kriminalnih radnji. I već smo promjenom tog UO, njegovog vd sastava pokazali da nismo zadovoljni tamo stanjem. A zaista ćemo uraditi sve da se što prije dovede taj izvještaj koji proceduralno oni svi još imaju vremena do danas da se završavaju ti završni računi, pa se onda u aprilu traže izvještaji. Na nekima posebno insistiramo i ovdje ćemo insistirati da što prije dođe na

skupštinske klupe. Ako budemo imali otpor od menadžmenta, naravno o tome ćemo blagovremeno izvijestiti i skupštinu i javnost i poduzeti sljedeće moguće mjere. I još jedna samo opaska kada je riječ o budžetskoj inspekciji u zavodu. Ona je završila svoj dio posla za 2013 i 2014, napisali su materijal na koji je morao ZZO dati svoje očitovanje. Njima su rokovi istekli prije nekih sedam, osam dana. Mi još uvijek na Vladi formalno nismo razmatrali nalaz budžetske inspekcije. Onog trenutka kada Vlada bude, a to će sigurno biti, na nekoj od narednih sjednica vrlo brzo, razmatrala nalaz budžetske inspekcije on će biti na uvid prezentiran i Skupštini, i vjerovatno još nekim organima na osnovu ovoga što su sada trenutno nalazi budžetske inspekcije kada je riječ o ZZO. Hvala.

Predsjedateljica:

Hvala lijepo uvaženi premijeru. Pošto smo iscrpili prvu tačku dnevnog reda, ja bih sada prešla na izjašnjavanje po inicijativama koje su dali gospodin Kozadra, Vukasković i Babić. Pa bi išli redosljedom. Gospodin Kozadra zahtjeva da Skupština Kantona, odnosno traži od Vlade da obezbijedi dodatna sredstva u budžetu Kantona Sarajevo za razvoj i poticaj industrijske proizvodnje.

Tko je za? Protiv? Suzdržan?

Suzdržan 1 protiv ništa. U redu.

Inicijativa gdina Vukasovića traži. Izvolite. Gospodin Ademović intervencija.

Poslanik/zastupnik Kemal Ademović poslovnika intervencija:

Nemam Poslovnik ispred sebe, zaista se izvinjavam, koliko se sjećam, dakle inicijative za koje su vezana određena finansijska izdvajanja, dakle prvo se dostavljaju Vladi. Vlada mora da se o njima izjasni, te u roku od 30 dana ukoliko se Vlada ne izjasni podnositelj inicijative može zahtijevati od Skupštine da ona prihvati takvu inicijativu da se o njoj glasa i da ona postane obavezujuća za Vladu. A ovih 30 dana je ostavljeno Vladi da se Vlada izjasni. Obzirom da se radi, ovdje se radi o, žao mi je što se radi o ovoj dobroj inicijativi, ovo je dobra inicijativa, ali mislim da je treba prije svega proslijediti Vladi pa tek onda da se Skupština o njoj izjasni kao obavezujućoj. Da Vlada kaže, može, ne može itd.

Predsjedateljica:

Dobro, u redu. Evo ja pitam Vladu da li želi da se izjasni o ovom ili da se postavi rok?

Premijer Elmedin Konaković:

Upravo smo ministar Lukić i ja o tome razgovarali pa je Ademović bio brz, ja nisam htio da remetim procedure skupštinske. Više puta smo tako na identičan način postupali. Naravno, načelno se slažemo, ali proceduralno, Vlada to mora razmatrati na sjednici jer se ovdje od nas traže finansijska sredstva koja budžetom nisu predviđena. Da bi smo rekli da li ih ima, koliko ih ima, zato nije dovoljno da se sada samo pozitivno očitujemo na inicijativu. Vama treba pismeni odgovor Vlade koja će u roku od 30 dana na ove inicijative reagovati. I nama su zastupničke inicijative iako se slažem sa zastupnikom Halilovićem neki naši organi ne odgovaraju adekvatno na pitanja, jednake su težine, i kada ih potvrdite zaključkom i ove kada ih ko zastupnici pošaljete. Tako da ovu praksu ako budete se o svakoj tražili da vas podrži cijela Skupština, samo malo možda komplikujemo procedure, dakle ove formalno Kozadra i još neke koji traže od nas, i izgradnja škole, fiskulturne sale, oni zahtijevaju ozbiljan pristup ministarstva obrazovanja, ministarstva finansija, u slučaju zona industrijskih za koje smo mi već izdvojili sredstva, dakle mi smo sami, ako se sjećate povećali onu stavku na 700.000 čini mi, bila je znatno manja. Hoćemo još ali nam dajte vremena da vidimo odakle, kako nam idu prihodi, radimo analizu prvog kvartala, sada odmah po njegovom završetku i mi ćemo reći da li i za koje projekte ima sredstava. Hvala.

Predsjedateljica:

Hvala lijepo uvaženi premijeru. Ove inicijative ćemo proslijediti Vladi. Idemo na sljedeću tačku dnevnog reda, a to je. Da, inicijativa gđina Vukasovića traži od Vlade da za prvu narednu sjednicu Skupštine pripremi materijal finansijskog izvješća JU Studentski centar za 2014 i 2015 godinu.

Da li se slažete? Tko je za da se uvrsti u dnevni red? Može, može.

Znači protiv niko, suzdržani niko, 26 ZA. U redu. Hvala lijepo.

Prelazimo na sljedeću tačku dnevnog reda, a to je:

AD – 2.

**PRIJEDLOG ZAKONA O KOMUNALNIM DJELATNOSTIMA -
(HITNI POSTUPAK)**

Prijedlog zakona ste dobili uz poziv za sjednicu. Molim Predlagača da podnese izvješće. Evo izvolite uvaženi premijeru Hasanspahiću. Izvinjavam se. Dakle vi mene toliko zbunite i ustvari previše gledam u premijera, da. Neka humora u svakom slučaju nije na odmet da malo relaksiramo ovu skupštinu. Idemo dalje.

Ministar Senad Hasanspahić:

Uvažena predsjedavajuća, dopredsjedavajući, uvažene zastupnice i zastupnici, poštovani premijeru i članovi Vlade, dragi gosti, sve vas lijepo pozdravljam. Ja ću vas zamoliti ako je moguće da objedinimo raspravu po tački 2 i 3 pošto se radi o istoj problematici, imamo dva amandmana na dva zakona, pa onda možda da mi dozvolite da moje uvodno izlaganje bude i za jedno i za drugu tačku objedinjeno.

Predsjedateljica:

Da, trebali bi da se izjasnimo. Da li predlažete da se izjasnimo da to zajedno ide, pa ćemo se posebno onda izjašnjavati o glasanju? Da.

Premijer Elmedin Konaković.

Tehničkog je karaktera. Ili barem kada završite obje rasprave da se ne izjašnjavate o zakonima da mi jednom raspravimo amandmane. Dakle imate amandmane na oba zakona koje će prihvatiti Vlada, ali da ne idemo nakon prve, pa nakon druge tačke. Završite rasprave, ne izjašnjavamo se o tačkama, nakon stava Vlade o amandmanima, izjasnite se o tačkama jednog pa drugog zakona. Ako je moguće. Ako nije, malo će duže trajati.

Predsjedateljica:

Ja bih voljela da se izjasnimo o ovome. Ko je za prijedlog premijera da ponovno formulišemo prijedlog.

Ministar Senad Hasanspahić:

Predsjedavajuća, ako sam ja dobro shvatio.

Predsjedateljica:

Možete početi.

Ministar Senad Hasanspahić: UVODNO IZLAGANJE

Predsjedateljica:

Hvala lijepo. Da li predstavnici radnih tijela žele riječ? Ne. Ima li pitanja? Nema pitanja. Otvaram raspravu.

Poslanik/zastupnik Mersiha Mehmedagić:

Zahvaljujem uvažena predsjedavajuća, još jednom pozdravljam sve prisutne. Neću ponavljati činjenice koje je ministar iznio vezano za presudu, napomenut ću samo jedno da osporeni zakoni nisu u skladu sa relevantnim odredbama Ustava FBiH, Europskom poveljom o lokalnoj samoupravi, Zakonom o načelima lokalne samouprave u FBiH i Ustavom Kantona Sarajevo. Šta je Vlada uradila da prevaziđe pravni vakum u kojem se našla komunalna djelatnost? Vlada je naime predložila stare zakone u istovjetnom osporenom tekstu. 26.02. na sastanku sa predstavnicima Grada i Općina u kantonu, Vlada je dogovorila da se uz njihove pismene saglasnosti i pozitivna mišljenja na zakone komunalne djelatnosti obavljaju kao i do sada. Znači ti zakoni će se primjenjivati sve do okončanja postupka implementacije presude. Taj postupak podrazumijeva da se mora izmijeniti Ustav Kantona Sarajevo, donijeti Zakon o lokalnoj samoupravi, pa tek onda Zakon o komunalnoj djelatnosti i Zakon o komunalnoj čistoći sa tačno definisanim nadležnostima. Vlada je, znajući za pomenuti pravni vakuum, osam dana prije navedenog sastanka na 32. sjednici usvojila Akcioni plan Vlade Kantona Sarajevo za realizaciju Reformske agende za BiH, za period 2015-18. gdje predviđa donošenje Zakona o lokalnoj samoupravi u decembru 2016 a ovaj Zakon je, napominjem, ključ implementacije presude. Ne postupi li se hitno izradi novih zakonskih rješenja upitno je hoćemo li i kada implementirati presudu a već ih imamo 15 gdje je Kanton višestruko povrijedio pravo grada i općina na lokalnu samoupravu koje nisu sprovedene. Stoga Klub DF-a predlaže da se vremenski ograniči važenje predloženih zakona u prelaznim i završnim odredbama kako bi se što prije dobile potrebne saglasnosti općina i gradova, donijeli novi zakoni i dosljedno implementirala dopunska presuda Ustavnog suda FBiH. Zahvaljujem.

Poslanik/zastupnik Edin Forto:

Hvala vam predsjedavajuća. Ja imam nekoliko amandmana i ja bih u ime Kluba htio ovo sada izložiti. Mislim da je ovo sada pravi trenutak. Amandmani se odnose na Zakon o čistoći. Svjestan da cijelog uvoda u ove tačke, svjestan u činjenicu da će novi set zakona biti donesen u roku koji su sada iz Vlade najavili i u skladu sa dogovorom svih šefova klubova, ja bih volio da pročitam ove amandmane i da Vlada onda na svojoj pauzi da se izjasni. To su amandmani koji će popraviti ovaj Zakon i u budućim nacrtima u novom setu zakona nije nikakav problem da se onda ove stvari uvrste. Ako nije problem ja bih onda to pročitao?

Prvi Amandman

U članu 14.stav 2 mi bi promijenili taj stav i naveli da:

„Materijal, koji ostane poslije rušenja ili građenja objekta i završnih radova na gradilištu, mora se ukloniti u roku od 24 sata od časa kada je završeno rušenje ili građenje objekta, a mjesto rušenja, odnosno građenja, mora se ostaviti uredno i čisto.

U obrazloženju kao i poslije rušenja, također poslije građenja objekta i drugih radova na gradilištu ostaje materijal koji bi bilo neophodno ukloniti kako bi mjesto rušenja, odnosno, građenja bilo uredno i čisto 24 sata od završetka radova.

Ovo je samo nadopuna jer je u postojećem zakonu samo je spominjano rušenje.

Amandman II

U Članu 15. iza tačke b) dodaje se nova tačka c) koja glasi, i ovo je član koji nabroja šta se ne smije raditi po ovom Zakonu. Mi bi dodali još da se ne smije raditi još:

“c) odlaganje kućnog otpada u ulične korpe za otpatke,”

Također dodali bi jedan red koji bi dodao još, proširo bi sve one supstance koje se ne smiju odlagati

„i) polijevanje ili ispuštanje na javne površine prljavih i masnih tečnosti, sredstava za zaštitu drva, zaštitu biljaka, dezinfekciju, dezinsekciju i deratizaciju, baza, kiselina, boja, lakova, rastvarača, sredstava za skidanje hrđe, boje ili laka, antifrizi, ljepila, fotohemikalija, sredstava za održavanje bazena, maziva, ulja, tekućih goriva, fiksira i razvijača, lijekova i drugog farmaceutskog otpada, kreča, životinjskog izmeta i fekalija,“

Ovo je već postojalo u zakonu u mnogo užoj formi. Mi smo proširili sa jednim nizom nedozvoljenih supstanci.

Također bi u istom članu dodali jedan red koji bi glasio:

„l) odlaganje na javne površine starih baterija, akumulatora, uljnih filtera, boca pod pritiskom, termometara sa živom, fluorescentnih cijevi i drugog otpada koji sadrži živu, municije, pirotehničkih sredstava, ionizatora, detektora dima i plinova i drugih električnih i elektroničkih uređaja koji sadrže opasne komponente,“

Također dodali bi još jedan član gdje bi bilo zabranjeno:

„z) uništavanje i oštećivanje posuda za otpad.“ Što do sada nije bilo tretirano.

Sljedeći amandman:

AMANDMAN III

U članu 16. iza riječi “otkloniti” dodaju se riječi “i tako javnu površinu vratiti u prvobitno stanje.”

Ovo ću obrazložiti. Znači nakon eventualnih oštećenja i zaprljanosti, koja se dešavaju u našoj okolini, zakon predviđa da se ona samo otkloni, da se prljavština samo otkloni. Mi bi to proširili sa dovodenjem u prvobitno stanje, što je mnogo preciznija definicija a posebno u inspekcijama znaju o čemu se radi.

Sljedeći Amandman:

AMANDMAN IV

U članu 26, stavu 3., iza riječi „gradski odnosno općinski organ nadležan za komunalne poslove“ dodaju se riječi: „, uz prethodno pribavljeno stručno mišljenje Zavoda za planiranje razvoja Kantona Sarajevo i okolišnu dozvolu Federalnog ministarstva okoliša i turizma.“

Ovdje se radi o stavljanju također uvrštavanju u prostorno plansku dokumentaciju pozicija tzv. reciklažnih dvorišta. Zakon predviđa da opštine mogu to same uraditi, mi tražimo da se to proširi sa mišljenjem Zavoda za planiranje razvoja Kantona Sarajevo i sa dozvolom Federalnog ministarstva okoliša i turizma.

I još jedan.

AMANDMAN

U članu 67. iza stava (1) dodaje se novi stav (2) koji glasi:

“(2) Ako, na osnovu zaprimljene prijave od strane građana, utvrdi da postoji osnovana sumnja izvršenja radnje suprotno odredbama ovog zakona i propisima donesenim na osnovu njega, komunalni redar može sačiniti zapisnik ili službenu zabilješku.”

Do sada to nije bilo predviđeno. t

Dosadašnji stav (2) postaje stav (3).

Također, zadnji Amandman, broj 7, 6

U članu 68.dodaje se novi stav (2) koji glasi:

(2) Ako se komunalnom redaru ne dopušta pristup javnoj površini radi utvrđivanja činjeničnog stanja, u slučaju postojanja opravdane sumnje izvršenja radnje suprotno odredbama ovog zakona i propisima donesenim na osnovu njega, komunalni redar ovlašten je zatražiti nalog suda i asistenciju nadležnih organa Ministarstva unutrašnjih poslova Kantona Sarajevo radi pristupa površini u svrhu utvrđivanja činjenica.”

Ovim amandmanom mi bi ustvari dozvolili komunalnim redarima da uđu u krug nekih objekata gdje se sumnja da je prekršen ovaj Zakon a znamo da inspekcije ponekad imaju problem prilaska ovim, na ovaj način komunalni redari uz asistenciju sudskog naloga i MUP-a mogu pristupiti svakoj površini.

Evo ja se nadam da ovo nije predugo trajalo i nadam se da će Vlada usvojiti ove amandmane koji su došli čisto iz struke, nema nikakvih političkih sadržaja. Hvala vam.

Predsjedateljica:

Vi to morate sada dostaviti službi.

Poslanik/zastupnik Edin Forto:

Mi smo ovo dostavili jučer na protokol. Hvala vam.

Predsjedateljica:

Jer t nismo dobili, znate. Dobro. Da to Vlada može imati

Poslanik/zastupnik Slaviša Šućur:

Zahvaljujem predsjedavajuća. Ma evo, ja sam veći dio svog razmišljanja o ovom zakonu rekao u onom uvodnom dijelu. Ja ću samo kratko ponoviti, ovdje zaista postoji potreba da se jasno naznači da e radi o zakonu koji pokriva ovo prelazno područje, odnosno prelazni period do pune implementacije presude odnosno donošenje Zakona o lokalnoj samoupravi koji će precizno utvrditi nadležnosti jedinica lokalne samouprave, dakle Grada i opština gradskih, kako i onih izvan grada po pogledu ovih nadležnosti vezano za komunalne djelatnosti i za javnu čistoću. Dakle problem je isti. Ustavni sud vrlo često svoji8m presudama ukida zakone mi ulazimo u periode nekog nepokrivenog bilo kakvim zakonskim osnovama, život ne čeka, život traži da se neke stvari dešavaju i mi smo evo u razgovoru predstavnici Vlade i predsjednici svih klubova došli do nekog rješenja koje po nama rješava ovaj problem. Dakle zaista zadovoljava potrebu da se nastave obavljati ovi poslovi, i da Zakon postoji koji uređuje ove oblasti. A da ujedno stavimo do znanja da je to privremenog karaktera i da utvrdimo jasne rokove. Ja sam zbog toga pripremio amandmane na oba zakona. Jedan i drugi će biti uvršteni u prelazne i završne odredbe. Ja sam njihov tekst dostavio stručnoj službi, a oni glase:

Da će se Zakon primjenjivati do donošenja Zakona o lokalnoj samoupravi Kantona Sarajevo a najduže šest mjeseci.

Dakle to je tekst koji se dodaje Zakonu o komunalnim djelatnostima iza člana 51 u Prelaznim i završnim odredbama.

A u Zakonu o komunalnoj čistoći on će biti također biti uvršten prije člana koji se odnosi na donošenje podzakonskih akata, bit će podijeljen ovaj tekst i koliko je meni poznato i poslanicima u najkraćem roku i bit će dostavljen Vladi i ja se nadam da ukoliko ga Vlada prihvati da ovo zaista omogućava i nama poslanicima, da ne kršeći Ustav i zaista poštujući presude Ustavnog suda riješimo i ovaj gorući problem u kantonu. Hvala.

Predsjedateljica:

Hvala lijepo. Pošto nema niko više za raspravu zatvaram raspravu. Da li premijer želi da se izjasni o ovome?

Premijer Elmedin Konaković:

Nemam se šta sam izjašnjavati, mi moramo sada održati sjednicu Vlade. Sada sam poslao službi poruku, mi nismo dobili ako ste jučer predali na protokol, pa vas molim da samo iskoordiniramo da dobijemo mi vaše amandmane zvanično, ako su u službi oni će nama sada pripremiti i mi ćemo sada na sjednicu Vlade, odmah. A predlažem onda da vi imate pauzu za ručak i da ne pravimo narednu, jer nam s obzirom na ovih sedam amandmana načelno su vrlo prihvatljivi samo moramo u nekom kratkom roku izanalizirati da li prihvatanjem tih amandmana eventualno kršimo neke druge zakone ili eventualno ulazimo u različitu primjenu nekih drugih zakona. Zato ćemo sada brzo pozvati uposlenike ministarstva pravne i da u jednom brzom pregledu trebat će nas sigurno satak, a vi do tada možete vjerovatno ručat da ne pravimo dvije pauze, odmah ćemo poslije sjednice Vlade iznijeti stavove Vlade po amandmanima i usvajati Zakon. Hvala.

Predsjedateljica:

Hvala lijepo premijeru. Ja predlažem da sada imamo pauzu tačno 13,45 da se nađemo ovdje. Nemojte kasniti, obzirom da smo imali kašnjenje od 45. radit ćemo cijeli dan dok ne završimo.

NASTAVAK NAKON PAUZE

Predsjedateljica:

Uvaženi ministre Hasanspahiću, na svoje mjesto, molim vas. Svi na svoja mjesta. Ima problema zbog ratnih posljedica pa ne čuje. Nakon ove duže pauze nadam se da možemo mirno krenuti sa nastavkom rada naše 13. redovne sjednice. Gospodine Pecikoza, na vrijeme uđite u salu. Bez crnog humora, molim vas. Nastavljamo dalje.

Uvaženi premijeru izvolite.

Premijer Elmedin Konaković:

Dobro. Dakle kratko. Vlada je na vanrednoj sjednici prihvatila amandmane zastupnika Šućura na Zakon o komunalnim djelatnostima i Zakon o komunalnoj čistoći. Vlada je prihvatila amandmane I, II, III, IV, amandman V je povukla Naša stranka, prihvatila je Vlada amandman VI i nije prihvatila amandman VII. Obrazloženja možemo usmeno. Pismo nismo stvarno imali vremena da služba priprema, Ministarstvo komunalne također priprema. Dobit ćete obrazloženje. Sada smo razgovarali o razlozima ovog amandmana VII. I nama je interes da se on riješi, na žalost to su oni drugi zakoni koji nas u njima sprječavaju. Evo izvještavamo skupštinu amandmani zastupnika Šućura i od VI, pet amandmana Naše stranke Vlada Kantona Sarajevo na sjednici je prihvatila.

Predsjedateljica:

Hvala lijepo gospodine premijeru. Gospodine Forto da li ostajete vi pri ovom amandmanu VII. Odustajete? U redu. Hvala lijepo.

Da nastavimo dalje, kao što smo se dogovorili da ćemo objediniti raspravu, odnosno ove dvije tačke, sada ću vas zamoliti da se posebno izjasnimo o drugoj tački dnevnog reda a to je Zakon o komunalnim djelatnostima po hitnom postupku, pa vas molim da pristupimo glasanju.

Ko je za? Protiv? Suzdržan?

25 ZA, protiv ništa, suzdržan ništa.

KONSTATUJEM DA JE SKUPŠTINA USVOJILA OVAJ PRIJEDLOG ZAKONA O KOMUNALNIM DJELATNOSTIMA po hitnom postupku.

Sada pristupamo glasanju o Prijedlogu zakona o komunalnoj čistoći, također po hitnom postupku. Pa želim da se izjasnite. Tko je za? Tko je protiv? Suzdržan? Hvala lijepo.

KONSTATUJEM DA JE GLASALO ZA 26 POSLANIKA, PROTIV NIŠTA, SUZDRŽANO NIŠTA.

Hvala lijepo.

Prelazimo na sljedeću tačku dnevnog reda, a to je:

AD – 4.

PRIJEDLOG ZAKONA O IZMJENAMA I DOPUNAMA ZAKONA O TAKSI PRIJEVOZU U KANTONU SARAJEVO (HITNI POSTUPAK)

Molim predstavnika Predlagača da podnese uvodne napomene. Izvolite uvaženi ministre Fišo.

Ministar Mujo Fišo: UVODNO IZLAGANJE

Mi smo pored toga na hitnoj sjednici Vlade, djelovali amandmanski na član 37 zbog korekcije i usvajanja Zakona i stupanja na snagu došli bi u neke probleme, tako da bih ja pročitao ovaj amandman.

Na član 4. prijedloga izmjena i dopuna Zakona o taksi prevozu u Kantonu Sarajevo, Službene novine Kantona Sarajevo broj 11/14 i broj 26/14. Član 37 stav 1 tačka c) Zakona o taksi prevozu u Kantonu Sarajevo mijenja se i glasi: „iza riječi „kojom pripada“ dodaju se riječi: „dokupi izgled krovne taksi oznake na prijedlog ministarstva, posebnom odlukom utvrdi Vlada Kantona“.

Amandman je neophodan iz razloga kada bi usvojili Zakon osam dana po stupanju na snagu svi taksisti bi bukvalno imali problema, tako da smo napravili jedan previd na Izmjenama i dopunama Zakona o taksi prevozu.

Ne znam šta još da kažem, tu sam na raspolaganju. Smatram da ćete da podržite, i predlažem da podržite Izmjene i dopune zakone prije svega kako bi riješili nelegalni rad taksista a prije svega i pospješili budžet Kantona Sarajevo. Hvala.

Predsjedateljica:

Hvala lijepo uvaženi ministre Fišo. Da li predstavnici radnih tijela žele riječ? Ne žele. Ima li pitanja?

Poslanik/zastupnik Mario Vukasović:

Zahvaljujem. Ja samo pitanje, nisam upratio da li ste obrazložili član 2 izmjena ovog zakona, na šta se on tačno odnosi, ova dopuna člana 21 Zakona. Piše u članu 21 stav 3, tačka a) iza riječi dio obaveza dodaju se riječi „čiji će iznos odrediti Vlada Kantona Sarajevo“. Pa možete i samo pošto nisam primijetio da ste u obrazloženjima ovog Zakona naveli. Fali isključivo obrazloženje za ovaj član. Hvala.

Ministar Mujo Fišo:

Zahvaljujem. Pa ja sam u svom izlaganju rekao na šta se to odnosi. Imamo dio taksista koji izmiruju dio obaveza. Član koji je usvojen na Skupštini kaže da svi oni koji su dužni 50.000 KM javnih prihoda, ako izmire dio mogu da dobiju dokumentaciju. Dio znači marku. On ako uplati marku mi mu moramo dati dokumentaciju. Mi se ne slažemo sa dijelom. Mi želimo da Vlada kaže koliki je to dio kako bi prije svega uveli red oko taksista. To je taj član.

Predsjedateljica:

Hvala lijepo. Otvaram raspravu. Nema rasprave. Zaključujem raspravu.

Ukoliko se (više) niko ne javlja za riječ, zaključujem raspravu.

MOLIM ZASTUPNIKE DA PRISTUPE IZJAŠNJAVANJU O PRIJEDLOGU ZAKONA O IZMJENAMA I DOPUNAMA ZAKONA O TAKSI PRIJEVOZU U KANTONU SARAJEVO.

Tko je za? Protiv? Suzdržan?

ZA JE GLASALO 28 ZASTUPNIKA, SUZDRŽANO ništa I PROTIV ništa.

KONSTATUJEM DA JE SKUPŠTINA DONIJELA OVAJ ZAKON.

Prelazimo na sljedeću tačku dnevnog reda, a to je:

AD – 5.

PRIJEDLOG ODLUKE O DAVANJU SAGLASNOSTI NA FINANSIJSKI PLAN ZAVODA ZDRAVSTVENOG OSIGURANJA KANTONA SARAJEVO ZA 2016. GODINU I ODLUKU O IZVRŠAVANJU FINANSIJSKOG PLANA ZAVODA ZDRAVSTVENOG OSIGURANJA KANTONA SARAJEVO ZA 2016. GODINU

Prijedlog odluke ste dobili uz vaš poziv za sjednicu. Molim predstavnika Predlagača da podnese uvodne napomene.

Ministrica Zilha Ademaj: UVODNO IZLAGANJE

Predsjedateljica:

Ako imate pitanja stojim na raspolaganju. Da li predstavnici radnih tijela žele riječ? Ne žele. Ima li pitanja?

Poslanik/zastupnik Sabina Ćudić:

Hvala ministrice. Ja bih samo da pojasnim pošto mi malo nije jasno vezano za ove dvije cifre za dvije glavne sarajevske bolnice. Kažete da su sredstava povećana u iznosu, ispravite me

ako griješim od oko 4 miliona za KCUS, 5,5, miliona. A smanjena su u iznosu od 440.000, znači gotovo pola miliona za Opštu bolnicu. Ova ustanova, znači naše zakonodavno tijelo usvojilo je izvještaje revizorske izvještaje zapravo, moram naglasiti da je Naša stranka jedina glasala protiv ovih Izvještaja obje ove zdravstvene ustanove, dok su kolege glasale za, i interesantno je da sada nam govorite o nekim nepravilnostima koje ste vidjeli u radu Opće bolnice Abdulah Nakaš, odnosno da je bilo prijavljeno više nego zaposlenih, da nisu utrošena određena sredstva i ono što se da na neki način nazrijeti između redova da su postojale određene malverzacije u prikazu dugovanja i jedne i druge ustanove s obzirom da se barate podatak koji vi iznosite, 95 miliona KM sa decembrom 2015 godine. Nije onaj podatak koji je usvojila ova Skupština na šta smo mi tada upozoravali. Odnosno upozoravali smo upravo na tu igru brojki koja je ja mislim tendenciozno iznošena radi nekih drugih aktivnosti koje se u zdravstvu u međuvremenu dešavale. Drugim riječima, interesuje me šta je posljedica uviđanja ovih nepravilnosti koje su se desile u Opštoj bolnici? Znamo ko je bilo rukovodstvo Opšte bolnice tada i čini se da novac prati određenu individuu u Kantonu Sarajevo koja je u međuvremenu prešla na KCUS dobila znači dodatna sredstva čini se na štetu Opšte bolnice, a pri tom identifikujemo određene. Posebno me interesuju ove nepravilnosti vezano za nepravilno prikazivanje broja zaposlenih. Hvala.

Ministrica Zilha Ademaj:

Ja ne bih rekla da su to nepravilnosti i malverzacije kako ste ih vi okarakterisali, ja bih prije rekla je možda u 2015 godini određeni broj ljudi, odnosno zaposlenika možda stekao uslove za penziju ili nije bio zaposlen iz kojih razloga može biti i zbog moratorija, tako da su ti ljudi bili priznati. Mi smo ih jednostavno samo skinuli sa ovog spiska priznatog kadra, kako se to ovdje terminološki naziva u ovom finansijskom planu. S druge strane, ja želim ovdje otvoreno da kažem, a to sam nekoliko puta isticala da je Opća bolnica u svom dosadašnjem radu prakticirala da pruža usluge i koje nisu u njenoj nadležnosti i za koje nije registrirana kao što su usluge tercijarne zdravstvene zaštite, i koje ona ne može pružati niti može razvijati i ova reforma koju smo inače najavili između ostalog podrazumijeva da svaka ustanova radi onaj posao za koji je nadležna i za koji je registrirana. Opća bolnica ne može pružati usluge tercijarne zdravstvene zaštite i one treba da se pruža tamo gdje im je mjesto a to je KCUS. A usluge treba da prati novac. Što se tiče tih dugovanja bilo je jako puno špekulacija oko iznosa dugovanja. Pa su se ta dugovanja kretala od iznosa od 65 do 110 miliona. Ovo je zvaničan podatak sa 31.12.2015 godine. 95 miliona. Koliki god da je taj iznos, pa čak i da je 65 ja mislim da su to ogromna dugovanja i da KCUS sa ovim povećanjem ne može riješiti taj problem i da će taj problem vjerovatno biti predmet rasprave ne samo ove Skupštine, možda i Federalnom parlamenta, ti dugovi se moraju izmiriti. KC je došao u situaciju da ne može pružati usluge zato što je obustavljena isporuka lijekova, isporuka potrošnih naročito laboratorijskog materijala, proizvođači opreme ne žele da servisiraju opremu tako da mnoge usluge dijagnostičke ne mogu da se rade jer je oprema van funkcije. Tako da ovo je kako bih rekla, kap vode u moru za KC.

Poslanik/zastupnik Segmedina Bajramović Srna:

Još jednom uvažena predsjedavajuća. Ja bih zamolila to je ono na čemu ja uvijek insistiram da dozvolimo uvaženoj ministrici da sjedne, pribilježi sva naša pitanja, da na kraju odgovori da ne vodimo ovako kontinuirano dijalog sa predstavnicima izvršne vlasti. Molim vas. Poslušat ćemo sva pitanja pa će nam ministrica odgovoriti, ako se slažete ministrice. Hvala. Tako je lakše.

Ja imam tri pitanja. Postavit ću pitanje koje sam postavila i na Komisiji za zdravstvo, ali važno je da ga čujemo i danas ovdje. U Financijskom planu predviđena su sredstva za liječenje u inostranstvu u iznosu od 2,8 miliona. Interesira me, s obzirom da imamo Pravilnik o uvjetima i postupku osiguranih lica na liječenje u inostranstvo a čija implementacija tereti

sredstva Federalnog fonda solidarnosti, šta predstavlja ova stavka u Finansijskom planu? Dakle ministricu zamolit ću za objašnjenje. Potom zanimljivo je da je predviđen iznos od 2.380.000 KM za finansiranje obaveza po osnovu zaključenih ugovora o socijalnom osiguranju i veći su za 28%. Mislim da bi trebalo navesti razloge, stvarne razloge za ovo povećanje. I zanimljivo je da su na stranici 25 finansijskog plana navedeni potencijalni rizici za ostvarivanje planiranih prihoda a jedan od navedenih rizika je povećanje procenta izdvajanja iz doprinosa za zdravstveno osiguranje u Federalni fond solidarnosti u toku fiskalne godine. Poznato je dakle, da je saglasno članu 82 stav 4 Zakona o zdravstvenom osiguranju Vlada FBiH na prijedlog federalnog ministra zdravstva za svaku kalendarsku godinu utvrđuje procent izdvajanja sredstava od ukupnih prihoda po osnovu doprinosa za zdravstveno osiguranje i za 2016 Vlada FBH je donijela odluku o izdvajanju sredstava u Federalni fond solidarnosti u iznosu od 10,20 %. Dakle za Federalni fond koji ostao ne promijenjen u odnosu na 2014 i 2015 godinu. Toliko za sada kada su pitanja u pitanju. Hvala.

Poslanik/zastupnik Predrag Kojović:

Ja moram reći da sam blago šokiran izjavama ministricu. Da jedna osoba koja je vodila Opštu bolnicu i počinila tako teške prekršaje kao što je pružanje određenog nivoa zaštite za koji nije imala pravo, ove sve znači nepravilnosti neprijavljeno i imenovan a da sada bude direktorica najvećeg KC a da ministrica iznosi ove podatke, a ne osjeća nikakvu potrebu da nam kaže koje su mjere, sankcije izrečene osobi koja je to radila u Opštoj bolnici? To je nešto na šta mi se sasvim sigurno nećemo pristati. Ja moram reći da smo iznenađeni ovakvim, jer smo očekivali upravo od ministricu da nam iznese ovo. A sada kada vidimo da nema toga ja neću zloupotrijebiti i zatražiti pauzu jer ovo nije tema koju ćemo mi lako pustiti s obzirom na sve ono što se događalo sa zdravstvom u posljednjih par dana. Više se ne može govoriti da se radi ovdje o slučaju. Slučaj spajanja bolnica preko vikenda, prenošenje sredstava sa Opšte bolnice, slučaj kolege Slaviše Šućura koji nam priča o instrukcijama u Domu zdravlja itd. Ja neću sada ovdje da ulazim u teorije konspiracije i kako bih rekao ko radi na svemu ovome ali vidite, mi ako sada ne uspijemo do kraja ove tačke dnevnog reda istjerati mak na konac mi ćemo se vratiti vrlo ozbiljno. Hoću da kažem nećemo prestati da se bavimo ovim jer mislim da se radi o vrlo ozbiljnim stvarima. Jednu osobu koja dopusti da jedna JU pruža usluge za koje nije nadležna to je za nas kako bih rekao isto on o što smo imali kod Gold minjona koji je dijelio proizvod za koje nije imao. I to postaje kako bih rekao simptomatična stvar za ovu Vladu. Hvala.

Poslanik/zastupnik Rasim Smajić:

Mala jedna replika kolegi Kojoviću. Profesorica Izetbegović nije vršila te usluge zdravstvene tercijarne ona je naslijedila to kada je došla u JU Abdulah Nakaš, samo je nastavila i pred sami kraj mandata je prekinula s tim. Znači ženi je trebalo vremena da uvidi da se to nezakonito radilo. Hvala.

Poslanik/zastupnik Sabina Ćudić:

Pitanje za ministricu i premijera, ispravite me ako griješim. Gledam trenutno u finansijski izvještaj koji je usvojen za 2014 godinu u februaru 2015 godine koji je ova Skupština, ponavljam, usvojila, gdje se spominje dug za ovu ustanovu od 11 miliona KM. Interesuje me kako smo došli, odnosno ako griješim pošto imamo jako malo vremena da sada pogledamo, ali ako griješimo o ovom iznosu koji ovdje stoji od 11 miliona, o kom smo iznosu glasali, da se tačno kaže za KC i za opštu bolnicu, ako danas govorimo o 95 miliona. Onda koji je to dug koji se nagomilao u samo 2015 godini. Je li moguće da smo zaista? Dakle interesuje me ako je danas 95 miliona koji je iznos stajao u izvještaju koji je ova Skupština usvojila prije godinu dana?

Predsjedateljica:

Hvala lijepa. Ako nema više pitanja, molim vas ministrice ako želite odgovoriti odmah izvolite, hvala premijeru.

Premijer Elmedin Konaković:

Ja radi kontinuiteta mogu o nekim stvarima u kojima ministrica nije, zaista uz dužno poštovanje moramo shvatiti njenu ulogu u cijeloj ovoj priči. Ona je tu nešto više od tri, koliko ima, četiri mjeseca. Ja ću to podijeliti u ta dva segmenta. Prije svega ovo što danas vidite kao dokument i prijedlog Vlade je nužno zlo da nestane sistem u Kantonu Sarajevo i nismo zadovoljni ni izbliza reformom zdravstva koju smo hrabro najavili. Ako se negdje može kritikovati Vlada Kantona Sarajevo može vjerovatno na više polja, ovdje se može kritikovati najviše. Ja ću vam reći neke objektivne razloge zašto je to tako. Dakle, o jednom smo danas govorili. Budžetska inspekcija mi smo je poslali tamo 2013 i 2014 je ustanovila niz nepravilnosti, ne smijem o tome previše govoriti dok ti nalazi ne budu finalni, tamo se stvari dešavaju katastrofalno godinama. Malo se toga i danas promijenilo. S ove sam ja govornice prvi otvorio front u zdravstvu činjenicom da smo tada imali na devet strana finansijski plan. On je danas malo detaljniji. Suštinski se ništa nije promijenilo. U našim nastojanjima da reformišemo ZZO još uvijek nismo uspjeli. Na tom smo putu čini mi se sada bolji nego što smo bili prije par mjeseci ali mi nismo ni blizu uspjeli osposobiti osnovni mehanizam za reformu zdravstva. On se zove ZZO. Zbog toga i mi budemo šokirani informacijama koje danas izgledaju nama koji bi trebali imati pristup svim informacijama potpuno drugačije od onoga što smo kao zastupnici, ili evo sada kao premijer i ministrica imali priliku zvanično dobijati iz tih ustanova. Podsjetit ću vas samo na nekoliko stvari, i zaista mi je žao ako opet priču o reformi zdravstva skrenemo na ime jedne osobe koja možda drugačije vidi rješavanje ove cijele situacije nego mi. Radi svoj posao, ocjenu njenog posla možemo izdvojeno posmatrati kroz te izvještaje o radu jedne i druge ustanove. Ako danas to bude, kao što obično biva oblak nad pričom o pravoj reformi zdravstva, zanemarit ćemo zaista neke vrlo bitne za nas stvari, u kojima ima toliko politike koliko ni iz bliza ne bi smjelo biti u zdravstvu. Dakle, KCUS nije naš. Mi ne možemo nikada reći i ovih 95 je tačno. Ne znamo jel tačno. Imamo 2 od 11 predstavnika UO. Imamo Federalnu Vladu koja nam to imenuje i vodi proces. I imamo Zavod koji to finansira. Dvotrećinski ili više. I kada mi hoćemo da ozbiljnije uđemo u procese i krenemo odozgo tri hiljade ljudi krene i kaže slučajno nam nemojte smanjiti dotaciju jer ćete zaustaviti život u Kantonu Sarajevo. I to je tačno. To je kičma pružanja zdravstvenih usluga. Bez tog tercijarnog nivoa zaštite nema zdravstva. I mi pod pritiskom javnosti, i vas i doktora i bolesnika, pacijenata svaki put popustimo i kažemo dat ćemo koliko treba para. Kako se te pare troše? Nemamo pojma. Dakle KC nemamo pojma kako se troše. Imamo, znate kad? Kad nas je bivši direktor tri puta zvao na hitne sjednice. Tu su predstavnici Zavoda da mu se iz sredstava rezervi posudi 10 miliona jer su gore zaustavili isporuke oni čijim se lijekovima liječe najteži pacijenti. I to je stalno tako. Stalno su vam nad glavom dobavljači kojima se dužno ne znam koliko para ali su cifre ogromne. Prije nego što smo mi počeli raditi u tim papirima stoji a su takve pozajmice konstantno davane KC. Na šta su trošne? Nemamo pojma. Koliko ima gore ljudi da radi? Nemamo blage veze. Nikada nam na pamet nije palo da u to što nemamo blage veze integrišemo našu Opštu bolnicu. Preko noći onako kako vi nama kažete pozivima nekim telefonskim, nekim papirom od kojeg mi nismo vidjeli ni jedan akt da je bilo ko od nas potpisao dao uputu, naložio, naredio. Osjetio sam potrebu da sa svog kratkog odmora umiješam se u tu javnu raspravu o priči o integraciji Opšte bolnice i KCUS. Ne postoji niko normalan na ovoj poziciji ko bi rekao, to može, prije nego se riješe sva prethodna pitanja. Osnivački akti KC. Broj jedan njegov statut. Njegova pozicija u društvu. Ovo što kažete godinama se pružale usluge. To je tačno. Znaate zašto? Jer je i prije prof Izetbegović bivši direktor, od ovog ili nekog drugog organa bio obavezan da pruži uslugu onom bolesniku koji tamo dođe. Tamo ima ljudi koji rade u sistematizaciji ih nema. Ne postoje u

sistematizaciji a rade, obavljaju te djelatnosti. Mi nismo nikad razdvojili taj sekundarni i tercijarni nivo zdravstvene zaštite. Nikad. Kada smo u to krenuli, onda je na nas bila hajka što to radite, spajate bolnice. Ne, mi ćemo to uraditi. Dakle, naša vizija je da KC bude nivo pružanja tercijarne zdravstvene zaštite i samo to. Da više ljudi ne trče ono što treba da rade domovi zdravlja da radi Klinički ili da radi Opšta. Ili obrnuto. Ili da se ne zna šta ove dvije ustanove u kantonu rade jer nam je preskupo. Bili smo u posjeti Opštoj bolnici. Razgovarali sada o njihovom deficitarnom kadru, dozvolit ćemo zapošljavanje deficitarnog kadra, da ona ima svoju funkciju ali ne ono što dupliramo. Nećemo te polupune kapacitete u Opštoj i na Kliničkom i da onda oba segmenta ne funkcionišu. Finansijska policija, inspekcija federalna inspekcija i kantonalna su trenutno u KC. To su informacije koje smo dobili i iz medija, provjerili i oni su tačni. Koliko je gore primljeno ljudi prošle godine, koliko je prošle godine bilo? I to je s jedne strane politike napuhano, s druge strane politike je netačno prikazano. I ja nemam hrabrosti da danas kažem ovo ili ovo jest tačno. Ne znamo to. Šta smo ovdje uspjeli? Ovdje smo uspjeli malo blago promijeniti svijest ovih ljudi na ovim pozicijama na kojima je Vlada bitna. Te famozne komisije, tamo se u ZZO trošilo stotine hiljada KM na komisije ljudi koji tamo rade. U toku radnog vremena kupovani su im telefoni, kupovani su kompjuteri najsavremeniji, po 15.000 imaju godišnje za rad u komisijama koje su opis njihovog posla. Toga nema, nema onih famoznih renoviranja zgrada, nema puno stvari na koje smo mi mogli uticati. Sada kada je riječ o struci, mi krenemo u reformu liste lijekova nas čeka federalni propis koji kaže referalna cijena minimalno 10 KM. Kupujemo lijek za 10 on na tržištu košta tri. Apelaciju Ustavnom sudu, ja sam to razgovarao s ministricom, ću ja podnijeti narednih sedmica, ako to Ministarstvo ne promijeni. Da ovu famoznu brojku od 70 miliona promijenimo. Da na njoj radimo uštede. Da razdvojimo zašto smo sada još u problemu. Krenuli smo u jedinstvenu metodologiju donošenja propisa. Dijagnosticiramo ono što smo mi prepoznali, ali sada zvanično. Četiri ustanove se ne prepoznaje jedinstvena metodologija. Medicine rada, ove medicine zavod za zaštitu žena i materinstva. Neke smo formirali nepotrebno. Nemoguće, ne nepotrebno, nego nezakonito postoje i još su njihove stavke na budžetu finansiranja ovdje. Svaka ima tri miliona, 2,4, ili 1,6 milion. Svaka ima uposlene, svaka ima ljekare, i opet se vraćamo na nivo pružanja zdravstvenih usluga u Kantonu Sarajevo koji je katastrofalan. Dakle, nikakvih nemamo pritisaka niti na nas niko može uticati. Opredjeljenje da li da spašavamo KC za mene nije dilema. Nemamo mi izbora da ga spašavamo ili ne. Nemamo izbora, dakle ne možemo ga ostaviti. Nismo ga mogli ostaviti ni u prošlom mandatu kada nije bio predstavnik ove politike nego druge. Nego smo se snalazili kako znamo da taj KC ne umire, a li on je evidentno umire. Dakle, sada imamo ono što je dobro u cijeloj ovoj priči, iz ovog vulkana će izaći i problemi o kojima se nije smjelo pričati. Dakle, činjenica da dominiraju politike i klanovi u zdravstvu godinama u Kantonu Sarajevo. I da se mi svi krećemo između jednog, drugog trećeg, četvrtog. I ta četiri klana, koji imaju svaki svoj ego i svaki svoj interes, kako politike pobjeđuju, dominiraju. Ovdje nas to ne zanima. Niti će dominirati. Nego se bavimo suštinom u kojoj to za sada loše. Mi smo još uvijek u sudskom sporu sa direktorom kojem sada u aprilu sada ističe onaj mandat. Još nije drugostepeni riješen, da li će nam Gavrankapetanovića sud vratiti na posao. Vratio nam je pola UO, napominjem, koji nije bio stav ovih politika. Ali još jedna napomena. Ti ljudi odlično rade posao ovi što ih je sud vratio. Oni rade vrlo korektno svoj posao, nismo ih mi izabrali. Ovaj jedan direktor je smijenjen sada nas je ponovo tužio. A tužio nas je, pobijedili smo ga u onoj smjeni, nije bio privremenom mjerom vraćen, sada traži nadoknadu. I još jedna stvar, ovom kom ističe u aprilu, ovdje nisam vidio sredstva. Do marke ćemo platiti svaki dan koji nije bio direktor. Do marke. Jer je na jednoj sjednici Vlade razriješen i imenovan kao vd. Pobijedio nas je na sudu. To pravobranilac, svaki pravnik vidi, nemamo šta tražiti na sudu. Svaku ćemo marku takvom platiti. I mi rasvjetljavamo takav čvor, u zdravstvu u kojem stvarno ima uticaja politika. Pa s jedne strane graja da je to spajanje bolnica. Kako ćemo ljudi spojiti bolnice' kako možemo formalno spojiti bolnice? Kada je Prof Izetbegović išla s

Kliničkog u državnu, 25 ljekara je otišlo za njom u državnu bolnicu. Ti ljudi sada se nisu mogli vratiti gore, a htjeli su da se vrate gore. Kako da zabranimo ljekaru koji hoće da se vrati za njom u bolnicu? Koji da otkaz na mjesto na kojem radi. Ne možemo mu to zabraniti. Ne možemo. To je nama nemoguće. Spajanja formalnog bolnica nemoguće. Al da ćemo ovu napraviti da bude sekundarni nivo, mi to želimo. Da se u njoj pružaju usluge koje su normalne a da se gore rasterete i da se pružaju te usluge tercijarnog nivoa zdravstvene zaštite. Da se u domu zdravlja u kom još uvijek imamo i tamo jedan spor. Imamo zahtjev Unije veterana da direktor ostane, imamo Tužilaštvo koje vodi spor u domu zdravlja. S ovim i bivšim direktorima, to je nama danas zdravstvo. I uglavnom je tako. Zato što smo se identificirali kao pripadnici jednog od ovih klanova u zdravstvu. I dok to ne prestanemo raditi, ja ne vjerujem da ćemo imati poboljšanje u zdravstvu. Ovo što danas ovdje stoji i nadam se vrlo kratkog daha, da će ova jedinstvena metodologija zaživiti što prije, da ćemo što prije mi formalno integrisati dvije, tri ustanove u zdravstvu. A ćemo što prije cijenu referalnog lijeka riješiti. Da ćemo naše domaće proizvođače koji su katastrofalno pozicionirani ovdje, ne postoje. Jedva su vidljivi pozicionirati hrabro i reći Međunarodnoj zajednici i svim ambasadorima koji meni pune kancelariju da pristajemo na reciprocitet. Koliko god nas ima u Sloveniji nek ima njih ovdje i duplo više. I u Hrvatskoj i u Makedoniji i u Srbiji. Duplo više nudimo jer ih nema. Pojeo nas je strani lobi, pojeo nas je naš klanski lobi koji se stalno prepire i mi ne govorimo o suštini pružanja zdravstvenih usluga. Godina je predizborna. To je kampanja sada. Gradimo kampanje jedni na napadu na Opštu bolnicu, drugi na odbranu Opšte bolnice. Znači to je stvarno ljudi loš put za reformu. Mi smo najviše krivi. Ne tražimo mi tu krivca ni u kom. Ali ćemo odoliti ako uspijemo danas ovaj Finansijski plan izglasati da u narednih par mjeseci uradimo ono što je za nas obavezujuće. Integracija JU, smanjenje cijene liste lijekova, drastično smanjenje njene potrošnje. Kontrola, mi još nemamo kontrolore propisivanja u ZZO ni dan danas. Mene je sramota jer sam to govorio prije godinu dana s ove govornice. Oni nisu dio sistema Vlade. Zato sporo na to možemo uticati. Nisu. Jer ovdje kada neko Ministarstvo ne štima, resorni ministar popravi. Ovdje ministrica je izdvojeni organ u odnosu na Zavod. Imamo novog vd direktora dva mjeseca tamo. Evo dva i po. Dakle imamo tek čovjeka koji je ušao, plus nisam zadovoljan jer stari saradnici koji tamo rade ne rade ništa da se stanje popravi. Naprotiv. Rade sve da se stanje ne popravi. Većina. Uz par svijetlih primjera. I onda nam dođu njihove platne liste, njihova primanja po komisijama, njihovi apple računari, njihovi kompjuteri, sve njihove beneficije i potpuno je jasno kako je to moguće. Dok se tu ne uspostavi malo bolji sistem, mi smo kao Vlada u teškoj poziciji. Ne tražimo alibi. Ali ovo je činjenica. Dakle, KC sada da promijene direktoricu mi ćemo ostaviti ovih pet miliona i više od tih sredstava jer će nam zakucati za mjesec dana ponovo po pozajmicu. Ponovo će nam zakucati po pozajmicu. Tamo više neće biti ovih visokih plata, to smo uredili zakonom. Tamo se očekuje taj sad benefit koji također ovdje ne vidimo. Ne vidimo da su oni smanjili to. Blago jesu a sjećate li se , svake godine su rasle plate. Svake godine smo ovdje konstatovali da je na izvršenju i u planu za narednu godinu. Ovdje više nemate onih famoznih vanjskih saradnika. 23 pravnika u Zavodu, i stručni tim pravnika plaćeni stotinama hiljada maraka koji brane direktora. Toga nema. Nema rekonstrukcije nove zgrade 1,9 miliona. Ortopedska pomagala raščlanjena. Sve se vidi šta su ortopedska pomagala. A tu moram, znam da je ovo dugo, a tu u tim ortopedskim pomagalima je donesena odluka ministra da se sada to radi preko onih privatnih pa nam se povećala potrošnja drastično. I ni to nije promijenjeno još. To su stvari koje su trenutno stanje. Ko što smo na ovom Zakonu sve dobre prijedloge prihvatili, svaki smo prihvatili u prošlom, na budžetu, sve smo prihvatili. Svaki ćemo prihvatiti u zdravstvu. Svaki prijedlog poboljšanja stanja ali nećemo više upadati u zamku rasprava o tome jel to bio Sekin, Farisov, Šankin ili neki drugi lobi koji bi trebao u ovom dokumentu imati svoju poziciju. Sve što imate konkretno nama da predložite mi kao Vlada prihvatamo.

Predsjedateljica:

Hvala lijepo premijeru. Za riječ se javio gospodin Kojović, izvolite. Samo trenutak jedan. Ovo je pitanje, je li tako? Rasprava. Ministrica želi prvo da odgovori na pitanje pa zato. Izvolite. Sporo reagujete, poslije ručka pa zato.

Ministrica Zilha Ademaj:

Predsjedavajuća ja zaista imam potrebu da odgovorim na pitanja i poslanice Srna, a i poslaniku Kojoviću. Prvo ću krenuti od ove konstatacije poslanika Kojovića koji je rekao da je šokiran mojoj izjavom da se u Općoj bolnici pružaju usluge tercijarne zdravstvene zaštite. Ja vam mogu reći da sam ja šokirana zatečenim stanjem i da sam šokirana vašom izjavom jer Opća bolnica već punih 10 godina pruža usluge tercijarne zdravstvene zaštite od kojih ću ja nabrojati usluge neurohirurgije, vaskularne hirurgije, maksilofacijalne hirurgije. Zapošljavali su kadrove u tim djelatnostima a nisu trebali time da se bave. Između ostalog i vi poslanici u ovoj Skupštini ste odobravali njihove programe rada, njihove finansijske planove, njihove izvještaje o izvršenju programa rada i finansijskih planova i meni je čudno da niste imali tu informaciju čime se bavi Opća bolnica jer su svi njihovi akti razmatrani između ostalog i u ovoj Skupštini. Ja sam naglasila da je to sastavni dio reformskih procesa, da Opća bolnica kako joj samo ime kaže Opća bolnica može da se bavi samo sekundarnom bolničkom zdravstvenom zaštitom. A nikako tercijarnom. A ona se godinama a ja mislim da ima čak i više od deset godina kada je uspostavljena tamo neurohirurgija. Ona tu djelatnost ne može obavljati i nema čak u ovom trenutku nema ni uvjeta da ih obavlja jer ima samo jednog neurohirurga. Ali i jednog vaskularnog hirurga i jednog maksilofacijalnog hirurga i naravno da te discipline tako kadrovski destruirano. Mislim nisu destruirane nego nisu nikada ni uspostavljene ne mogu funkcionirati. A sada ću se vratiti na pitanja poslanice Srna. Ona je postavila pitanje vezano za troškove koji su predviđeni za liječenje u inostranstvu. Od 2,8 miliona maraka, od tih 2,8 – 2,3 miliona maraka se odnosi na uplate paušala prema zemljama članicama potpisnicima ovog ugovora o socijalnom osiguranju. To su bilateralni ugovori koje mi imamo zaključeno sa većinom europskih zemalja a najveći dio se odnosi na zemlje bivše Jugoslavije, Srbiju i Hrvatsku zato što najveći broj naših građana koji su živjeli ovdje, sada borave u tim zemljama. Ili su naši penzioneri ili su u tim zemljama radili i stekli uvjete za penziju ili moža još rade, a članovi porodica njihovi borave ovdje a po tim sporazumima imaju pravo reciprociteta na korištenje zdravstvene zaštite. A pošto je više naših građana u tim zemljama onda je logično da je naš dug prema tim zemljama, odnosno da su naše obaveze veće nego što su obaveze tih zemalja prema BIH. Samo 500.000 KM je predviđeno za pomoći ili refundacije dijela troškova koje naši građani plaćaju za liječenje u inostranstvu a koja ne mogu ostvariti preko Federalnog zavoda osiguranja na teret sredstava Federalnog fonda solidarnosti. Vi ste spomenuli ovaj Pravilnik o liječenju u inostranstvu on zaista je donešen 2014 godine i u primjeni je međutim ima dosta oboljenja koje se ne mogu ovdje liječiti, a koja tim pravilnikom nisu regulisana zbog kojih se pacijent upućuje na liječenje u inostranstvo. Ja na žalost moram konstatirati i to da je jako veliki broj naših građana koji žele da idu na liječenje u inostranstvo zbog toga što ili smatraju ili nisu uspjeli da ostvare zdravstvenu uslugu u našim zdravstvenim ustanovama onakvu kako bi trebali da je dobiju. Ovo što se tiče rizika, vi ste istakli jedan rizik. Naravno ima više rizika. Tamo ja mislim da svi u ovom finansijskom planu pobrojani, a koji mogu biti potencijalno rizik za ostvarenje prihoda, jedan od tih pomenutih rizika je i eventualno povećanje ove stope doprinosa za Federalni fond solidarnosti jer je ona od 2002 godine kada je uspostavljen taj fond bila 8%, pa se povećala na 9%. Od 2014 je 10,2%. Tako da s obzirom da raste broj zahtjeva i broj pacijenata koji traže liječenje u inostranstvu a ta stopa je uglavnom povećana iz tog razloga zbog stupanja na snagu Pravilnika o liječenju u inostranstvu, postoji mogućnost da eventualno dođe do novog povećanja, ali i da ne dođe povećanje na svako povećanje prihoda od doprinosa sa uvećanom stopom izdvajanja za Federalni fond solidarnosti je logično da se izdvajaju i veća sredstva.

Također je rizik da se može desiti smanjenje postojeće stope doprinosa za zdravstveno osiguranje, to nam je davno najavio MMF. I nije isključeno da se to desi. Hvala.

Predsjedateljica:

Hvala lijepo. Da li je to pitanje ili replika?

Poslanik/zastupnik Predrag Kojović:

Nekoliko samo kratkih replika. Ministrice vi ste novi ja to vam uzimam kao olakšavajuću okolnost. Vi zato ne znate kako smo mi glasali povodom izvještaja i planova rada ovih institucija čime smo izražavali svoj odnos između ostalog prema ovim praksama o kojima vi govorite. Ali zaista nekako ne znam predsjedavajuća vi recite ako smatrate da ovo nije što ću sada govoriti dio ali ja mislim da jeste dio kada pričamo o ZZO, ona su naravno ove dvije institucije predmet diskusija ovdje. A moram nekoliko stvari koje je premijer rekao da odgovorim. Ne mogu da trošim puno vremena. A nešto o čemu sam puno puta govorio o tome da premijer Kantona Sarajevo koji dolazi iz SDA govori o premijeru FBiH koji također dolazi iz SDA kao jednoj neprolaznoj prepreci ili o nekoj strani s kojom se nemoguće dogovoriti i kao da neke nadležnosti između FBiH i Kantona je nemoguće kao da oni ne dolaze iz iste političke opcije i nemaju kako bih rekao iste programe. Naravno premijeru da je stanje u ZZO loše. Zato što ste u prošlom mandatu vaša stranka na čelo UO tog najvećeg vanbudžetskog fonda u Kantonu Sarajevo imenovali čovjeka koji je osuđen za krivično djelo prevare u produženom trajanju i dali ste mu da upravlja tom institucijom i nije mi, kako bih rekao, da li očekujete od nas simpatiju što se bavite, što imate ogroman broj problema koje i su posljedica vaših prethodnika koji također dolaze iz vaše stranke. Vi kažete također mi ćemo to uraditi. Ja neću stvarno da ulazim u objašnjenje šta to znači, vi ćete to uraditi uprkos volji koja će biti izražena u federalnom ili kantonalnoj Skupštini ili ne znam, niste ponudili objašnjenje ali ste nam vrlo kako bih rekao precizno iznijeli koje su vaše namjere. Kada kažete da nemate pojma zapravo koliki je dug znači očekujete da mi sastavimo sa 85% jel tako otprilike finansiramo KC iz ZZO? Znači koji ima 340 miliona, znači 85% od 340 miliona ide u instituciju o čijem dugu mi nemamo pojma. Ja ne znam kako je moguće nemati pojma. Ja pretpostavljam da svaki član UO, pa i naša dva od 11 moraju dobiti sve informacije o poslovanju te kuće. Znači da imamo jednog mi bi smo morali imati istu informaciju koju imaju ostali članovi UO. A pri tome tih drugih 9 članova UO, također imenuje Federalna Vlada odnosno SDA čiji je to premijer. Također ste govorili nešto o imenovanju ljudi. Ja neću sada tu temu da potežem namjerno o etničkoj strukturi ljudi koje ste neki dan na Vladi imenovali, pričali smo ranije u nekim prilikama o tome. Ja znam vaš lični odnos prema tome i probleme s kojima se susrećemo ali to su stvari na koje moramo insistirati. A recimo samo ću jednu stvar istaknuti ovdje za kraj ovog. Znači kada čovjek doživi srčani udar već se zna dugo, skoro 25 godina je ta tzv. PPE metoda u primjeni u savremenim centrima postoji onaj jedan kritični sat se zove nazvan je „zlatni sat“ gdje može da označi razliku između života, smrti, invaliditeta i normalnog života koji je ukinut na KC iz sljedećeg razloga: postojala su četiri obučena tehničara koji su to radili, međutim ljudi su odbijali da budu na stand by kako bih rekao 24 sata sedam dana sedmično. I onda je krenulo se u obuku dodatna četiri tehničara koji mogu raditi tu urgentnu kateterizaciju u tih prvih 60 minuta. Oni su radili na ugovoru o djelu. 01. januara nova direktorica je raskinula sve ugovore o djelu i na taj način eliminisala ove četiri tehničara i tako da se trenutno metoda „zlatnog sata“ ne primjenjuje na KC. Na KC kome sada dajemo dodatnih 5,5, miliona na dug o kome nemamo pojma, a uzimamo od bolnice sa kojom u principu vi zapravo ne znate šta da radite jer vi mislite da treba da ima Sarajevo jednu bolnicu. Da treba da ima jednu sekundarnu jednu tercijarnu. Vidite, mi ćemo se uključiti, također se spremamo i nadamo se da će do toga doći do tematske sjednice Federalnog parlamenta o reformi zdravstva. Ali ja mislim da smo u ovih 10 minuta koliko su

premijer i ministrica govorili otkrili više stvari nego iz posljednja tri finansijska izvještaja koja smo dobili i analizirali ovdje gdje kroz govor brojki određeni stavovi i razmišljanja jednostavno nisu bili iskazani, nisu nam bili poznati. Ja ne očekujem sada ako ćete premijeru sada otvarati dalju priču ja ne bih išao to. Ali za mene je poražavajuće da će nas 35 treba da glasa za 300 i nešto miliona od kojih će 85 biti utrošeno u ustanovi o čijem dugu i generalno o finansijskom stanju pojma nemamo ali zato o čijim uslugama i kvalitetu tih usluga svak od nas može ponuditi svjedočanstvo koje je poražavajuće. Hvala.

Poslanik/zastupnik Mirsad Pindžo replika:

Zahvaljujem. Imam potrebu replicirati i ministrici i premijeru. Uvažena ministrice, Skupština Kantona Sarajevo i zastupnici u Skupštini nisu ni zdravstveni radnici ni pravnici ni ekonomisti, različitih profila, zanimanja i tačno je i uvijek će se naći, i treba da ima određena većina parlamentarna koja će usvajati programe, samo nemojte zaboraviti, nemojte prebacivati na nas odgovornosti, na skupštinu i mijenjati teze jer svi ti programi prije nego dođu na ovu skupštinu imaju mišljenje ZZO, mišljenje Ministarstva zdravstva i stav Vlade. Prema tome, sve što dođe ovdje, prvo dođe od stručnih institucija koje ova Skupština osnovala da bi bila suport i da bi dala stručnu elaboraciju i mišljenja da bi zastupnici koji nisu tih zanimanja mogli cijeniti i dizati ruku za ili protiv. Kada je u pitanju Finansijski plan ZZO mislim da ne treba da se brinete, ova Skupština je dovedena u takvu poziciju danas je 30. mart. Zavod, finansijski plan će biti usvojen jer da ne bude usvojen, pa koga ćemo kazniti? Kaznit ćemo građane Kantona Sarajevo koje ovdje zastupamo i naravno zdravstvene uposlenike. Zbog toga što neko u sistemu državnih institucija nije uradio svoj posao. Naravno da ova Skupština to neće dozvoliti bez obzira na stavove pozicija opozicija. Ja vas molim premijeru nemojte nas više, potpuno uvažavam ovo što ste vi govorili, ja neću govoriti o struci i o zdravstvu jer ne znam o tome ništa, pa da ulazim u tu temu ne pada mi na pamet. Al vas molim nemojte se braniti vlasničkim odnosima u KC, koliko je članova UO, 2 od 11, to je samo malo manje ih imenujete vi, a malo više neki drugi SDA nivoi vlasti, i nikakve veze nema sa provođenjem zakona u oblasti radno-pravnog statusa, radni zakoni, finansija, ZZO, nikad niste dobili informacije od upravnih odbora, i nećete ih ni dobiti koristite alate koji vam stoje na raspolaganju. Oni koji su osnovali da u skladu sa zakonom, vama i nama pribave te informacije. Vi imate upravu inspekcija, i za radne odnose i zdravstvo, i finansije, imate budžetsku inspekciju, je li normalno i logično da u medijima čitamo da je direktor, koga kažete na jednom on vas pobijedio, a na jednom vi njega, potroši 26 000 KM i ograđujem se, govorim uslovno jer ne znam je li tačno, u medijima sam to pročitao, da potroši za mjesec dana telefona? I tu informaciju imaju portali prije nego je ima Vlada i Skupština Kantona kao vlasnici i oni koji upravljaju tim kapitalom i tim ustanovama. To nije normalno. Ja vas samo molim radite svoj posao. Drugo, ako treba praviti peti klan, ja ne sumnjam u to, vi ste rekli imaju četiri, nije uopće bitno ko je vladajuća većina ko je UO, ko je menadžment. Imate Zakon, imate alate za provođenje tog zakona, koristite ga. Zar to smeta Vladi Kantona? Slušali smo mi tu priču i prije godinu dana, nije bitno koja je Vlada bila. Istu ovu priču smo imali ko i prošle godine i vrlo je mala razlika u finansijskom planu. Ko je branio Vladi Kantona i u prethodnom sazivu i u ovom da donese program zdravstvene zaštite? Ko je branio ovoj Vladi ili prethodnoj da primijeni jedinstvenu metodologiju i da finansijski plan napravi u skladu s tim. Nije niko. Znači nemojte čekati od nekoga, ja ću vam čestitati kada budete povukli poteze i uradili u skladu sa zakonom i vašim ovlaštenjima koja imate. Znači samo vas molim nemojte se više kriti iza nekoga tamo. Vi ste ti koji to trebaju napraviti. Mi to od vas očekujemo, zato i jeste Vlada Kantona i budite i odgovorni kao što se i predstavljate. Hvala lijepo.

Premijer Elmedin Konaković:

Da sad ovo sve do kraja otvoreno rasvijetlimo i da počnemo jednu novu eru koju imamo u većem dijelu procesa, dakle. Ovoj Vladi je to branio s vremena na vrijeme telefonski poziv iz nekih kafana sarajevskih koji kaže to što ste vi u tom Ministarstvu tamo zamislili nemojte to raditi. Nemojte ta imena koja kod vas prođu, promijenite, sačekajte. Prije dolaska ministricе Ademaj. To je branilo Vladi. Jer to kreće iz ministarstva. Takvi procesi kreću iz ministarstva. Mi se dogovorimo, potišemo koalicione sporazume, stavimo prioritete, reformu zdravstva kažemo: integracija, ušteda, liste, onda se popije kafa u nekim kafanama ovdje, počnu se telefoni zivkati u Ministarstvo odakle dolaze akti, i nema akata. Nema reforme, nema integracije, nema ujedinjenja, nema reforme liste, nema manje cijene jer je bivši ministar sebe imenovao u tu, ne kažem ja, ja sam ovim svojim pokazao šta mislim o nekim kadrovima iz moje političke partije i o njima sam s ove govornice govorio i djelovao. Pokazao šta mislim o načinu imenovanja tih direktora njihovim procesima, vođenju, finansijskim planovima, borimo se ko lavovi s tim. Ma to je stvarno vrlo organizovan sistem koji pruža ozbiljan otpor i ukoliko se mi ovdje ne dogovorimo da nam to ne bude bitno, nego da sva ministarstva, a tako je i krenula ministrica Ademaj, isključivo zato nemamo jedinstvenu metodologiju. Zato i nemamo godinu dana. Zbog je nemamo jer ona ovo podrazumijeva. Šta ste pružili KC koliko ste nam usluga izvršili evo vam para. Možda više od ovoga, ali onda manje nekom drugom koji po istom odnosu to uzima. Sjednu na sastanku, zadnji sastanak mi je žao što nismo snimili pa pokazali vama kako izgledaju naše JU na sastanku otimajući se da istu uslugu pruže jednom pacijentu. A ni trebaju nam ni ovi ni ovi, jer se ta usluga pruža u primarnoj zdravstvenoj zaštiti, može sve u domu zdravlja. Kako smo i na koji način to do sada vodili evo ja stvarno apelujem i primjerom to pokazujemo da nas to ne zanima. Kako će se politike prema tome odrediti ne zanima nas. Jer je ovo na rubu izgleda zdravo izvana, ima 350 miliona, ogroman je to fond, a unutra imate strašan status srednjeg medicinskog kadra. Loše plate, male plate, preopterećeni ljudi, bježe nam u Njemačku. Znači sada nam se otvara rupa u koju možemo svi upasti. Da ljudi pobjegnu pri tom iz istog tog sistema dolaze plate tih direktora i njihovih saradnika iz njihovog kabineta u kojem ste to javno mogli vidjeti u KC, 13, 15, 11, 9.000. oni ispod 6 ne čitamo ih. Ne čitamo. Bio je spisak od 50 od toga ih je 30 preko 9. evo možda nije, nego je 15 preko 9000 mjesečno. To je nama stanje u zdravstvu. A istovremeno liste čekanja, oftalmološki obični pregledi dijagnostika, primarna zdravstvena zaštita, drama. Drama. Od sinoć meni pišu da je tamo ljekar istjerao roditelje s djecom iz doma zdravlja u 8, rekao gotovo. Od pola 6 do 8 ga čekali, u osam rekao ja idem kući. I zovnuo im policiju da izbací pet roditelja iz ambulate. To je nama trenutno stanje. I tražio sam od nekog čovjeka da mi pošalje te informacije, ni mi još dao ime. Odmah smo to tražili. Dakle, gospodin Kojoviću je u svakoj diskusiji o zdravstvu SDA, pa zdravstvo, pa opet SDA, pa zdravstvo pa 14 puta SDA a onda nešto o zdravstvu. Dakle, tako stoje stvari. A ja bih više volio, slažem se ja, preuzeo sam to na sebe. Slažem se da je tih grešaka bilo, ogromnih grešaka, propusta, sve se slažem. I slažem se da to moramo početi popravljati. Što sam ja igrom slučaja isto SDA to niko ne valorizira, ne tražim to jer nisam, evo s ove pozicije govorim objektivnije. I nije u tome problem. Evo dajte da se takmičimo ko što stalno radimo dajte nam prijedlog za KC. Sve je tako kako sam ja rekao i kako ste vi ponovili. Šta da radimo? Da prekinemo finansirati ono za šta ne znamo kako se troši. Kako ćemo to uraditi? Evo Akšamija gore radi. Šta će nama odozgo reći ljudi koji rade. 95% njih pošteno, časno i za malo para. A 5% njih drži monopol nad procesima u zdravstvu i u stanju je sa ministrom, kažete mi sa Federacijom. Ja imam sad na Federaciju mogućnost i jedva čekam, prekosutra će biti na Vladi ova odluka o pokretanju procesa na Ustavnom sudu protiv ministricе finansija. Jer su ljudi to toliko sposobno zamotali da smo jedva raspetljali gdje na koji dio da napadnemo da nam vrata naše pare. U zdravstvu to šta oni nama rade sa ovog ministarstva. Ubiše Kantona Sarajevo. Mi jedini primjenjujemo tu listu cijelu. Jedinu cijelu A primjenjujemo trošak nam 70 miliona. Ostali svaka čast premijeru TK. Ljudi su zbacili te

okove, istrčali, preživjeli od toga. Ne rade po zakonu. Tražit ćemo. Nema te solidarnosti o kojoj vi govorite jer t imate druge političke faktore. Imate interese HDZ-a da se neke stvari u kantonu ne dešavaju. A kada onda to počnete zaustavljati oni zaustavljaju život u ovoj zemlji. Zaustave pokretanje bitnih procesa pa se gore stalno nešto dogovora jer je gore teško voditi proces. I najlakše ih je idealistički posmatrati i reci sve ovako može. Samo bih volio da znamo kako? Koji je put? Sve to stoji. Koji je put da se to desi. Nismo dobili informacije iz UO i Pindžo je u pravu. Mi smo, vi ste nama naložili, mi isti dan poslali finansijskoj policiji dopis: uđite u sve institucije. Oni prvo otišli na akademsku zajednicu. I neka su. Vidite sada da su trebali, na nas drvlje i kamenje, vi napadate samostalnost akademske zajednice. Napadat institucije u zdravstvu. Sve smo ih ohrabрили, lično smo pisali budžetskoj inspekciji i vidjet ćete nalaz. Mi smo je poslali u Zavod. Njihov nalaz ima elemenata koji će biti pokrenuti ozbiljni sporovi na Tužilaštvu i sudovima. Nismo uopšte vodili računa ko je to radio. Sve smo kako kaže Pindžo jer ne može od člana UO, ja vam garantujem da ne znaju članovi UO pola tih stvari. Jedino šta je tačno, ako nemamo sumnju u Tužilaštvo, u MUP i te organe to će jedino biti tačno. A i tu su moguće manipulacije zbog konkretnog uticaja ovih ljudi koji su tamo prejak faktor. Nismo uzeli od bolnice, nismo uzeli od Opšte bolnice. Pet miliona je povećano KC, 400.000 je smanjeno Opštoj bolnici. Za onaj dio koji ne mog raditi po zakonu. Ne mogu i vjerovatno ako se sada bude prebacivalo. Neki dan se pojavila informacija, možda isto netačna, da se aktivnosti prebacuju u Opštu bolnicu, da oni neće da rade. Dakle, mi ni taj nalog nemamo. Nema naloga da neko ne prepisuje uputnice u Opštu bolnicu tamo gdje sjede ljekari koje smo mi obišli neki dan, rade pošteno posao. To nema. Iz ove Vlade to nema. Jel neko personalno odlučio da nešto od toga radi, pa se na to pozvao, pa animirao javnost, ne znam. Ne možemo na svaku društvenoj mreži na svaku pojavu reagovati. Ovdje ga ni u dokumentu ga nema. Ne možemo uzimati od Opšte bolnice jer je ona nama bitna. U nju mislimo integrisati još neke ustanove. Jer tamo ima praznog prostora koliko hoćete. To su nama ciljevi. Ako vidite neka bolja rješenja mi se potpuno slažemo. I ovako ću završiti jer smo i mi dovedeni, zastupniče Pindžo ja ne bih glasao za ovakav finansijski plan da nije 30. ne bih, kao što nisam ni ko zastupnik. Ne bih glasao jer u njemu nema reforme. U njemu nema osim stvari koje smo nabrojali. Nema više famoznih komisija, nema 80.000 reprezentacije direktora, nema apple računara, kompjutera, telefona. To nema. Nema nove zgrade, pa onda se ona renovira za 1,9 miliona. Nema. Ali nema ni pravedne raspodjele u ovom dokumentu jer još uvijek finansiramo. Tu stoji Stomatološki fakultet sa klinikama 2,9 miliona. Kada smo gledali analizu akademske zajednice i njihovog poslovanja taj fakultet je u plusu ta tri miliona. A šta radi u ovom našem sistemu, dok istovremeno imamo u Domu zdravlja imamo onaj višak stomatologa 70 njih bez opreme koji sjede kada smo ih obilazili, uglavnom sjede. Znači potpuni je to debalans. Znači ja bih sada ovo izbacio da se uopšte ne finansira ali ti nagli potezi bez jedinstvene metodologije usvojene sa poslom definisanim ustanovama a i privatnom sektoru, koji se sada i ovdje pojavljuje ponovo s potrebom ali ne jasno definisanim zahtjevima prema njima. Ne, jer nam se dešava da zbog dobrih veza, konekcija neko dobije posao ne treba nam. A tamo gdje nemamo nemamo privatne ustanove. Zato nam treba metodologija. Zato nam treba dio grada u kom nemamo mi svoje, tamo ćemo platiti privatnika, više para. Evo više. U dio grada u kom nema Dom zdravlja ustanovu. To sve ovdje nema. Nema zato što smo izgubili puno vremena u sudskim sporovima, u pravnim procesima, u političkim procesima i tek smo sada na putu da se jedinstvenom metodologijom i transparentnošću u zdravstvu počne ovo postavljati na svoje mjesto. Vidjet ćete tad. U jednoj uštedi na listama, u uštedi integracije će ostati ogromni novci koji onda treba da Sarajevo pretvore u ono što nama jeste cilj. Da stvarno bude u rang regiona i pružanja zdravstvenih ustanova u regionu. Sa novim opremama, sa boljim statutom ljudi koji tamo rade i žive. I ovo je problem. Znači pričamo sada o negativnim. Ja sam u tom KC vidio puno dobrih stvari sada. Znači ova fama koju ja ne vidim isto kao Forto. Forto kaže što zabranjujete najboljim ljekarima da rade privatnu praksu. Zna li kako sada izgleda ta privatna praksa, do 2, do 1, do

polu 2 rade u bolnici. Uzmite iz bolnice sanitetski materijal odnesite ga u privatnu praksu i rade ljudi. Mi to nemamo definisano. To je RS definisao bolje od nas. To je Tuzla definisala. Svi su to uradili, Sarajevo nije. Znači mi ćemo istrajati na tome da se razdvoji javni i privatni posao da bi javni bio plaćen čovjek. Da čovjek ima pravu platu a ne da je zarađuje. Dijagnosticira u bolnici u Kliničkom do 1. prazne sale nema operacija nikakvih. Ništa. I onda ode raditi svoj posao. Intervenirali su nama privatni vlasnici da kažu šta radite, ko će nam raditi u ambulantama jer zabranjujete da nam dolaze na posao u 2 sata. Zakon definiše koliko smiju raditi u privatnom sektoru. Sada je to tri puta više nego što Zakon dozvoljava. I tu smo poslali inspekcije da vide. Liste čekanja, vađenje krvi, ono kad uđete, opšti dojam u bolnici sada na žalost ja imam u porodici pacijenta, stalno u bolnici. Drastična promjena u odnosu uposlenika KC prema pacijentu. Drastična. Dakle to je vidljivo. S tim što ima i ovoga što govorite. Naravno mi ćemo analizirati šta znači „zlatni sat“. To ćemo mi pregledati iz ministarstva i Vlada, ako je to neophodno normalno da ćemo tražiti da se to uvede. Ako to ne uvedu nećemo dati pare za to. Ako nam treba platiti ćemo to, bez obzira ko vodi ustanovu. I ako tako budemo razgovarali o zdravstvu ja mislim da ćemo biti centar. Eto ne moramo biti bolji Zagreb, Ljubljana, Beograd već su poprilično poodmakli. Ali zaista puno kasnimo. I kasnimo zbog tema u kojima su nam prefiksi ovi naši političkih partija primarni pa onda pričamo o zdravstvu. Hvala.

Poslanik/zastupnik Mirsad Pindžo:

Ja neću pitati premijera ko i iz kojih kafana i koga zove? I ja kao i svi mi ovdje koji sjedimo a i građani dobro znamo kako to funkcioniše. Interesni lobi, i klanovi kako upravljaju. Ako je ova ispovijest ministricе i premijera i potvrda da su lobiji upravljali ovim sistemom, početak da Vlada konačno donese te programe, metodologije i ono šta treba da uradi i kontrolišući i koristeći alate za kontrolu da preuzme upravljanje procesima, onda premijeru moram vam reći da ćete imati punu podršku, ali ću vas isto tako podsjećati da za pola godine i za godinu dana ćemo razgovarati o toj temi. Hvala vam lijepo.

Poslanik/zastupnik Sabina Ćudić odgovor na repliku:

Znate stvara se jedan trend u ovoj Skupštini da svaki put kada uložimo pritužbe ili primjedbe na neki prijedlog, pogotovo kada su u pitanju finansijski izvještaji, premijer nam kaže jednu stvar, a to je: ja sam zaista nezadovoljan ovim što je ispred vas ali ćemo mi raditi na tome da se to poboljša. I drugi odgovor jeste: nemojte da se bavimo politikanstvom u prostorijama Skupštine i u komunikaciji s Vladom. Mislim da je tok današnje Skupštine dokazao koliko je nekorektna ocjena da Naša stranka igra se politikanstva ako uzmete u obzir način na koji smo glasali u budžetu, ako uzmete u obzir da je Zakon danas usvojen na osnovu izmjena na osnovu koji je usvojen jednoglasno. Zatim da je usvojeno pet od šest naših amandmana. Teško mi je zamisliti konstruktivniju opoziciju od Naše stranke. Ali jedno je činjenica, da kada analiziramo ko kontroliše zdravstvo u FBiH, onda se pojavljuje ime jedne stranke i moramo konačno početi razmišljati o vertikalnoj komunikaciji i odgovornosti ne samo unutar stranke, već naravno i sa različitim vertikalna komunikacija različitih nivoa vlasti. A ta vertikalna komunikacija je toliko lakša ukoliko u tim tijelima na federalnom nivou sjede vaše stranačke kolege. Ja mislim da bi svi ovdje pomislili da je suludo da ja kao potpredsjednica i članica Naše stranke izađem za govornicu i kažem mi u Našoj stranici bi to rado ali naš zastupnik gospodin Grac u Federalnom parlamentu nam to ne da. To je suludo. Iz tog razloga moramo razmišljati i o činjenici da je gđa o kojoj govorimo mi nismo u kafani, i ne komuniciramo na kafanski način na koji se možda biraju ta imena, govorimo o funkcijama. Gđa Sebija Izetbegović nije samo direktorica KCUS već je i predsjedavajuća odbora za zdravstvo SDA. Dakle izvor gdje se politike zdravstva pišu za stranku koja kontroliše zdravstvo u FBiH. Te stoga razloga pozivamo premijera koji je premijer ispred te stranke na odgovornost na isti onaj način na koji daje znakove kolegama ovdje kako će u Skupštini

glasati po određenim pitanjima da na taj način išareti možda i svojim kolegama u Federaciji. Iz tog razloga, konačno, ako je premijer u analizi tanja u zdravstvu i u analizi finansijskih izvještaja iz zdravstva, ja sam izbrojala sedam puta. Ali možda je više rekao, nemamo pojma. Onda se postavlja pitanje na osnovu kojih podataka ustanovi o kojoj nemate pojma dajete dostatnih 5,5 miliona a ustanovi koju ne vodi predsjednica zdravstvenog odbora SDA oduzimate pola miliona. Dakle, pogotovo zato što kaže da je nezadovoljan ovim ciframa da moramo dalje analizirati kako bi izašli sa jedinstvenim planom reforme zdravstva. Onda da bi smo održali u životu fond zdravstveni morali smo glasati za iste cifre kao do sada. Pa reći korektno glasamo kako bi smo održali sistem u životu ali nismo ušli ni u bilo kakve pa ni u kozmetičke izmjene dok ne dođemo do tih podataka ne da sipamo novac u rupu bez dna. Iz tog razloga nekorektno je ograđivati se od politikanstva a kada je u pitanju hvaljenje ili kuđenje zdravstvenih ustanova, isključivo hvaliti zdravstvene ustanove koje vode stranački kadrovi SDA a niti jednom prilikom ne spomenuti da li su klanovi možda postojali u Opštoj bolnici ili možda postoji nešto što je ta Opšta bolnica radi korektno i kako treba, jer sudeći prema izlaganju premijera to ne čine.

Predsjedateljica:

Gđo Ćudić vi ste postavili pitanje, ja nisam otvorila raspravu, pa vodite računa o tome, molim vas. Ispravka krivog navoda premijer, izvolite.

Premijer Elmedin Konaković:

Postavili ste pitanja i rekli ste niz neistina kolegice Ćudić. Niz neistina. Jednom samo pokažite ili nek kaže zastupnik kada sam bilo kome u ovoj Sali rekao kako da glasa. Ja sa svoje pozicije premijera. Sa pozicije premijera svojim kolegama koji su meni pretpostavljeni da sam govorio kako da glasaju. Samo ste opet govorili politički. Više puta sam hvalio Našu stranku, vašu korektnost, ne samo retoričku, nego ovu koju i danas demonstrirate, to sam i rekao Kojoviću, napišete Zakon uložite amandmane, predložite projekte, u TV u kameru više puta. Kada je riječ o zdravstvu vi ste uzbunili javnost u odnosu na sve tačne relevantne podatke sa nekoliko vaših telefonskih poziva i vašim fejsbuk statusima i više ste vi od mogli rješavanju ove situacije nego mnogi drugi, možda s dobrom namjerom ili sa stalnom željom da to politizirate vi. Naša stranka je vrlo konstruktivna opozicija. Ja sam o tome govorio u Sarajevu, Banjaluci, i gdje god krećem kao i veći dio ove ovdje skupine u Kantonu Sarajevo koja prvi put, jer sam svjedok, stavila interese građana u prvi plan a politike u drugi. Osim kada je riječ u zdravstvu, dominantno vi. Ništa nisam, kažete i mene jedne stranke po vertikali kontrolisao. To je neistina. Prvo je neistina, ovdje to nije slučaj. U Kantonu Sarajevo resor zdravstva ne vodi SDA. Na Federaciji resor zdravstva ne vodi SDA. U prošlom sazivu je to bio ministar, nije bio iz SDA. U pretprošlom sazivu je to bio ministar nije bio iz SDA. Vidite kako ovo zvuči a kako vi govorite. Koje veze ima jel to bila nije bila SDA. Ko je bio direktor Zavoda? SDA. Ko ga je smijenio? Premijer SDA. Jel to nama osnov za razgovor i ako jeste sve ste promašili. Dakle, niste rekli ni jednu istinu. Ako je to vama osnov za razgovor, nemamo pojma sam rekao šta je u KC. Ljudi nemamo pojam, jeste li vi toga svjesni. Da je to najveći problem trenutno zdravstva. Imat ćemo kada nam donesu finansijske policije i inspekcije koje smo sve poslali gore, a ko gore sjedi? SDA direktorica. Ko je sjedio prije nje, nije bio SDA. Ko je bio u zavodu, ideolog ove cijele priče. Uzmite plan koji je donijela ova Skupština o informatizaciji famoznoj, kako je maestralno napravljen na štetu građana. Jedva ga raspetljivamo. Ne možete ga raspetljati koliko ga je čovjek smislio genijalno da mu ne možeš ući u trag uopšte. Sad angažujemo novu reviziju onoga što tamo imamo o informatizaciji potrošili 20 miliona. Koga smo zaštitili? Jesmo li ikome rekli nemojte toga zato što je član neke političke partije. Koja nam je ovo tema. Dakle, sve ste pogrešno rekli u ovom svom sad izlaganju, pitanjima meni. Pa evo koristim da odgovorim na pitanja da vam kažem ni jedno pitanje niste pogodili, ni jedno. Tu nema SDA. Evo recite mi vi jel drugačije,

odakle je ministrica, odakle je ministar, nemojte se smijati. Odakle je ministar na Federaciji. Ko je bio bivši ministar na Federaciji, ko je bio bivši ministar ovdje, SDA, član predložen od stranke. Peđa je naravno u pravu. Zna li kakve su posljedice naših svađa prošle četiri godine u mandatu? Trgovina u kojima nije htio biti ministar pravde, ja ga pozivao da bude. Nego su se ruke skupljale politički da bi eko bio na vlasti. Skupi se 18 da bi neko glasao da bi opstao na vlasti a ne da bi radio ovo što mi danas radimo. Kada god budete htjeli na tu temu ja sa vama mogu do sutra razgovarati. Ja vas pozivam da pričate o struci, da vaši savjeti koji dobri rade posao, pripremaju akte, pripreme bolji dokument od ovog, ne samo retorički kada dođete na Skupštinu. Da nam pripremite prijedlog šta ćemo sa KC? Evo vi vidite to možda bolje od nas, objektivnije, nema niko vaš gore politički. Nacrtajte rješenje pa da vidite smije li ova Vlada to. Ali imajte u vidu da ta rješenja imaju posljedice. Prestat ćemo finansirati smanjit ćemo KC evo sada 10 miliona da ne bi bilo da je to zbog naše direktorice. Ugasit ćemo to, reći ćemo ne zanima nas to. KC nas više ne zanima. Pa to je raspad cijelog sistema. Ovo je težak i dug put na kojem mi zajedno možemo napraviti tu malu reformu, malu revoluciju zdravstva u kantonu. Ne smeta nam da pričamo o politici do kada god hoćete, da nabrajamo sve bivše ministre, sve usvojene planove, izvještaje, kako je ko glasao. Naravno ja sam jutros govorio s ministricom Ademaj. Sramotno je da se ne prijavi nama niko u JU ljudi nemamo tu multietničnost. Imamo izbor da i dalje budu vd protiv principa ili da ih skupljamo da ih tjeramo da se prijavljuju. Nema. I možemo o tome razgovarati do kada hoćete mi sada govorimo o struci. Jedinstvena metodologija, lista, ušteda, ukidanje nekih zdravstvenih ustanova, ne zanima nas ko tamo sjedi. Integracija. To su procesi koje moramo uraditi. Mora ih uraditi ministrica. Još nemamo kadar, jedinstveni registar ljudi, opreme i prostora. Još ga nemamo. Nemamo ga, uposlenica ministarstva zdravlja donese listu koju nije usvojila komisija i jedva vidimo u zadnji tren u prošlom mandatu da to nije ono što smo mi glasali nego ono što je neki lobi naredio. Pa vraćali sve na početak tri mjeseca. Jer su to sve recidivi ovih pripadnosti i pripadnika. Ako to budemo posmatrali direktor broj jedan i u afirmativnom i u negativnom smislu. Jer sam ja spreman, ima tu naravno i loših stvari koje se gore dešavaju i bilo ih je u Opštoj bolnici. Ima i puno dobrih. Isto tako ja sam više puta hvalio direktora Službe za zapošljavanje koji mi je pravi saradnik nije član moje političke partije i druge. Vi kažete hvali svoje. To stalno radimo. Vi nas stalno uvlačite nam to polje politika, ja imam svašta reći na tom polju politika. Trudim se kao premijer da to radim što manje.

Predsjedateljica:

Hvala lijepo premijeru. Ne možete sada dobiti riječ, otvaram raspravu. Kasnite sa javljanjem. Otvaram raspravu. I sada izvolite dobivate.

Poslanik/zastupnik Goran Akšamija:

Zahvaljujem. Na žalost, kada se čovjek u ovoj Skupštini mora boriti za riječ onda to je katastrofalno. Ja imam sada jedno pitanje za našeg premijera Konakovića. U toku svog izlaganja spomenuo je u negativnom kontekstu bivšeg ministra. A nisam mogao da shvatim da li je mislio na ministricu Tanović, ministra Lokmića ili na nekoga prije. Koliko znam sa odlaskom ministre Tanović sa njene funkcije odavde je isprečena sa svim epitetima sa njegove strane pa bih onda volio da javnost čuje da ne bude u zabludi.

Ako mogu još da nastavim. Meni je drago što vas ponovo čujem tako odlučno i ono na početku me podsjeća na ono odlučno u promjene. Ne što je to bio slogan naše stranke, nego je stvarno tako bilo i onda je nastupilo jedno zatišje i evo sada vidimo opet da kreće. Hvala. A što se tiče rasprave ja ću je imati u svakom slučaju.

Premijer Elmedin Konaković:

Mislio sam kada sam govorio o propustima, mislio sam o propustima i lošem radu ministra Lokmića i ministra Mesihovića-. A govorio sam odličnom radu ministrice Tanović koja nije

mogla implementirati sve ono što je htjela zbog telefonskih poziva. Jer je žena predobro vidjela tu situaciju. I često se dešavalo da donese prijedlog na Vladu pa stanemo, pa izađe pa donese drugi prijedlog telefonom. To sam mislio.

Predsjedateljica:

Hvala lijepo. Rasprava. Izvolite gospodine Haliloviću.

Poslanik/zastupnik Semir Halilović:

Hvala lijepo. Ja bih samo zamolio Vladu Kantona Sarajevo, ako je moguće, da ovu tačku povuku na narednu sjednicu iz prostog razloga što ovdje očigledno postoji previše disonantnih tonova i nejasnih, nepotpunih informacija da bi se o ovome raspravljalo. Jer zapravo mi raspravljamo o nečemu o čemu i ne znamo. Dakle, da ne bi ulazili u ove i nema potrebe da razgovaramo „ad hominem“ i pogotovo nema potrebe da se u ovoj sali, ako je ovo Skupština, a jeste, da se ovdje ljudi nazivaju nadimcima. Nije u redu. Ovdje čujemo nadimke ljudi. Meni je jasno da su nama ti nadimci opšte poznati ali eto, ipak postoji neki red, trebalo bi da se ovdje oslovljavamo imenima i prezimenima, s nekim prefiksom gospodin, gospođa. Jer neće baš biti, sada svak zna ovdje ko je Šanko. Mislim itd. Tako da iako nismo u stanju već da uvedemo red u ovoj Skupštini, baš sumnjam da ćemo uvesti red u zdravstvo jer ako smo mi u ovakvom stanju gdje ispred kafana ovdje Skupština i gdje sve liči na cirkus, da bog da da mi uvedemo red u zdravstvu. Zato možda je bolje da ovo, pošto je već postalo zagrijano, da malo sklonimo koji dan pa da hladne glave jer već je počelo pre žestoko da bude. To je moja molba. Eto. Hvala lijepo.

Predsjedateljica:

Dobro ste sugerirali to za Šanko, svi znamo ko je gospodin Mesihović, Rusmir Mesihović, tzv Šanko.

Poslanik/zastupnik Muhamed Kozadra:

Zahvaljujem. Ja sam se javio prevashodno ne znam da li da nazovem replikom ili ti poslovničkom intervencijom? Mi danas imamo Finansijski plan i program rada ZZO. Uvijek se kada je ova tačka u pitanju i još neke druge pokuša ubaciti više rasprave o izvještaju o izvršavanjima ovih ustanova i institucija. Ja molim kolege danas raspravljajmo o tački dnevnog reda a predlažem nam svima ovdje Izvještaji koji će biti ja mislim naredne ili u dogledno vrijeme narednih mjesec dana da zajedno raspravljamo o svim institucijama ovdje iz zdravstva. Da imamo svi ispred sebe relevantne pokazatelje kako prihoda tako i rashoda, po svakoj od ovih ustanova koje imamo ovdje i samim tim i sve što imao reći strukovno da li valja to ili ne valja, da li treba to ili ne treba. Danas mi imamo budžet za sve ove zdravstvene institucije i o tome da raspravljao. Molim vas. Nemojte neprovjereno i premijer ako izađe nije niko ovdje neozbiljan da kaže kolike su obaveze jer ih ne zna niko. Al ako neko zna ovdje nek je kaže pa da ga dočekamo na izvještaju kada bude. Nemojmo širiti raspravu tamo gdje ne trebamo. To sam htio da kažem, ne želeći da raspravljam o ovom dokumentu jer dokument ministrica je rekla što je imala reći u uvodnom dijelu, principe način kako je odrađen. Nedostatke koji su rečeni kada smo skidali ovu tačku dnevnog reda kada smo raspravljali o budžetu. Znači skinuli smo je upravo zbog onoga što se nije moglo uraditi i ovdje je Vlada priznala da nije mogla iz objektivnih razloga to uraditi. Ali nije rekla da neće uraditi to. Zahvaljujem.

Predsjedateljica:

Hvala gospodine Kozadra, jako dobra sugestija i očito da nismo razumjeli da raspravljamo o Prijedlogu odluke i davanju suglasnosti na Finansijski plan zavoda za 2016 godinu. Gospodine Mariću vi ste sljedeći.

Poslanik/zastupnik Zvonko Marić:

Hvala predsjedavajuća. Pa pazite, sama ova rasprava govori nam dovoljno o tome u kakvom je stanju ovo društvo. To je indikator i evidentno je šta se zapravo radilo i kakva se politika provodila. Ponovit ću još jednom ceh loše i pogrešne politike plaćaju svi. Građani na žalost najviše. Ovdje govorimo o nekom misterioznom dugu. Da je ovo sanckionirano na vrijeme da su ljudi odgovarali zbog ovoga, a ne da su bili u situaciji da ucjenjuju i ovu Vladu, ne mislim na ovaj saziv, ali i skupštinu da im treba 10 miliona, m kako kaže premijer itd. Sasvim sigurno bi bila druga priča. Društvo bez odgovornosti je propalo društvo. Odgovornosti nema. Gospodin Konaković, dakle premijeri, insistira da ponudimo rješenje. Vrlo konstruktivno, bojim se da je kasno. Kasno je za agoniju u kojoj se našlo zdravstvo, taj segment koji znamo od iznimnog značaja za naše društvo. Ja ne bih da ovom prilikom ulazim u ovu otužnu rekao bih ostavinsku raspravu između bivših koalicionih partnera ko je kriv ili ko nije. Između gdina Pindže ko usvaja ko nije, jer time bi se shvatilo kao da ulazimo u predizbornu kampanju itd., ali ću vam reći jednu stvar, odgovornost snose svi. Svi u lancu već 20 i više godina. Bila je jedna emisija koja je ovdje čuli smo bezbroj puta šokantno, sramno, pa tako dalje i svi su ovdje iznenađeni. Zamisli situaciju gdje su svi šokirani saznanjima nakon 20 godina. Pa šta, statirali su vjerovatno u političkom životu ovdje. Čekali su pozive iz kafana. Je li to imitacija parlamentarnog života, imitacija obnašanja funkcija u Vladi. I doveli smo do ovoga gdje jesmo. Neupitno dovedeno smo u cajtnot. Prihvatit se ovaj izvještaj mora zbog građana, ali zašto smo dovedeni u ovu situaciju. Zašto smo uvijek pod pritiskom ucjena nekih lobija? Četiri ih ima. Možda ih ima i više. Ali kako je tolerirala ta politika koja je vodila sve procese u ovoj državi da postoje ti klanovi i da sudbinski odlučuju o našim životima i našim sudbinama. Gdje tu odgovornosti? Pa evo gospodine Konakoviću rješenja. Ubrzajte te inspeksijske istražne organe da rade svoj posao da napokon saznamo koliki je dug i ko ga je napravio. Suvišno je govoriti kao opreme nema. Dobavljačima se duguju milioni. A šta je nabavljano ako toga nema? Šta je nabavljano ako toga nema, mislim da je ovo jako žalosno jer ovim šaljem bojim se, ružnu poruku svim našim građanima koji su nas ovdje birali i čini mi se da se ovim produžava i bezizlaz i agonije. Reći ću vam još jednu stvar. KC dva člana UO iz Kantona Sarajevo. Pa definitivno da li postoji ta neka koordinacija da e uspostavi neki balans, izbalansira sve to riješi, raščisti šta to pripada, m i koje su obaveze Federacije a koje Kantona. Ako smo mi u Općoj bolnici vlasnici sto procentno možda ta bolnica ima više predispozicija jer je ova urušena. Urušena je pokradena, kriminal je napravljen. Pokradena je i država ali dokaza za to nema. Kakav je to apsurdna situacija, pokraden KC, a dokaza za to nema. Bez namjere da branim jednu ili drugu bolnicu, ali evo premijer Konaković izlazi ali volio bi da čuje ovo. Gospodine Konakoviću 25 decembra u emisiji TVSA ste rekli da je apsolutna opravdanost sjedinjavanja dvije bolnice. Ja sam to čuo. To se može provjeriti u arhivu. Ne spinujem, ne govorim. Vi ste kazali kasnije da neko spinuje. Ne ulazim ko je direktor ove ili one bolnice.

Predsjedateljica:

Gospodine Zvonko tačka dnevnog reda. Finansijski plan.

Poslanik/zastupnik Zvonko Marić:

Ovo je sve vezano za ovo i pokušavam zbog ozbiljnosti Skupštine da kažem ono što je ovdje rečeno i da na neki način to objedinim. Apsolutno u nauci ne postoji čak ni apsolutna istina pa tako i apsolutna opravdanost nečega što je. Možete vi ići gdine Konakoviću ali mislim da apsolutna opravdanost ne ide. Dakle, ovo što vi predsjedavajuća insistirate i podržavam vašu inicijativu o kojoj sam čuo maloprije da se u ovom neetičkom ambijentu pokuša stvoriti etički neki organ koji će se pokušati brinuti da vrati na kolosijek ovo društvo etičnosti. U tom smislu podržavam vašu inicijativu ali što se pitamo oko izvještaja i ovo me podsjećate, ja tačno znam šta govorim da se vratim na tačku, ali ovo je jedan preduvjet da bih mogao da kažem, pa

pazite kada imate ovoliko nedoumica, morate se pitati da li je moralno i etički da budete po priči žirant za pogrešnu politiku. I mislim da je ova diskusija proizvod upravo toga. Ja se pitam, evo glasat ću, u redu je, moramo zbog građana ali je li u redu od nas tražiti da glasamo, da budemo dovedeni u cjelot i da budemo pokriće ili žirant za pogrešnu politiku koja se nastavlja, evo čujemo. I dalje ne znamo traže 5 miliona, 10 miliona. I njima se daje, ucjene su i dalje na sceni. Ali zbog građana evo pristat ćemo bit ćemo žiranti pogrešnoj politici. Ali tome mora doći kraj. Definitivno. I na kraju, mi godinu dana slušamo ovdje priču, o reformama, o nekom misterioznoj agendi, to je jedan obični plan reformski. Agenda kada se kaže ljudi misle da je to vrh u političkom životu. Reci da je to plan koji stoji pred nama da se ispuni i kraj priče. Pustite suporte, sinergije itd. Ljudi pomisle da su političari jer su naučili te izraze. Pazite jednu stvar, slušamo priču o reformi svega i svačega, promjenu svijesti, promjeni svakoga od nas, a šta na sonu imamo na kraju, samo lažno obećanje. Ovakve tačke dnevnog reda, ovdje ne žele neki da se otvore jer je izborna godina to je žalosno što ne razgovaramo o suštinskim problemima. Niti me zanima izborna kampanja niti bilo šta, nego interesi građana jer su me oni birali da ih zastupam i da kažem ono što je istina za šta smatram da iznesem svoje stavove. Meni je žao što ponekada ministri resorni ne izađu za govornicu i govore o onome o čemu ih mi pitamo. Nego mora uvijek premijer. Ja ne želim da mi ministrica Ademaj bilo na ta od ovih mojih dilema odgovori jer je žena tri mjeseca tek i tek je shvatila u kakve je probleme ušla i šta joj je činiti i šta rješavati bezizlaz definitivno. Dakle, stav SBBa je i dalje isti za reforme jesmo, i to je potpuno neupitno ali za neke vrste ucjena nismo. Apsolutno i ovo što je gospodin Konaković rekao da ministrica Ademaj i on insistirao da neko uđe u UO i da ljudi neće da ih pokušavaju utjerati u to. To je odraz nepovjerenja u sistem koji to nije. Sistem koji to nije. Hvala vam.

Poslanik/zastupnik Goran Akšamija:

Ja ću prije ove diskusije samo jednu kratku repliku koja se odnosi na našeg premijera, nije trenutno ovdje i na gdina Marića. Pošto se ovdje ovako spominje par puta da se odluke donose iz kafane i to se naravno odnosi na DF pa dobro, dobro. Pa eto, recimo nama je bilo upućeno, pa zna se mislim vrlo dobro, da vam kažem, prepoznao sam i nešto drugo. Pa znate, kada se nešto kaže iz kafane, pa čovjek koji je možda i malo popio može i pogriješiti. Ali kada trijezan čovjek donosi neke odluke onda je to daleko veća greška. A zna se odakle se takve odluke donose. Ne bih više o tome niti ja ovo nešto na vas, nemojte misliti da aludiram nego općenito upravo zbog toga što se to ponavlja. Ma nema potrebe, pa vidite da nema ništa gore, pa šta ćete bolje da vas travari liječe, nije to problem.

Evo ja bih sada krenuo malo sa raspravom. Što je vrlo teško u ovom trenutku, znate nakon ovako jedne široke diskusije mi smo otišli stvarno u jednu širinu koja bi mogla da traje do večeras. Ja ću se malo pokušati vratiti na ovu tačku dnevnog reda i još na neke stvari koje su ovdje spomenute, i za šta ja naravno nisam kriv ali ne mogu da ne reagujem. Što se tiče samog ovog finansijskog plana i programa rada ZZO ovu jedinstvenu metodologiju ne bih više spominjao samo bih naglasio da je radi toga smijenjen prošli menadžment i radi toga nije faktički bio usvojen, odnosno bio je odbijen. Što se tiče tog samog izvještaja, da se vratim na njega, odnosno finansijskog plana. Što se tiče podataka za dom zdravlja o broju uposlenika oni nedostaju a s tim što finansiranje stoji. Ja mislim da se tako nešto ne bi trebalo da nađe u tom izvještaju odnosno, da je Vlada Kantona Sarajevo pošto je to već jednom traženo, i prošle godine je bio slučaj da se zna koji je to broj uposlenika s kojima oni raspolažu i šta planiraju i u svakom slučaju protiv ovakvih stvari ako ništa onda bi trebalo ukinuti finansiranje dok se to ne dostavi. Što se tiče samih odnosa finansiranja državne bolnice i KCUS po pitanju broja uposlenika koji su u toku dvije godine bili planirani u broju od 585 kao što se vidi iz izvještaja i da su se finansirali za taj period, mene zanima da li je to broj uposlenika koji je predviđen po sistematizaciji ove bolnice? Znači oni ako su finansirani zašto nisu primili taj broj uposlenika, ako nije bio predviđen onda je napravljen neki i previd. Što se tiče samog KCUS gdje su

predviđena ova sredstva i povećanje izdvajanja ovih sredstava, sada bi mi mogli mnogo da pričamo o tim gubicima. Evo ja ću se osvrnuti na taj izvještaj koji smo između ostalog i mi iz Demokratske fronte usvojili, gdje je prikazno 11 miliona kako kažu kolege iz Naše stranke, ustvari ja mislim, koliko se sjećam da se taj izvještaj odnosio na 11 miliona više gubitka u odnosu na prethodnu godinu. Da je to bio gubitak za tu godinu ne uzimajući u obzir prethodni period. Moramo biti svjesni jedne situacije. Mislim teško je nekoga braniti i bilo šta činiti dok se ne uzme sve u obzir sigurno da ima mnogo nečistih stvari u radu, mislim to treba da završe istražni organi u svakom slučaju. Ali moramo biti svjesni jedne stvari, način finansiranja na koji ide finansiranje KC i ostalih zdravstvenih ustanova nije zadovoljavajući i sigurno kada pogledamo i kliničke centre u našem okruženju da su svi u vrlo teškoj situaciji. Stoga ovo povećanje je jedini vid, ja opet kažem, niti pripadam SDA, niti držim do toga što sam iz KC, nego kažem da je to jedini spas za očuvanje zdravstvenog sistema koji imamo uz mnogobrojne kritike na rad na koji se treba posebno osvrnuti. Što se tiče Zavoda za medicinu rada, mi smo ovdje imali jedan prijedlog da se oni objedine ali eto nisu napravljeni ti programi rada, i sada šta je kako je, ne možemo ništa izmijeniti. Problem koji se u svemu ovome javlja to je nedostatak sanacionih planova zdravstvenih ustanova, jer ova Vlada to nije pokrenula, i oni nisu dostavljeni. Također nisu usvojeni statuti, nije definisano upravo u ovoj dilemi u kojoj se mi nalazimo a što bi trebalo činiti federalna Vlada kroz Zakon o zdravstvenoj zaštiti koji vjerovatno treba izmijeniti i da se definiše jasno šta je opća, šta je kantonalna bolnica i šta je klinički centar. Koliko je meni poznato jedna opća, ustvari kantonalna bolnica, što je faktički jedno isto, ima pravo po Zakonu o zdravstvenoj zaštiti koji je sada na snazi da obavlja i dio tercijarne djelatnosti. Tako da ne možemo tu nešto posebno i da istaknemo. Što se tiče plana za upošljavanje ovih kontrolora u ZZO ako će oni proizvesti tolike uštede, i to u svakom slučaju treba i podržati. Što se tiče primanja uposlenika ja mislim da je moratorij još uvijek važeći i da bi ga trebalo poštovati odnosno da se mogu jedino nadoknaditi oni koji su nedostajući radi odlaska u penziju odnosno mirovinu. Po pitanju politike u zdravstvu koja je ovdje spomenuta nju nikako ne možemo isključiti, ona na žalost prati zdravstvo od rata pa sve do danas. Znači, podhitno je neophodno donijeti Zakon o sanaciji zdravstvenih odnosno bolničkih ustanova, izmijeniti Zakon o zdravstvenoj zaštiti i također do podatka kojeg sam jučer došao, odnosno mi pravo dilemu kome pripada KC, ja ću malo sačekati neka svi čuju koga zanima, a koga ne zanima neka izađe iz sale. To bilo bolje. Znači sinoć sam našao na teletekstu u Hrvatskoj koji su bili kliničke centre proglasili federalnim ustanovama da su donijeli odluku da ih vraćaju na županijski nivo radi toga što su oni pravi osnivači tih centara. Znači sve sada što budemo radili trebamo dosta oprezno raditi i ja u svakom slučaju insistiram na tome da Kanton bude više zastupljen kao osnivač u donošenju svih odluka i imenovanju članova UO. Evo dočekat ćemo ovu tematsku sjednicu vidjet ćemo šta će se na njoj dogoditi a u svakom slučaju radi situacije, datuma, loše situacije u zdravstvu Klub DF-a će još ovu godinu podržati izvještaj u ovom obliku, ali plan rada za sljedeću godinu sigurno u ovom obliku nećemo više podržavati. Hvala.

Poslanik/zastupnik Segmedina Srna Bajramović :

Zahvaljujem. Javila sam se za raspravu ne da bih izašla, držat ću se tačke dnevnog reda. To je ono što s pravom upozoravam. Pa evo ako sam ja taj jezičak na vagi, kako su to neki voljeli da govore u prošlom mandatu. Vratit ću se dakle finansijskom planu ZZO i na žalost, moram priznati da se nama loša praksa kada je u pitanju ovaj dokument Finansijski plan ZZO ponavlja iz godine u godinu, kada je u pitanju pristup i metodologija rada po istom. I dalje smo dakle u situaciji da o njemu raspravljamo zadnji dan pred isticanje Odluke o privremenom finansiranju gdje se sve može okarakterizirati kao kontinuitet birokratizma jer se isključivo ispunjava forma sa vrlo malo ili gotovo nikakvog uticaja na sadržaj. Ne želim se danas baviti puno brojevima u ovom finansijskom planu jer je sve proceduralno isplanirano tako da isti danas mora dobiti saglasnost, ukoliko ne želimo da sistem stane. Tako da danas

više želim reći par riječi o tome gdje zbog ovakvog ponašanja, posljedično idemo uz namjeru da se osvijestimo prije nego što se u potpunost razbijemo o zid. Kao zemlja koja je prvi put obuhvaćena Europskim zdravstvenim potrošačkim indeksom, BIH zauzela je posljednje mjesto zbog zapanjujućeg nedostatka podataka o njenoj zdravstvenoj zaštiti. Od mogućih 1000 bodova BIH je dobila 420 manje i od Srbije i od Albanije i od Crne Gore. Europski zdravstveni potrošački indeks je dakle danas glavna javna procjena djelotvornosti državnih sistema zdravstvene zaštite. Generalno, svi ćemo se složiti stanje u zdravstvu danas je toliko kompleksno, da nemamo niti jedan faktor u sistemu zadovoljan. Jednako su nezadovoljni pacijenti kao i doktori. Svako iz svojih opravdanih razloga. Pacijenti zbog percepcije da sve ovo može puno bolje, a doktori jer smatraju da nisu adekvatno plaćeni za svoj rad i da nemaju adekvatne uvjete za posao koji obavljaju a osnivači opet činjenicom da ne mogu kontrolisati rastuće potrebe za finansijama u zdravstvu. Tj da postojeći sistem doprinosa ne omogućava ni blizu stabilnost sistema kakvog imamo. Činjenica je zbog nemalih 345 miliona KM kojim Fond raspolaže, da se odgovornost za stanje ili nezadovoljstvo prebacuje na one koji su u sistemu odgovorni za alokaciju navedenih sredstava, te da zbog te činjenice smatram kako sama procedura po pitanju finansijskog plana zahtjeva ipak značajniji prostor u smislu djelovanja zastupnika jer smo na kraju mi ovdje ti koji dajemo konačnu saglasnost na strukturu trošenja novca. Konačno je dakle vrijeme da svi zajedno postignemo koncenzus u cilju što hitnije realizacije stručne, prije svega dubinske i suštinske analize naših strateških dokumenata, revizije planova, strukturi finansija, te efektima ostvarenog u zdravstvu jer nam vrijeme curi. A mislim da ćemo se svi složiti kako nam je sistem već odavno ispio iz ruku u smislu nadzora kvaliteta. Vrijeme koje je pred nama spomenuo je to i kolege Akšamija, obilježiti će i Zakon o sanaciji kliničkih centara na nivou FBiH, koji federalni ministar već najavljuje u medijima, koji neće opet značiti ništa ukoliko se praksa i trendovi u poslovanju i dalje nastave, ovakvi trendovi. Dakle, treba nam koncenzus za novi model u zdravstvu i stanje nam je na žalost indikator da je to tema koju ovaj mandat skupštinskih klupa ne može zaobići. Jednostavno moramo pristupiti i makro i mikro analizi postojećeg modela s ciljem definisanja korektivnih mjera, dok sistem nije u potpuno kolapsirao, opšte je poznata stvar da zdravstvo ne bankrotira tako da bolnica prestane poslovati, nego se sukcesivni proces bankrota održava na eroziju kvalitete usluge te kroz efekte supstitucije nosioca troškova tako da se isti sa sistema sa bolnice prebacuju na pacijente. Bojim se da smo stalno u pričama o reformama, te da smo u potpunosti obesmislili taj termin, nekada su nam očekivanja nerealna te se rješenja traže isključivo u zdravstvenom sektoru, a uzroci najčešće leže izvan. Zato smatram kako je zdravlje ipak u svim politikama i tako se prema njemu treba odnositi. Na kraju, završit ću zašto insistiram na novom pristupu u ovoj oblasti. Jer nam jasnija sistemska perspektiva može minimalizirati zbrku kakvu imamo danas a činjenica je da mnogi od današnjih problema nastaju kao posljedica jučerašnjih rješenja. Sigurno je jedno i bojim se da većini nas to postaje sve jasnije, problem zdravstva nije prioritetno novac već organizacija. I zato se svi zajedno moramo potruditi u cilju promjena. Zahvaljujem.

Predsjedateljica:

Hvala lijepa uvažena Segmedina Sma. Zatvaram raspravu.

MOLIM ZASTUPNIKE DA PRISTUPE IZJAŠNJAVANJU O PRIJEDLOGU ODLUKE O DAVANJU SAGLASNOSTI NA FINANSIJSKI PLAN ZAVODA ZDRAVSTVENOG OSIGURANJA KANTONA SARAJEVO ZA 2016. GODINU I ODLUKU O IZVRŠAVANJU FINANSIJSKOG PLANA ZAVODA ZDRAVSTVENOG OSIGURANJA KANTONA SARAJEVO ZA 2016. GODINU.

Tko je za? Tko je protiv? Suzdržan?

Temeljem glasovanja 25 je bilo ZA, protiv 3 i suzdržano ništa.

KONSTATUJEM DA JE SKUPŠTINA DONIJELA OVU ODLUKU.

Prelazimo na sljedeću tačku dnevnog reda, a to je:

AD – 6.

PRIJEDLOG ODLUKE O DAVANJU SAGLASNOSTI NA PROGRAM RADA ZAVODA ZDRAVSTVENOG OSIGURANJA KANTONA SARAJEVO ZA 2016. GODINU

Prijedlog odluke ste dobili uz poziv za sjednicu. Molim predstavnika Predlagača da podnese uvodne napomene.

Ministrica Zilha Ademaj: UVODNO IZLAGANJE

Predsjedateljica:

Hvala lijepo ministrice. Da li predstavnici radnih tijela žele riječ? Ne. Ima li pitanja? Nema pitanja. Otvaram raspravu. Nema rasprave. Zaključujem raspravu.

MOLIM ZASTUPNIKE DA PRISTUPE IZJAŠNJAVANJU O PRIJEDLOGU ODLUKE O DAVANJU SAGLASNOSTI NA PROGRAM RADA ZAVODA ZDRAVSTVENOG OSIGURANJA KANTONA SARAJEVO ZA 2016. GODINU.

Tko je za? Tko je protiv? Suzdržan? Niko, hvala. Temeljem glasovanja 26 ZA, protiv 3, suzdržano ništa.

KONSTATUJEM DA JE SKUPŠTINA DONIJELA OVU ODLUKU.

Prelazimo na sljedeću tačku dnevnog reda i usput vam govorimo da nećemo prekinuti rad dok ne završimo sve.

AD – 7.

PRIJEDLOG ODLUKE O USVAJANJU "BILANSA ENERGETSKIH POTREBA KANTONA SARAJEVO ZA 2016. GODINU"

Prijedlog odluke ste dobili uz poziv za sjednicu. Da li je potrebno da predstavnik, uvodno izlaganje da li je potrebno? Nema potrebe. Da li predstavnici radnih tijela žele riječ? Ne. Ima li pitanja? Ne. Otvaram raspravu.

Poslanik Neira Avdibegović:

Hvala uvažena predsjedavajuća. Pa evo ja imam potrebu da diskutujem na ovu temu. Dakle, bilans energetske potrebe za 2016 godinu koji je danas pred nama je jedan veoma kvalitetan dokument gdje je ustvari struka rekla svoje. Vidjeli smo dakle statističke podatke, vidjeli smo trendove, procjene, potrošnju energenata u prethodnoj i plan projekciju potrošnje u 2016 godini. Međutim ja bih ovdje skrenula pažnju na dva veoma bitna momenta. Kao prvo ponovo u budžetu nisu izdvojena sredstva za izradu studije o potencijalnim resursima za proizvodnju električne i toplotne energije i njena realizacija se ponovo odgađa. Dakle ono što je zabrinjavajuće, realizacija studije se iz godine u godinu odgađa iako moramo biti svjesni da se radi o gorućem problemu i jednom od glavnih izazova sa kojima ćemo se sigurno susretati u budućnosti. Naša zemlja je energetska ovisna. Kada se radi o prirodnom gasu svrstava se u

zemlje sa najnižom sigurnošću snabdijevanja u Europi. Kantona Sarajevo dvotrećinski potrošač prirodnog gasa u FBiH. Dakle m i posebno trebamo insistirati na sistemskom uređenju iz oblasti energetike. Također treba posvetiti posebnu pažnju kako je ovaj dokumenat nalaže pitanju velikih rezervi otpadne bio mase kojima Kanton Sarajevo raspolaže i čiji potencijal može doprinijeti povećanju energetske efikasnosti. Drugi ključni momenat jeste zapravo dalje insistiranje na formiranju odnosno osnivanju Fonda za zaštitu okoliša Kantona Sarajevo. Podsjećanja radi u decembru 2008 godine donešen je Zakon o fondu za zaštitu okoliša Kantona Sarajevo međutim Fond ni danas ne postoji. U budžetu za 2016 ponovo nisu izdvojena inicijalna sredstva za osnivanje ovog Fonda iako je upravo prijedlog Kluba zastupnika DF-a još dok je budžet bio u nacrtu bio da se izdvoje sredstva za osnivanje Fonda. Mi smo svjesni činjenice da bi na ovaj način mogli iskoristiti ogromne potencijale iz međunarodnih fondova za projekte energetske efikasnosti zaštite okoliša. Smatram da se konačno mora uvidjeti hitnost rješavanja ovog problema. Naši sugrađani se svake godine doslovno guše u smogu. Zagađenost zraka je na opasnom nivou. Imamo velike gubitke u sistemu distribucije energenata i sve to upravo zato što se ne bavimo energetsom efikasnošću na pravi način. Toliko. Hvala.

Predsjedateljica:

Hvala lijepo. S obzirom da se više niko ne javlja zatvaram raspravu.

MOLIM ZASTUPNIKE DA PRISTUPE IZJAŠNJAVANJU O PRIJEDLOGU ODLUKE O USVAJANJU "BILANSA ENERGETSKIH POTREBA KANTONA SARAJEVO ZA 2016. GODINU".

Tko je za? Tko je protiv? Tko je suzdržan?

Temeljem glasovanja 28 ZA, protiv ništa, sudržan ništa.

KONSTATUJEM DA JE SKUPŠTINA DONIJELA ODLUKU.

Tačka osam.

AD – 8.

PRIJEDLOG ODLUKE O POTVRĐIVANJU PROGRAMA OBILJEŽAVANJA DANA KANTONA SARAJEVO OD 02. DO 09.05.2016. GODINE

Prijedlog odluke ste također dobili uz poziv za sjednicu. Ima li potrebe da uvodne napomene imamo? Ima potrebe? Nema. Da li predstavnici radnih tijela žele riječ? Ne. Ima li pitanja? Nema pitanja. Otvaram raspravu. Zatvaram raspravu. Zaključujem raspravu.

MOLIM ZASTUPNIKE DA PRISTUPE IZJAŠNJAVANJU O PRIJEDLOGU ODLUKE O POTVRĐIVANJU PROGRAMA OBILJEŽAVANJA DANA KANTONA SARAJEVO OD 02. DO 09.05.2016. GODINE.

Tko je ZA? Protiv? Suzdržan? Temeljem glasovanja ZA je 28, protiv ništa, sudržano ništa.

KONSTATUJEM DA JE SKUPŠTINA DONIJELA I OVU ODLUKU.

Deveta tačka dnevnog reda

AD – 9.

PRIJEDLOG ODLUKE O PRIHVATANJU ZADUŽENJA KANTONA SARAJEVO PO UGOVORU BROJ 1. O AMANDMANU NA UGOVOR O ZAJMU POTPISAN 27. OKTOBRA 2011. GODINE IZMEĐU BOSNE I HERCEGOVINE I EVROPSKE BANKE ZA OBNOVU I RAZVOJ (EBRD), ZA PROJEKAT GRADSKIH SAOBRAĆAJNICA

Prijedlog odluke ste dobili u dopunskom materijalu. Molim predstavnika Predlagača da li ima potrebe? Nema. Da li predstavnici radnih tijela žele riječ? Ne žele. Ima li pitanja?

Poslanik/zastupnik Bibija Kerla:

Pošto se javljam drugi put ja želim samo kratko da pitam zašto mi uzimamo kredit a oročavamo 586 miliona naših sredstava, sredstava BIH? Zašto ne uzimamo kredit od naših institucija, uzimamo kredit od MMF-a?

Predsjedateljica:

Hvala lijepo. Ima li još pitanja? Nema pitanja. Otvaram raspravu. Zatvaram raspravu. Odgovor, nisam vas vidjela ministre oprostite molim vas.

Ministar Jasmin Halebić:

Tu sam ja cijelo vrijeme. Možda ovako vizualna komunikacije ne postoji. Riječ je kreditu EBRD-a nije riječ o kreditu MMF-a. Ja ne znam za sredstva koja mi oročavamo u kantonu u iznosu od 550 miliona KM. Ovo jednostavno nastavak nečega što smo ranije počeli sa Bankom s kojom smo počeli dakle ovom Europskom bankom za obnovu i razvoj i riječ je o izmjeni projekta, o izmjeni dopune projekta i o obezbjeđenju nedostajućih 6 miliona eura da se ova prva faza, njena druga dionica završi.

Predsjedateljica:

Zahvaljujem ministre i još jednom se izvinjavam što vas nisam vidjela.

Poslanik/zastupnik Bibija Kerla:

Ja nisam ni govorila o oročenim sredstvima Kantona, ja sam govorila o oročenim sredstvima BIH. Znači mi bi smo ipak prije svega trebali da uzimamo kredit, ako ga već uzimamo od sredstava koja su oročena u BIH a od prihoda koji dolaze iz Elektroprivrede i Telekoma. I kao pod broj dva, mene interesuje kada je rađen plan, sad trećina sredstava koja se sada traži za uzimanje kredita je od planiranih, znači ako smo planirali 16 miliona sada tražimo još novih 6, znači onaj ko je planirao nije dobro planirao, trebao je planirati to prije. Da se sada traži još 1/3 sredstava. Hvala lijepo.

Ministar Jasmin Halebić:

Ma samo jedna dopuna. Znate javna preduzeća na federalnom nivou ne mogu se baviti poslovima kreditiranja. Dakle to nije u njihovoj nadležnosti. Poslovima kreditiranja se bave banke i fondovi. Prema tome, to jednostavno nije moguće na takav način. Za ovaj stručni dio

ja ne smatram se pozvanim da objašnjavam izvedbeni dio projekta. O finansijskim dijelovima evo ja sam tu da ponudim objašnjenja, a za ovaj stručni možda bi kolege iz saobraćaja mogle da odgovore.

Predsjedateljica:

Hvala još jednom. Zaključujem raspravu.

MOLIM ZASTUPNIKE DA PRISTUPE IZJAŠNJAVANJU O PRIJEDLOGU ODLUKE OPRIHVATANJU ZADUŽENJA KANTONA SARAJEVO PO UGOVORU BROJ 1. O AMANDMANU NA UGOVOR O ZAJMU POTPISAN 27. OKTOBRA 2011. GODINE IZMEĐU BOSNE I HERCEGOVINE I EVROPSKE BANKE ZA OBNOVU I RAZVOJ (EBRD), ZA PROJEKAT GRADSKIH SAOBRAĆAJNICA.

Tko je za? Tko je protiv? Suzdržan?

Za 20, protiv ništa i suzdržano 7.

KONSTATUJEM DA JE SKUPŠTINA DONIJELA OVU ODLUKU.

Deseta tačka dnevnog reda:

AD – 10.

PRIJEDLOG ODLUKE O POTVRĐIVANJU IMENOVANJA PREDSJEDNIKA I ČLANOVA SKUPŠTINE KJKP „GRADSKI SAOBRAĆAJ“ D.O.O. SARAJEVO

Prijedlog odluke ste dobili u dopunskom materijalu. Molim predstavnika da li ima potrebe? Nema potrebe. U redu. Da li predstavnici radnih tijela žele riječ? Ima li pitanja? Nema pitanja. Otvaram raspravu. zaključujem raspravu. kasno reagujete molim vas gdine Haliloviću. Hajte izvolite.

Molim? Jesam. Neću ni ja s vama.

Poslanik/zastupnik/zastupnik Semir Halilović:

Ovo nije učionica gđo Babić. Mi smo odrasli ljudi ovdje. Ko će sjesti, ko će ustati itd. Malo se ponašajte s uvažavanjem. Mi smo zreli ljudi ovdje.

Predsjedateljica:

Ja sam vam već jednom rekla da sjedite na pogrešnom mjestu.

Poslanik/zastupnik/zastupnik Semir Halilović:

Sjedite vi na pogrešnom mjestu.

Predsjedateljica:

Prema tome, ja ne treba da gledam gdje vi sjedite.

Poslanik/zastupnik/zastupnik Semir Halilović:

Vi sjedite na pogrešnom mjestu, vjerujte mi. Ovo nije učionica.

Predsjedateljica:

Hvala lijepo.

Poslanik/zastupnik/zastupnik Semir Halilović:

Hvala i vama. Dakle, ovo je poziv zastupnicima Skupštine Kantona Sarajevo pošto mi protračavamo kroz važne tačke dnevnog reda, da prekinemo današnju sjednicu i da nastavimo neki drugi dan, jer ovo su važne tačke, nema rasprave, nema ništa samo prolazimo. Ovo su vrlo važne tačke i ove i ove koje slijede. I ako ovako nastavimo onda je besmisleno ovdje sjedimo ovo je ko lutkarsko pozorište postaje. Hvala lijepo.

Predsjedateljica:

Zaključujem raspravu.

MOLIM ZASTUPNIKE DA PRISTUPE IZJAŠNJAVANJU O PRIJEDLOGU ODLUKE O POTVRĐIVANJU IMENOVANJA PREDSJEDNIKA I ČLANOVA SKUPŠTINE KJKP „GRADSKI SAOBRAĆAJ“ D.O.O. SARAJEVO.

Tko je za? Protiv? Suzdržan?

Temeljem glasovanja dobili smo 19 ZA, protiv 1 i suzdržano 6.

KONSTATUJEM DA JE SKUPŠTINA DONIJELA OVU ODLUKU.

Prelazimo na sljedeću tačku dnevnog reda:

AD – 11.

PRIJEDLOG ODLUKE O DAVANJU SAGLASNOSTI NA PROGRAM RADA I FINANSIJSKI PLAN FONDA KANTONA SARAJEVO ZA IZGRADNJU I OČUVANJE GROBALJA ŠEHIDA I POGINULIH BORACA, MEMORIJALNIH CENTARA I SPOMEN-OBILJEŽJA ŽRTAVA GENOCIDA ZA PERIOD 01.01. DO 31.12.2016. GODINU

Prijedlog odluke ste također dobili uz poziv za sjednicu. Molim predstavnika Predlagača da podnese uvodne napomene. Da li ima potrebe? Nema potrebe. Da li predstavnici radnih tijela žele riječ? Ne žele riječ. Ima li pitanja? Nema pitanja. Hvala lijepo. Otvaram raspravu. Nema rasprave.

MOLIM ZASTUPNIKE DA PRISTUPE IZJAŠNJAVANJU O PRIJEDLOGU ODLUKE O DAVANJU SAGLASNOSTI NA PROGRAM RADA I FINANSIJSKI PLAN FONDA KANTONA SARAJEVO ZA IZGRADNJU I OČUVANJE GROBALJA ŠEHIDA I POGINULIH BORACA, MEMORIJALNIH CENTARA I SPOMEN-OBILJEŽJA ŽRTAVA GENOCIDA ZA PERIOD 01.01. DO 31.12.2016. GODINU.

Tko je za? Tko je protiv? Suzdržan?

Temeljem glasovanja dobili smo 26 glasova ZA, protiv ništa, suzdržano ništa.

KONSTATUJEM DA JE SKUPŠTINA DONIJELA I OVU ODLUKU.

Prelazimo na sljedeću tačku dnevnog reda.

AD – 12.

PRIJEDLOG ODLUKE O DAVANJU SAGLASNOSTI NA PROGRAM RADA FONDA KANTONA SARAJEVO ZA IZGRADNJU STANOVA ZA ČLANOVE PORODICA ŠEHIDA I POGINULIH BORACA, RATNE VOJNE INVALIDE, DEMOBILISANE BORCE I PROGANE OSOBE ZA 2016.GODINU

Prijedlog odluke ste također dobili. Molim predstavnika da napravi uvodnu napomenu ako ima potrebe. Ima. Izvolite.

Ministar Čedomir Lukić: UVODNO IZLAGANJE

Predsjedateljica:

Hvala lijepo gospodine Lukić. Da li predstavnici radnih tijela žele riječ? Ne. Hvala lijepo. Ima li pitanja? Nema pitanja. Otvaram raspravu. Zaključujem raspravu.

MOLIM ZASTUPNIKE DA PRISTUPE IZJAŠNJAVANJU O PRIJEDLOGU ODLUKE O DAVANJU SAGLASNOSTI NA PROGRAM RADA FONDA KANTONA SARAJEVO ZA IZGRADNJU STANOVA ZA ČLANOVE PORODICA ŠEHIDA I POGINULIH BORACA, RATNE VOJNE INVALIDE, DEMOBILISANE BORCE I PROGANE OSOBE ZA 2016.GODINU.

Tko je za? Tko je protiv? Suzdržan Hvala lijepo.

Temeljem glasovanja dobili smo ZA 24, protiv ništa, suzdržano ništa.

KONSTATUJEM DA JE SKUPŠTINA I OVU ODLUKU DONIJELA.

Trinaesta tačka dnevnog reda.

AD – 13.

PRIJEDLOG ODLUKE O DAVANJU SAGLASNOSTI NA FINANSIJSKI PLAN PRIHODA I RASHODA ZA 2016. GODINU FONDA KANTONA SARAJEVO ZA IZGRADNJU STANOVA

Prijedlog odluke ste također dobili. Molim predstavnika Predlagača da podnese uvodne napomene. Ima li potrebe? Nema potrebe ministre Lukiću. Da li predstavnici radnih tijela žele riječ? Ne, ne žele. Ima li pitanja? Otvaram raspravu. Zaključujem raspravu.

MOLIM ZASTUPNIKE DA PRISTUPE IZJAŠNJAVANJU O PRIJEDLOGU ODLUKE O DAVANJU SAGLASNOSTI NA FINANSIJSKI PLAN PRIHODA I RASHODA ZA 2016. GODINU FONDA KANTONA SARAJEVO ZA IZGRADNJU STANOVA.

Tko je za? Tko je protiv? Suzdržan? Hvala lijepo.

Temeljem glasovanja dobili smo ZA 24, protiv ništa, suzdržano ništa.

KONSTATUJEM DA SMO USVOJILI I OVU ODLUKU.

Prelazimo na četrnaestu tačku dnevnog reda, a to je:

AD – 14.

- a) **PRIJEDLOG ODLUKE O IZMJENI NAZIVA ULICA ODNOSNO PREIMENOVANJU ULICA NA PODRUČJU OPĆINE NOVI GRAD SARAJEVO- MZ DOLAC;**
- b) **PRIJEDLOG ODLUKE O IZMJENI NAZIVA ULICA ODNOSNO PREIMENOVANJU ULICA NA PODRUČJU OPĆINE NOVI GRAD SARAJEVO- MZ BRIJEŠĆE**

Navedene prijedloge odluka ste također dobili.

Obzirom da se radi o istoj materiji predlažem da provedemo jedinstvenu raspravu po ovim odlukama, a da glasamo posebno po svakoj tački, odnosno a i b. Ima li potrebe da se izjašnjavamo, hoćemo li posebno glasati'

Molim zastupnike da se izjasne o ovom prijedlogu.

Temeljem glasovanja 24 zastupnika donijelo ovu odluku.

Molim predstavnika Predlagača da podnese uvodne napomene. Izvolite gdine Nermine Bjelak. Dobro, nema potrebe, jel? U redu. Hvala lijepo.

Da li predstavnici radnih tijela žele riječ? Nema potrebe. Ima li pitanja? Izvolite gdine Halilović.

Poslanik/zastupnik Semir Halilović:

Pitanje je sljedeće: preimenuje se ulica Safeta Isovića čikma u ulica Nusreta Aganovića. Kuda sa Safetom Isovićem? To je pitanje. Pazite ovo su dva, ovo se okreću heroj na heroja. Jednog brišete, da li se obezbijedila druga ulica za ovog čovjeka? Ovaj čovjek je bio zamjenik 2. Viteške brigade. Dakle moje pitanje je, ukoliko se ovo dopušta da se imenuje ova ulica, da li se dala alternativna lokacija za Safeta Isovića? Hvala.

Poslanik/zastupnik Nermin Bjelak (predlagač)

Gospodine Haliloviću ova ulica i dalje postoji, ovo je samo jedan dio ulice. Znači zove se čikma, što znači slijepi put i tu se daje ime ulice Nusreta Aganovića. A ulica Safeta Isovića i dalje postoji u dužini od nekih par kilometara.

Predsjedateljica:

Gospodine Mešanoviću jel vi želite sada? Ne u redu je. Hvala lijepo. Ima li još pitanja? Nema. Otvaram raspravu. Zaključujem raspravu pa bih odmah prešla na glasanje po ovom pitanju.

a)

MOLIM ZASTUPNIKE DA PRISTUPE IZJAŠNJAVANJU O PRIJEDLOGU ODLUKE O IZMJENI NAZIVA ULICA ODNOSNO PREIMENOVANJU ULICA NA PODRUČJU OPĆINE NOVI GRAD SARAJEVO- MZ DOLAC

Tko je za? Tko je protiv? Suzdržan? U redu.

KONSTATUJEM DA SMO DONIJELI OVU ODLUKU.

I sada prelazimo na tačku b. Ima li potrebe gdine Bjelak? Nema. Samo da glasamo. U redu.

b)

MOLIM ZASTUPNIKE DA PRISTUPE IZJAŠNJAVANJU O PRIJEDLOGU ODLUKE O IZMJENI NAZIVA ULICA ODNOSNO PREIMENOVANJU ULICA NA PODRUČJU OPĆINE NOVI GRAD SARAJEVO- MZ BRIJEŠĆE

Tko je za? Protiv? Suzdržan?

Za je glasalo 18, protiv ništa, suzdržano 6.

KONSTATUJEM DA JE SKUPŠTINA DONIJELA OVU ODLUKU.

Sljedeća tačka dnevnog reda.

AD – 15.

IZVJEŠTAJ O RADU KANTONALNE UPRAVE CIVILNE ZAŠTITE ZA 2015.GODINU

Izvještaj ste dobili uz poziv za sjednicu. Molim predstavnika Predlagača da podnese uvodne napomene. Da li je potrebno? Ima potrebe. Izvolite gdine Kovač.

Direktor Kantonalne uprave civilne zaštite Mustafa Kovač: UVODNO IZLAGANJE

Predsjedateljica:

Hvala lijepo gospodine Kovač. Da li predstavnici radnih tijela žele riječ? Ne. Ima li pitanja? Otvaram raspravu. Zaključujem raspravu. Da li imamo kvorum?

MOLIM ZASTUPNIKE DA PRISTUPE IZJAŠNJAVANJU O IZVJEŠTAJU O RADU KANTONALNE UPRAVE CIVILNE ZAŠTITE ZA 2015.GODINU.

Tko je za? Tko je protiv? Suzdržan?

27, Za, protiv ništa, suzdržano ništa.

KONSTATUJEM DA JE SKUPŠTINA USVOJILA OVAJ IZVJEŠTAJ.

Gospodine Rađo, vi kao predstavnik Kluba, molim vas nikako se ne ponašate u skladu sa kodeksom, galamite. Molim vas, još jedna tačka dnevnog reda. Hvala na razumijevanju.

AD –16.

IZVJEŠTAJI O RADU I FINANSIJSKOM POSLOVANJU JAVNIH USTANOVA ZA 2015.GODINU:

- a) Narodno pozorište Sarajevo ;
- b) Pozorište mladih ;
- c) Sarajevski ratni teatar - SARTR ;
- d) MES - Međunarodni teatarski festival - Scena MESS ;
- e) Muzej Sarajeva ;
- f) Kantonalni zavod za zaštitu kulturno-historijskog i prirodnog naslijeđa, Sarajevo ;
- g) Historijski arhiv Sarajevo ;
- h) Biblioteka Sarajeva ;
- i) Centar za kulturu Kantona Sarajevo

Navedene izvještaje dobili ste.

Predlažem da po ovim izvještajima imamo jedinstvenu raspravu, tj da se dogovorimo da pojedinačno glasamo te vas molim da se izjasnimo o tome hoćemo li glasati? .
Dobro.

Molim predstavnika Predlagača da podnese uvodne napomene. Izvolite ministre Kuriću.

Ministar Mirvad Kurić: UVODNO IZLAGANJE

Predsjedateljica:

Hvala lijepo ministre Kurić. Da li predstavnici radnih tijela žele riječ? Ne. Ima li pitanja? Nema pitanja. Otvaram raspravu. zaključujem raspravu. imamo li kvorum, pozovite zastupnike, molim vas. Ovo postaje već preozbiljno da nemate strpljenja da čekate još malo.

a)

MOLIM ZASTUPNIKE DA PRISTUPE IZJAŠNJAVANJU O IZVJEŠTAJU O RADU I FINANSIJSKOM POSLOVANJU JU „NARODNO POZORIŠTE SARAJEVO“ ZA 2015.GODINU

Tko je za? Tko je suzdržan? Tko je protiv?

Temeljem glasovanja za je bilo 11 zastupnika, protiv ništa, suzdržano 12.

KONSTATUJEM DA JE NISMO USVOJILI OVAJ IZVJEŠTAJ.

b)

MOLIM ZASTUPNIKE DA PRISTUPE IZJAŠNJAVANJU O IZVJEŠTAJU O RADU I FINANSIJSKOM POSLOVANJU JU „POZORIŠTE MLADIH“ ZA 2015.GODINU.

Tko je za? Tko je protiv? Tko je suzdržan?

Temeljem glasovanja za je bilo 8 zastupnika, protiv ništa, suzdržano 15.

KONSTATUJEM DA JE SKUPŠTINA NIJE USVOJILA OVO IZVJEŠĆE.

c)

MOLIM ZASTUPNIKE DA PRISTUPE IZJAŠNJAVANJU O IZVJEŠTAJU O RADU I FINANSIJSKOM POSLOVANJU JU „SARAJEVSKI RATNI TEATAR - SARTR“ ZA 2015.GODINU

Tko je za? Tko je protiv? Tko je suzdržan?

Temeljem glasovanja za je bilo 7 zastupnika, protiv ništa, suzdržano 16.

KONSTATUJEM DA JE SKUPŠTINA NIJE USVOJILA OVO IZVJEŠĆE.

d)

MOLIM ZASTUPNIKE DA PRISTUPE IZJAŠNJAVANJU O IZVJEŠTAJU O RADU I FINANSIJSKOM POSLOVANJU JU „MES - MEĐUNARODNI TEATARSKI FESTIVAL - SCENA MESS“ ZA 2015.GODINU

Tko je za? Tko je protiv? Tko je suzdržan?

Temeljem glasovanja za je bilo 8 zastupnika, protiv ništa, suzdržano 15.

KONSTATUJEM DA JE SKUPŠTINA NIJE USVOJILA OVO IZVJEŠĆE.

e)

MOLIM ZASTUPNIKE DA PRISTUPE IZJAŠNJAVANJU O IZVJEŠTAJU O RADU I FINANSIJSKOM POSLOVANJU JU „MUZEJ SARAJEVA“ ZA 2015.GODINU.

Tko je za? Tko je protiv? Tko je suzdržan?

Temeljem glasovanja za je bilo 8 zastupnika, protiv ništa, suzdržano 15.

KONSTATUJEM DA JE SKUPŠTINA NIJE USVOJILA OVO IZVJEŠĆE.

f)

MOLIM ZASTUPNIKE DA PRISTUPE IZJAŠNJAVANJU O IZVJEŠTAJU O RADU I FINANSIJSKOM POSLOVANJU JU „KANTONALNI ZAVOD ZA ZAŠTITU KULTURNO-HISTORIJSKOG I PRIRODNOG NASLIJEĐA, SARAJEVO “ ZA 2015.GODINU

Tko je za? Tko je protiv? Tko je suzdržan?

Temeljem glasovanja za je bilo 7 zastupnika, protiv ništa, suzdržano 15.

KONSTATUJEM DA JE SKUPŠTINA NIJE USVOJILA OVO IZVJEŠĆE.

g)

MOLIM ZASTUPNIKE DA PRISTUPE IZJAŠNJAVANJU O IZVJEŠTAJU O RADU I FINANSIJSKOM POSLOVANJU JU „HISTORIJSKI ARHIV SARAJEVO“ ZA 2015.GODINU

Tko je za? Tko je protiv? Tko je suzdržan?

Temeljem glasovanja za je bilo 7 zastupnika, protiv ništa, suzdržano 15.

KONSTATUJEM DA JE SKUPŠTINA NIJE USVOJILA OVO IZVJEŠĆE.

h)

MOLIM ZASTUPNIKE DA PRISTUPE IZJAŠNJAVANJU O IZVJEŠTAJU O RADU I FINANSIJSKOM POSLOVANJU JU „BIBLIOTEKA SARAJEVA“ ZA 2015.GODINU

Tko je za? Tko je protiv? Tko je suzdržan?

Temeljem glasovanja za je bilo 7 zastupnika, protiv 1, suzdržano 14.

KONSTATUJEM DA JE SKUPŠTINA NIJE USVOJILA OVO IZVJEŠĆE.

i)

MOLIM ZASTUPNIKE DA PRISTUPE IZJAŠNJAVANJU O IZVJEŠTAJU O RADU I FINANSIJSKOM POSLOVANJU JU „CENTAR ZA KULTURU KANTONA SARAJEVO“ ZA 2015.GODINU

Tko je za? Tko je suzdržan? Tko je protiv?

Temeljem glasovanja za je bilo 7 zastupnika, protiv ništa, suzdržano 15.

KONSTATUJEM DA JE SKUPŠTINA NIJE USVOJILA OVO IZVJEŠĆE.

Obzirom da smo iscrpili sve tačke Dnevnog reda današnje 13. Skupštine Kantona Sarajevo zaključujem sjednicu. Sada je tačno 17,00 sati. Lijep pozdrav i vidimo se na sljedećoj Skupštini.

